

理學綱要目錄

篇一	緒論	一
篇二	理學之原	二
篇三	理學源流派別	二五
篇四	濂溪之學	三五
篇五	康節之學	四八
篇六	橫渠之學	六五
篇七	明道伊川之學	七八
篇八	晦庵之學	九四
篇九	象山之學	一一六
篇十	浙學	一二八
篇十一	宋儒術數之學	一四三

篇十二	陽明之學	一五六
篇十三	王門諸子	一七四
篇十四	有明諸儒	一九一
篇十五	總論	一九九

理學綱要

篇一 緒論

今之人有恆言曰「宇宙觀」又曰「人生觀」其實二者本係一事。何則？人者宇宙間之一物。明乎宇宙之理，則人之所以自處者，自得其道矣。

哲學非絕人之事也。凡人所爲，亦皆有其所以然之故，即哲學之端也。雖然，此特隨事應付耳。若深思之，則我之所以處此，與此事之究須措置與否，乃皆有可疑。（如飢而食，特應付事物耳。見在之飲食，是否相宜？食而生，不食而死，孰爲眞？是凡飲食者，未有能言之者也。一一窮究之，即成哲學矣。）恆人爲眼前事物所困，隨事應付且不暇，更何暇遊心於高遠？然一社會中，必有處境寬閒，能游心於遠者；又必有因性之所近，遇事輒喜思索者；乃取恆人所不暇深思，及其困於智力，不能深思之端；而一一深思之，而哲學於是乎起矣。

然則哲學非隨事應付之謂也。隨事應付，恆人本自能之。所有待於哲學者，則窮究宇宙之理，以定目前應付之法耳。（以非窮究到底，則目前應付之法，無從證爲眞是也。）然則哲學者，窮究宇宙之理，以明立身

處世之法者也。故真可稱爲哲學家者，其宇宙觀及人生觀，必有以異於恆人。而不然者，則不足稱爲哲學家。有一種新哲學興，必能改變舊哲學之宇宙觀及人生觀。而不然者，則不足稱爲新哲學。

吾國哲學，有三大變：邃古之世，本有一種幽深玄遠之哲學，與神教相混，爲後來諸子百家所同本。諸子之學，非不高深；然特將古代之哲學，推衍之於各方面；其宇宙觀及人生觀，初未有所改變也。西漢、魏、晉諸儒，不過發揮先秦諸子之學，更無論矣。此一時期也。佛教東來，其宇宙觀及人生觀，實有與吾國異者。吾國人受其感化，而其宇宙觀及人生觀，亦爲之一變。此又一時期也。佛學既敝，理學以興。雖亦兼采佛學之長，然其大體，固欲恢復吾國古代之哲學，以拯佛學末流之弊。宋學之中，朱、陸不同。有明之學，陽明、甘泉諸家，亦復互異。然此僅其修爲之法，小有乖違；以言乎其宇宙觀、人生觀，則固大致相同也。此又一時期也。此等大概之遷變，今之人類能言之。然其所以然之故，及其同異之真，則能詳悉言之者甚鮮。茲編略述宋明哲學，即所謂理學者之真相，及其與他時代之不同，并其所以然之故。千金敵帚，雖或寶燕石而不自知；然大輅推輪，先河後海，郢書燕說，世固有其物不足貴，而其功不必薄者矣。

篇二 理學之原

理學者，佛學之反動，而亦兼采佛學之長，以調和中國之舊哲學與佛學者也。一種學術，必有其獨至之處，亦必有其流弊。流弊不可無以矯之；獨至之處，亦不容埋沒。故新興之學術，必能祛舊學術之流弊，而保其所長。謂爲代興之新學術，可謂爲改良之舊學術，亦無不可也。凡百學術，新舊遞嬗之際，皆然。佛學與理學，亦何獨不然。

又天下無突然而生之事物，新者之興，必有所資於舊。天下亦無無窮可棄之事物，一種學術，一時爲人所厭棄，往往隔若干年而又盛行焉。理學之於中國舊哲學，則如是。中國舊有之哲學，蓋自神教時代遞演遞進，至周、秦之際而極盛。兩漢、魏、晉，雖間有新思想，然其範圍不越古代哲學之範圍。佛教興而中國哲學一時退處於無權，然其中因不乏獨至之處。宋學興，乃即以是爲過，以與佛學相抗焉。故不知佛學之大要，不可以言宋學。不知中國古代哲學之大要，亦不可以言宋學也。

哲學有其質，亦有其緣。論其質，則世界哲學，無不從同。以人之所疑者同也。論其緣，則各民族所處之境，不能無異。所處之境異，斯其所以釋其疑者，亦自異矣。此世界各國之哲學，所以畢同畢異也。明乎此，乃可據見在哲學之條理，以求中國古代之哲學。

哲學之根本云何？曰：宇宙觀、人生觀是已。人生而莫不求知，求知，則凡可知之物，莫不欲盡明其底蘊。人

生而莫不求善；求善，則我之所執以爲我者，必求措諸至當之地而始安。夫宇宙者，萬物之總括也。明乎宇宙，則於事物無不明；我者，宇宙中之一物也。明乎宇宙之蘊，則我之所以自處者，不虧得其道，而自無不得其道矣。此宇宙觀與人生觀，所以二而實一，而各國哲學，莫不始於宇宙論也。

宇果有際乎？宙果有初乎？此非人之所能知也。顧古之人，不知其不可知也，不知其不可知，而其事又卒不可知，古之人果何以釋此疑哉？曰：不知彼者視諸此，由近以推遠，卽小以見大，此人類求知之恆蹊。哲學之初，亦若是則已矣。

物必有其所由來；欲明其物者，必先知其所由來，此不易之理也。芸芸萬物，果孰從而知其所由來哉？古之人則本諸身以爲推。見夫生物之生，必由牝牡之合也，則以爲一切物亦若是而已矣。所謂「物本乎天，人本乎祖」也。（禮記郊特牲。）於是陰陽爲萬有之本之義立焉。是爲哲學之第一步。（古代哲學，殆無不自男女構精，推想而出者。易之一二畫，疑卽象男女陰。老子曰：「大國者下流，天下之交，天下之牝，牝常以靜勝，牡以靜爲下。故大國以下小國，則取小國；小國以下大國，則取大國。故或下以取，或下而取。大國不過欲兼畜人，小國不過欲入事人。夫兩者各得所欲，大者宜爲下。」尤皆以男女之事爲喻也。哲學之初，難以男女生殖之說，不獨中國爲然。實由古人所欲推求，首在萬物之所由來也。）

顧既求所謂原因，則必得其惟一者。求萬物之所由來，而得陰陽二元，非人智之所能甘也。則必進而求之。進而求之，而惟一之境，實非人所能知，則不得不出以假設。以爲陰陽以前，實有一爲陰陽之所自出者，是爲兩儀所從生之大極。是爲哲學之第二步。

哲學者，所以解釋一切見象者也。不能解釋一切見象，不足以爲哲學。既有哲學，則必對一切見象，力求有以解釋之。故哲學以解釋事物而興，亦以解釋事物而生變遷。有陰陽二者，足以釋天地之相對矣，足以釋日月之代明矣，然時則有四，何以釋之？於是分陰陽爲大少，而有所謂四象。人之前後左右，其方向亦爲四，以四象配之足矣。加以身之所處則爲五；更加首之所戴則爲六；四正加以四隅則爲八；八加中央爲九；九之周圍爲十二；又何以說之？於是有以四時分配四方，更加中央爲五帝，加昊天上帝爲六帝，五帝分主四時化育，而昊天上帝則無所事事之說出焉。有上帝周行八方，而還息乎中央，所謂大一行九宮之說出焉。九宮之周圍爲十二，恰與一年十二月之數相當。於是天子之治天下，十二月各有其當行之政，謂其本乎天意也。（五帝六天，說出緯候。謂東方青帝靈威仰，主春生。南方赤帝赤熛怒，主夏長。西方白帝白招拒，主秋成。北方黑帝汁光紀，主冬藏。中央黃帝含樞紐，則寄王四時。以四時化育，亦須土也。更加昊天上帝繼魄實，則爲六帝。昊天上帝爲最尊之天神。餘五帝則分主化育之功者也。大一行九宮，說出乾鑿度。鄭注曰：「大一行者，北辰神名。下

行八卦之宮，每四乃還於中央。中央者，北辰之所居，故謂之九宮。天數大分，以陽出，以陰入，陽起於子，陰起於午。是以大一下行九宮，從坎宮始。自此而從於坤宮，自此而從於震宮，自此而從於巽宮，所行半矣，還息於中央之宮。既又自此而從於乾宮，又自此而從於兌宮，又自此而從於艮宮，又自此而從於離宮，行則周矣，上遊息於大一一之星，而反紫宮，行起從坎宮始，終於離宮也。」案此所謂大一一者，卽昊天上帝，耀魄寶也。古說天有九野，故地有九州，明堂亦有九室，王者居之，以出政令，蓋象昊天上帝也。五官之設，則所以象五方帝也。昊天上帝，無所事事，故古代君德，亦貴無爲，無爲非無所事事，乃復起之義，其初蓋正謂無所事事耳。古代神教，最尊天象，故舉四時八方等說，一一以此貫之也。○天有九野，見淮南子天文訓。一凡此者，皆舉錯雜之見象，一一以哲學釋之，且穿貫諸說爲一說者也。此爲哲學之第三步。

自物質言之，則因天自四時，而萬物皆生於土，乃分物質爲五行。五行之生，以微著爲次，此所以說萬物之生成。（尚書洪範正義）萬物成形，以微著爲漸。五行先後亦以微著爲次，水最微爲一，火漸著爲二，木漸實爲三，金體固爲四，土質大爲五也。又有相生相勝之說，則所以說萬物之迭成迭毀者也。（蕭吉五行大義）「木生火者，水性溫暖，伏其中，鑽灼而出。火生土者，火熱，故能焚木，木焚而成灰，灰卽土也。金居石，依山津潤而生。聯土成山，必生石，故生金。金生水者，少陰之氣，溫潤流澤，銷金亦爲水。水生木者，水潤而能生。」（白虎

通五行篇：「天地之性：柔勝剛，故水勝火也。精勝堅，故火勝金。剛勝柔，故金勝木。專勝散，故木勝土。實勝虛，故土勝水也。」案此篇於萬物之成毀，無不以五行生勝釋之。其說雖不足信。然在當時，實能徧釋一切現象，且頗有條理統系也。

萬物之迭成迭毀，自淺者視之，則以爲成者自無而出有，毀者自有而之無而已。稍深思之，則知宇宙間物，祇有所謂變化，更無所謂有無。實力不滅之理，固不必待科學爲證，卽據理推測，亦未嘗不可得之也。既知宇宙間祇有變化，更無有無，則不得不以萬物之原質爲一。萬物之原質，古人名之曰氣。「臭腐化爲神奇，神奇化爲臭腐」，皆此氣之變化也。（莊子知北遊：「人之生，氣之聚也。聚則爲生，生則死。臭腐復化爲神奇，神奇復化爲臭腐。」）於是萬物之原因，乃不在其何以有，而在其何以變。（此時已知有無之不可知矣。）列子湯問：「般湯問於夏革曰：古初有物乎？夏革曰：古初無物，今安得物？後之人將謂今之無物，可乎？湯曰：然則物無先後乎？夏革曰：物之終始，初無極已，始或爲終，終或爲始，惡知其紀？然自物之外，自事之先，朕所不知也。」言此義最明。（世界質力之變化，非人之所能知也。卽其變而名之，則曰動而已矣。於是世界之眞原因，乃成爲一種動力。易大傳曰：「易不可見，則乾坤或幾乎息。」（易與春秋皆首元。元卽動力也。易曰：「大哉乾元！萬物資始，乃統天。」春秋繁露重政篇曰：「元猶原也。元者，萬物之本，在乎天地之前。」乾鑿度

曰：「有太易，有太初，有太始，有太素。太易者，未見氣也。太初者，氣之始也。太始者，形之始也。太素者，質之始也。氣形質具而未相離，謂之渾沌。渾沌者，言萬物相渾沌而未相離也。」皆以一種動力爲宇宙之原也。」老子曰：「有物混成，先天地生。寂兮寥兮，獨立而不改，周行而不殆，可以爲天下母。」又曰：「谷神不死，是謂玄牝，玄牝之門，是謂天地根。縣縣若存，用之不勤。」皆指此而言之也。（谷者，空虛之義。神者，動力之謂。不死，言其不息。玄者，深遠之義。牝者，物之所由生。玄牝之門，是謂天地根，言天地由此而生也。縣縣若存，言其力之不可見。用之不勤，仍言其不息也。）是爲哲學之第四步。

宇宙之閒，既無所謂有無，則尋常所謂有無之見破。尋常所謂有無之見破，則所謂無者，其實皆有。其實皆有，而又明見爲無，則所謂有無者，非真有無，乃人能認識與不能認識之別耳。同一氣也，何以或爲人能認識，或爲人所不能認識？以其氣有疏密故也。密則爲人能認識，疏則非人能認識矣。故曰：「精氣爲物，遊魂爲變。」（精者，物質凝集緊密之謂。公羊莊十年：「犝者曰侵，精者曰伐。」注：「犝，麋也。精，猶密也。」老子：「錫今冥兮，其中有精，其精甚真。」真，固同訓。管子內業：「凡物之精，此則爲生，下爲河嶽，上爲列星。」即「精氣爲物」之說。又曰：「流於天地之間，謂之鬼神。」則「遊魂爲變」之說也。遊訓遊散，見韓康伯注。）古人說死生之故，恆以是言之。（人所識謂之明，所不識謂之幽，有幽明而無死生也。後來言此理者，張橫渠最明。）

既以宇宙萬物，爲一氣所成，陰陽二元之說，其自此遂廢乎？曰：不然。陰陽之說，與一氣之說，相成而不相礙者也。自其本質言之曰一氣，自其鼓盪言之曰陰陽。蓋變動之象，爲人所能識者，不外乎相迎相距。一迎一距，以理言，固可謂爲同體而異用；以象論，夫固見其判然而不同。既已判然不同，即可立陰陽二名以命之矣。職是故，古人卽所謂一氣者，而判之爲輕清重濁二端。「輕清者上爲天，重濁者下爲地。」（見列子天瑞篇）物之輕浮而上升者，皆天類也。其重濁而下降者，皆地類也。（易文言曰：「本乎天者親上，本乎地者親下，則各從其類也。」）天地之氣，初非各不相涉，而且彼此相求。春融和，夏炎暑，則曰「天氣下降，地氣上騰。」秋肅殺，冬閉塞，則曰「天地不通。」（月令）自男女雌雄牝牡之相求，以至於日月之運行，寒暑之迭代，無不可以是釋之。陰陽二元之說，與宇宙原質爲一氣之說，不惟不相背，且相得益彰，相待而成矣。是爲哲學之第五步。

宇宙一切現象，既莫非氣之所成；而其所由然，又皆一氣之自爲鼓盪，而非有物焉以爲之主。（莊子所謂「吹萬不同，使其自己，咸其自取，怒者其誰」也。）則其說，已成今所謂汎神論。汎神論者，世界之本體卽神。於其浩無邊際，而見其偉大焉。於其更無起訖，而見其不息焉。於其變化無方，而仍有其不易之則，而見其不測與有秩序焉。汎神論之所謂神，較之一神論多神論之所謂神，固覺其確實而可信；亦正因其確實可信，

而彌覺其大也。故中國古籍，於神之一字，皆極其歎美。（易大傳曰：「神無方而易無體。」又曰：「陰陽不測之謂神。」言彌淪乎宇宙之間者，惟有一神，更不能偏指一物以當之也。故曰：「鬼神之爲德，其盛矣乎！視之而不見，聽之而不聞，體物而不可遺。」張橫渠說鬼神，亦深得古人之旨。）而如「至誠無息」等之所謂至誠，亦皆所以狀世界之本體者也。

通宇宙之間，既除一氣之外，更無餘物，則人亦自爲此氣之所成，而爲宇宙之一體。宇宙之一體，何以成爲人？自宇宙言之，謂之命。自入言之，謂之性。（大戴禮記本命篇。）宇宙間一切，各有其不易之則，人爲宇宙之一體，自亦有其當循之道，故人貴盡性。抑人既爲宇宙之一體，非盡明乎宇宙之理，固無從知自處之方，苟其明乎自處之方，則於宇宙之理，已無不貫矣。故曰：「盡其心者，知其性也；知其性，則知天矣。」（孟子盡心。）又曰：「窮理盡性，以至於命。」（本命篇。）我者，宇宙之一體。萬物亦宇宙之一體。萬物與我，既同爲宇宙之一體，則明乎處我之道者，亦必明乎處物之道。故曰：「能盡其性，則能盡人之性；能盡人之性，則能盡物之性；能盡物之性，則可以贊天地之化育；可以贊天地之化育，則可以與天地參。」（中庸。）荀子天論：「天有其時，地有其財，人有其治，夫是之謂能參。」亦此義。所謂治，乃盡性後之辦法也。此所謂天人合一。至此，則人與自然，冥合無間，而推論之能事極，而力行之義蘊，亦盡於此矣。此爲哲學之第六步。

中國古代之道德倫理，無一不本於法自然者。以全宇宙皆一氣所成也，故我與天地萬物，可以爲一體。（惠施之說，見莊子天下篇。一體，卽融合無間之謂。與上文所用一體字異義。上文所用一體，乃孟子「子夏，子游，子張，皆有聖人之一體」之一體也。）以全宇宙之動盪不已也，故有自強不息之義。夫合全宇宙而爲一動，則雖謂其動卽其靜可也，故動靜交相資。以其變化不居，而仍有其一定之則也，故有變易、不易、易簡三義，乃盡易之蘊。（周易正義八論引乾鑿度曰：「易一名而含三義：所謂易也，變易也，不易也。易者其德也。光明四通，簡易立節。天以爛明，日月星辰，布設張列，通精無門，藏神無穴，不煩不擾，澹泊不失。變易者其氣也。天地不變，不能通義。易者其位也。天在上，地在下。」鄭玄依此作易贊及易論曰：「易一名而含三義：易簡，一也。變易，二也。不易，三也。」案此易之大義也。自然見象從差別中見其平等，亦從平等中見其差別。從平等中見其差別，則所謂易也。從差別中見其平等，則所謂不易也。所謂易簡者，謂極錯雜之見象，統馭於極簡單之原理；莫之爲而爲，莫之致而至；亘古如斯，從不差忒也。）以時時變動不居也，故賤執一而貴中庸。（以幾何學之理譬之，世界猶體，至當不易之道爲點。至當不易之道，必有一點，而亦僅有一點，此卽中庸之所謂中庸也。使世界靜止，則此點恆常，擇而執之，初非難事。惟世界變易無一息之停，故此點所在，亦無一息而不變動。擇而執之，斯爲難矣。孔子所以歎「中庸不可能」也。）以萬物之動，各有其軌道而不相亂也，故各當其位，爲

治之至。（易之道莫貴乎當位。禮運曰：「物大積焉而不溢，並行而不繆，細行而不失，深而通，茂而有間，連而
不相及也，動而不相害也，此順之至也。」即所謂各當其位也。大學之道，極於平天下。平天下之義，荀子榮辱
篇說之曰：「農以力盡田，賈以察盡財，工以巧盡械器，士大夫以上，至於公侯，莫不以仁厚知能盡官職，夫是
之謂至平。」亦不過各當其位而已。法家之明分職，義亦如此。）以自古迄今，一線相承也，故有正本慎始，謹
小慎微之義，而「正其義不謀其利，明其道不計其功」，言道德者最重動機焉。以世界本爲一體，彼之於此，
無一息不相干也，故成己可以成物，正人必先正己，而反求諸己，則一心又爲一身之本焉。（宋儒治心之學，
古人有先發之者。莊子天道篇曰：「萬物無足以撓其心者，故靜。心靜，天地之鑑也，萬物之鏡也。夫虛靜恬淡，
寂寞無爲者，天地之平，而道德之至，故帝王聖人休焉。休則虛，虛則實，實者倫矣。虛則靜，靜則動，動則得矣。」
荀子天論曰：「形具而神生，好惡喜怒哀樂臧焉，夫是之謂天性。耳目鼻口形能，各有接而不相能也，夫是之
謂天官。心居中虛，以治五官，夫是之謂天君。」一解蔽曰：「治之要在於知道。人何以知道？曰心。心何以知道？曰
虛。虛而靜。」皆與宋儒所言無以異也。（以天尊地卑，各有定位，故有君貴臣賤，重男輕女之義。以孤陽不生，
獨陰不長，故雖重男抑女，而陰陽仍有平等之義焉。以春夏秋冬，周而復始，認一切現象，皆爲循環，故有禍福
倚伏，持盈保泰之義；又有「天不變，道亦不變」之說焉。抑且萬事萬物，皆出陰陽二元，故有彼必有此，既貴

仁，又貴義；既重禮，亦重樂；一切承認異己者之竝立，而不趨極端焉。此等要義，悉數難終。蓋國人今日之思想，溯其原，無不與古代哲學相貫通者。哲學思想之初起，雖由一二哲人；而其昌大，則擴爲全社會之思想。（亦可云此種思想，在此環境中，最爲適宜，故全社會人胥具之；而哲人，則其研究之尤透澈者也。）雖屢與異族接觸，而其根柢曾未搖動。甚矣，國性之入人深也。

以上所述，爲古代普通思想。又有所謂數術家者，則其思想，頗近於唯物派。案漢志諸子略之陰陽家，出於羲和之官。數術六家，亦云出於明堂羲和史卜之職。二者蓋同出一原，而一陳其事，一言其義也。數術六家，天文、歷譜、五行、蓍龜、雜占，皆近迷信。（天文、歷譜，本無所謂迷信。然古人於此，恆雜以占驗之術。漢志謂「天文者，序二十八宿，步五星日月，以紀吉凶之象」；歷譜以「探知五星日月之會，凶阨之患，吉隆之喜」是也。天文家有閭書、祕記十七篇，蓋即識之所本也。）惟形法一家，漢志述其學曰：「大舉九州之勢，以立城郭，室舍。形人及六畜骨法之度數，器物之形容，以求其聲氣貴賤吉凶。猶律有長短，而各徵其聲，非有鬼神，數自然也。」其思想最於唯物派爲近。（此等思想，後世亦非無之，特不盛耳。如王仲任即其一也。細讀論衡自見。）中國各種迷信之術，惟相法較爲通人所信。荀子已有非相籍。其後論衡、潛夫論、申鑒，於相學皆不全然排斥。亦以相法根據人之形體，究有所依據也。此亦據骨法之度數，以求貴賤吉凶之理。）形法家之所謂數者，蓋物

質自然必至之符。形法家以爲萬物之變化，皆可求諸此；而不認有官體所不能感覺之原因，故曰「非有鬼神」。（古人以萬有之原質爲氣，而氣又分輕清重濁二者。輕清者上爲天，重濁者下爲地。人則兼備此二氣，所謂「沖和氣者爲人」也。物亦然，所謂「萬物負陰而抱陽，沖氣以爲和」也。人之死也，輕清之氣歸於天，重濁之氣歸於地。所謂「體魄則降，和氣在上」，所謂「骨肉歸復於土，魂氣則無不之」，所謂「骨肉斃於下，陰爲野土，其氣發揚於上爲昭明，焄蒿悽愴」也。此爲普通思想。形法家之所持，爲無鬼論。）漢志則不以其說爲然，故駁之曰：「形與氣相首尾，亦有有其形而無其氣，有其氣而無其形者。」漢志之所謂形，蓋卽易大傳「精氣爲物」之物；其所謂氣，蓋卽「游魂爲變」之魂，而亦卽形法家所謂「鬼神」。漢志蓋亦如普通之見，以萬物之原質（氣）時而有形可見，時而無形可見（精氣變爲游魂，游魂復爲精氣，所謂「相首尾」也）。故於形法家之說，加以詰難也。形法家之思想，而實如此，在諸學派中，實最與今所謂科學者相近；而顧與天文、歷譜、五行、蓍龜、雜占等迷信之術，同列一略，其故何哉？豈校讎者之無識與非也？天文、歷譜、五行、蓍龜、雜占，亦非必迷信之術，非必迷信之術，而其後卒入於迷信者，蓋時勢爲之也。何也？夫「理事不違」，欲明一理者，不得不徧究萬事，其說然矣。然事物之紛紜，卒非人所能盡究。於是不得不卽已經研究之事，姑定爲一理，而執之以推其餘。（宇宙之廣大悠久，實非人之所能知。乃有欲卽其已知，以推其未知者。史記述鄒衍之

學謂其「先驗小物，推而大之，至於無垠。先序今以上，至黃帝，學者所共述。大並世盛衰，因載其禮祥制度，推而遠之，至天地未生，窈冥不可考而原也。先列中國名山大川，通谷禽獸，水土所殖，物類所珍，因而推之，及海外人之所不能睹。」所用者卽此術也。太玄爲揚雄最得意之作。其書起冬迄大雪之末，備詳一年之變遷。亦以宇宙久大，不可得而知，以爲宇宙一期之變遷，必與一年之變遷相類，乃欲據此以測彼耳。卽子之元會運世，亦此思想也。此蓋凡研究學術者，一經此書，無不爲之驚異。其所引證之書，則以其所據之事，有確有不能確者，如書經及經書是也。有所根據之現象，雖前而甘研究所得，則不確者，如天文、歷譜、五行、形法諸家是也。接於人之見象，大概可分爲自然現象、社會現象二者。欲求宇宙之真理，二者固不可遺其一。中國學問，向來偏於社會見象，而缺於自然見象。其有據自然現象以研究哲理者，則古代之數術家，其先河也。後世之數術家，其思想亦不外此。（學問不能前無所承。中國研究自然見象者，惟有數術家。故少數喜研究自然見象之人，不期而入於此派。）

以上論中國古代之哲學，以下請略論佛教之哲學。

哲學有其質，亦有其緣。以質言，則世界各國，無不從同。以緣言，則各民族因處境之不同，其所從言之者，

遂不能無異。前已言之。中國哲學與印度哲學之異同，其理亦不外此。

哲學之演進，有其一定之步驟焉。其始也，必將宇宙全體，分析爲若干事物，（渾淪之宇宙，爲人所不能認識，人能知二，不能知一也。故認識卽是分別。）而於其間立一因果關係；以此事爲彼事之原因，此物爲彼物之原因。如基督教謂天主造物七日而成，中國古說謂天神申出萬物，地祇提出萬物是也。（說文○佛教不言時間之長，空間之際。有問及者，斥爲戲論。見金七十論。佛經推原事物，但曰「無始以來，」法爾而有而已。）稍進，乃知恆人所謂有無者，實爲隱顯而非有無。卽人能認識與否，而非外物真有所謂有無。乃知一切事物，有則俱有，無則俱無；彼不因此，此亦不出於彼。萬有之原因，祇可卽謂之萬有而已。（所謂一切攝一切也。）此則汎神之論所由興也。夫將宇宙分析，而以此事爲彼事之原因，此物爲彼物之原因，其說實屬不確。迷信此等說者，其所嚴恭寅畏，不過如世俗之所謂鬼神，如有物焉，隨之在上，質之在旁而已。惟尋常人然後信之，少有思慮者，卽唾棄不屑道已。至於汎神之論，則其理確不可易，而宇宙自然之律，其力之大莫與京，亦於是乎見之。此則明於哲學之士，所以恆主隨順自然，利用自然，而不主與自然相抗也。中國之哲學，蓋循此途轍而演進。印度亦然。其在古代，所謂優婆塞尼沙士者，既以代表宇宙之梵，爲最尊之神。（印度最古之經典曰吠陀，婆羅門專司之。是爲婆羅摩奴之學。其書曰阿蘭若迦。譯言林中書。以婆羅門之年老者，恆居林中

也。卽林中書而精撰之，曰優婆塞沙士。譯言與義書。與義書以梵爲宇宙之本體，亦卽爲我，惟一而無差別。有差別者曰摩耶。摩耶爲幻。人能知我與梵一，卽得智明。其所以流轉生死者，由爲無明所迷，不知差別之爲幻也。此已啓佛教惟識之先路矣。（佛教初興，所尊崇者，雖爲釋迦牟尼其人，及其進爲大乘，則所尊崇者，實爲法而非佛。人能如法修行，卽可成佛。（釋尊卽以法爲師而自悟者。）見佛固無異見法，見法亦無異見佛。佛之所以威力無邊者，實以其法身而非以其報身。（報身，謂佛其人。法身，卽自然之寓言。佛說一念皈依，則諸佛菩薩，同時護念，使之去禍得福，猶言人能爲善，則自然律中，必有善報，絲毫不得差忒也。其一心信佛，有所觀見者，是爲佛之應身。謂應於人之念慮而有。以今之學理言之，可謂應於人之心理作用而有，亦卽人之心理作用所顯現也。是爲佛之三身。其說與科學，絕不相背。）然則佛者，法之寓言耳。所謂法者，卽宇宙定律之謂也。然則大乘教之所謂佛，卽宇宙定律也。故佛教雖似一神教，有神教，而實則汎神論，無神論也。隨順自然之理，佛教中發揮尤切至。佛教貴無爲而賤有爲，所謂無爲，卽隨順自然，所謂有爲，卽與自然相抗之謂也。世間萬事，一切無常，是卽中國人所謂無一息不變之宇宙定律。知其無常而隨順之，是爲聖人。強欲使之有常，則凡夫矣。聖凡之分，卽在於此。然則佛非異人，所謂佛土，亦非異地。能明乎宇宙定律而遵守之，則娑婆世界，卽是淨土；凡夫之身，亦卽聖人耳。（此地獄之所以頓起也。）此其隨順自然之義，實與易、老無二致也。此印

度哲學與中國同者也。

其與中國異者，則因其處境之不同。蓋人之知識，雖曰藉智而得；而智之所指，必有其方；所以定此向方者，則情感也。情之所向，實因其處境而異。中國地居溫帶，爲文明所自起之黃河流域，在世界文明發原地中，又頗近於寒瘠；其民非力作則難以自存。故其所殫心者，在如何合羣力作，以維其生；以求養生送死之無憾而已。印度則地處熱帶，民生較裕。其所殫心者，不在保其身之生存，而在免其心之煩惱。簡言之：中國人所新得者身之享，（至多兼安樂言之。）印度人所求免者心之苦也。職是故，中國人觀於宇宙而得其變，印度人觀於宇宙而得其空。

何謂中國人觀於宇宙而得其變？印度人觀於宇宙而得其空也？夫宇宙一渾淪之體耳，自其全體而言之，可以謂之至實。若如西人之見，析宇宙爲若干事物，就人所能認識者，則謂之有；所不能認識者，則謂之無。則其所謂有者，亦可謂之至空。（如實則實，分析則空。空者所謂真空，實者所謂妙有也。）何則？苟爲實有，應不待因緣而成。然世間一切事物，無不待因緣成者；事物所待之因緣，亦無不待因緣成者。則萬事萬物，悉非實有可知。我者，事物之一也。一切事物，皆非實有，我安得獨有我？且無有，安得與我相對之物？我物俱無，更安有於苦樂？此蓋印度人欲求免心之煩惱，乃即世間所誦苦者，而一一窮究其所自來，窮究至極，遂發見此理。

也。此說也，以理言之，誠亦無以爲難。然理論祇是理論，終不能改變事實。吾儕所謂我與物者，就當下之感覺言之，固明明可謂之有，有我有物，斯有逆順，有逆順，斯有苦樂矣。此蓋人人之良知。佛雖有師子吼之辯，其如此良知何？爲佛教者，乃從真空而得妙有，而斷之曰：「萬法惟識。」蓋恆人以物爲實，以法爲空。自哲學家言之，則物爲空而法爲實。更進一步，則法物兩空，惟識是實。何也？夫恆人之所謂實者，豈非目可見，身可觸之物邪？其所謂空者，豈非目不可見，手不可捉之宇宙律邪？然曰：金石者，至堅之物也。至堅者，不渝之謂也。豈不然邪？曰：然。然自物理學家地質學家言之，金石亦何嘗不變？彼金石者，固自有其所以成，亦終不能免於毀。其成也，蓋循宇宙之定律而成；及其既成，則循宇宙之定律而住；方其住時，已循宇宙之定律而壞；既壞之後，乃成恆人之所謂空。蓋一切與他物同。金石且然，豈況生物？然則恆人之所謂實者，實則無一是實，所可稱爲實者，則此一切事物，循之而成，循之而住，循之而壞，循之而空之宇宙律耳。（實物無一息不變，定律則無時或息。）此佛教中「我空法有」之說，亦即普通哲學家之見也。更進一步，則離宇宙論而入於認識論矣。夫世界萬事，一切皆空，惟法是實，是則然矣。然所謂法者，果實有之物邪？抑亦吾人之認識所造邪？今日見爲赤者，明日必不能變而爲黃；一人以爲甘者，衆人必不至皆以爲苦；似所謂法者，至可信也。然有自疾者，則視一切赤物皆若黃；有胃病者，則嘗一切甘物皆若苦；又何以說之？此則恆人之所謂物之真相，實非物之真相，而爲認

識所成，彰彰矣。人之論事，恆以同自證，以多自信。惡知其所謂同，所以多者，悉由人人所造業力相同，故其所見亦同邪？此唯識一宗，所以謂萬物悉非實有，悉由人類業力所成，亦由人類業力，持使不壞也。（世界真相，實非人之所知。人之所知，祇是感官所得之相。此理，今之哲學家，人人能言之。然則吾曹所知，必有吾曹主觀之成分，更無疑矣。設使人類感官，增其一，或闕其一，即其所知，當不復如是。動物有以臭辨別一切者，有以觸辨別一切者，人不能也。然則彼所知之世界，人不知也。人之腦筋，特異於他動物。叔本華曰：「惟人能笑，亦惟人能哭。」然則人所知之世界，他動物亦不知也。此特以大概言之。若一一細別，則吾之所知者，人不能知；人之所知者，我亦不知。人人自謂所知與人相同，實則無一異同者也。然則一切皆心造無疑矣。佛說創造此等者爲第八識。八識能總持萬法而不變壞。法者，人所由以認識世界，康德所謂「先天範疇」也。七識以八識所造之境爲緣，恆審思量，執爲實有；而所謂我，所謂世界，於是乎成矣。）此其說，實與今之認識論相通。其所異者，則今之認識論，但證明世界真相不可知，一切皆出人之認識而止；而佛教則於此義既明之後，又必有其漸向之的，修持之法耳。此則以佛教究爲教，而非徒學故也。

所謂世界，苦邪樂邪？自樂觀者言之，則曰樂，以世界本善也。今之所以不善者，乃其未至於善，而非其終不能善。抑且以進化之理言之，世界終當止於至善也。（亞里士多德之說即如此。此西人進化之說所由來

也。）自悲觀者言之，則世界之爲世界，不過如此。今日固不可爲善，將來亦未必能善。以其質本惡也。求去苦得樂，惟有消滅世界耳。此佛教之終極，所以在於涅槃也。夫世界何自始邪？自恆人言之，則曰：「身，化爲萬有；曰上帝創造，七日而成耳。自不講認識論之哲學家言之，則曰：不可知耳。自持唯識論者言之，有識之始，卽世界成立之時；世界者，識之所造也。世界既爲識所造，欲消滅世界，惟有滅識耳。故佛教假名識所由起曰「無明」。而曰：「無明生行，行生識，識生名色，名色生六入，入生觸，觸生受，受生愛，愛生取，取生有，有生，生，生，生，老病死苦。」所謂「十二緣生」，亦卽所謂「苦集二諦」也。斷此二諦，時曰「滅諦」。滅也者，滅此識也。滅識非自殺之謂，自殺祇能殺其身，不能斷其識也。斷其識者，所謂「轉識成智」也。識所以可轉爲智者，以佛教假名一切罪業之本爲無明，本來清淨之體曰「真如」。真如無明，同體不離。（佛家喻之以水與波。在今日，則有一更切而易明之譬，生理病理是也。病時生理，異乎平時，然非別有一身，去病還健，亦非別易一身也。）「無明可熏，真如而爲迷，真如亦可還熏無明而成智也。」佛之所謂寂滅者，雖曰轉識成智，非謂使識消滅。然所謂世界，既係依識而立，識轉爲智，卽是識滅，識滅，卽世界消滅矣。故佛教之究竟，終不離於涅槃也。

夫如是，則佛教與中國哲學之同異，可知已矣。佛家既謂一切迷誤，皆起於識，則藉智以探求真理，自然

無有是處。佛家所謂智，不徒不能藉智以求，且必斷識而後能得，所謂「惟證相應」也。夫如是，則其修持之法，必致漠視事物，而徒致力於一心；而所謂致力於一心者，又非求以此心，駕馭事物，而在斷滅此心之識。此爲佛教進步必至之符。（一種學問，不能無所注重。有所注重，即有所偏矣。治理學者，曷嘗謂當屏棄事物，專談心性？然物莫能兩大，既以心性爲重，終必至於遺棄事物，此勢所必至，無可如何者也。佛家六度，萬行，曷嘗偏於寂滅？然既以心識爲主，終亦必偏於治內。亦猶理學未嘗教人以空疏，而卒不免於空疏也。）諸宗之所以皆衰，禪宗之所以獨盛，蓋由於此。又中國人之所求，爲處置事物，處置事物，至當不易之道，惟有一點，是爲儒家所謂中庸。仁義皆善，過卽爲惡。（理學家所謂「無善惡，祇有過不及；中卽善，過不及卽惡」也。）佛教既以去苦爲的，較之中國，自不能不偏於仁。其所謂「菩薩行」者，卽純然一有人無我之境界。（讀華嚴經，最可見之。佛說四聖曰：「佛」，曰「菩薩」，曰「緣覺」，曰「聲聞」。緣覺，聲聞，因怖畏生死而修道，猶有我之見存，故大乘斥其不足成佛。菩薩則全與恆人相反。恆人念念不離乎我，菩薩念念有人無我。基督所行，方佛斯義，猶有人我之見存，與恆人處於對待之地位，未爲盡善也。佛則超乎對待之境之外矣。佛教以超出世界爲宗旨，故必至佛而後爲究竟。然佛無可學，恆人所能學者，止於菩薩行。菩薩行，所以漸成佛也。）故可委身以飼餓虎；又可任人節節支解，不生嗔怒。由中國之道言之，則過於仁而適成爲不仁矣。

佛教修持之宗旨，可攝以一語，曰：「悲智雙修。」所謂悲者，本於佛教之悲觀。其視世界，徹始徹終，皆爲罪惡，無可改良之理。欲求善美，惟有舉此世界而消滅之耳。故其視世界之內，無一人一物而非流轉苦海，無一人一物而不可悲可憫也。所謂智者，則爲救此世界之法所自出。必深觀此世界之究竟，乃能知其致苦之由，乃知所以救之之道。救之之道既得，則一切善巧方便，皆自此出焉。其修持之法，亦可攝以一語，曰：「止觀雙修。」止非寂然不動之謂，而常在正念之謂。（若以寂然不動爲正念，則亦可。所謂「正念者無念」也。）所謂「十二時中，常念於法，不相舍離」也。蓋天下之禍，成於著而實起於微。一千九百十四年歐洲之大戰，其禍可謂博矣。推厥由來，則曰：由各民族有互相疾惡之心也。由資本家皆思賤人以自肥也。各民族何以有互相疾惡之心？各資本家何故皆思賤人以自肥？其所由來者遠矣。不能拔其本，塞其原，而徒欲去其相疾惡之心，與其賤人自肥之念，無益也。然此等原因，極爲深遠，推得一層，又有一層在其後，則將奈何？曰：原因雖極繁複，而其性質則極簡單，一言蔽之曰：不正之念而已。一人起不正之念，則必傳遞激動第二人。第二人又激動第三人。如水起微波，漸擴漸大。其極，遂至於懷山襄陵，浩浩滔天。然分析之，原不過一一微波之相激。苟能使千萬微波，同時靜止，水患固可以立除。即能於千萬微波中，靜止其一二，其靜止之力，亦必足以殺洶湧之勢，猶其洶湧之勢，足以破靜止之局也。要之止波其本矣，此止之義也。觀則所以求智。世界上事，恒人但觀其

表面，故其論皆似是而非。佛則必須觀審到底。故世俗所謂大善，自佛觀之，悉成罪業。且如愛國、愛世界，豈非世俗以爲大善者哉？然愛其國，則必不愛異國，而兩國相爭，伏尸流血之禍，伏於此矣。貪戀執著，禍之所由起也。愛世界而不知其方，使貪戀執著之情，波及於人人而不可拔，亦爲世界造禍也。故恆人之所謂善，佛譬之「以少水沃冰山，暫得融解，還增其厚。」然則人固當常念於法，而何者爲法，非觀審極深，亦何由知之哉？此止觀二者，所以如車兩輪，如鳥雙翼，不可偏廢也。

佛教立說之法，亦有與中國人異者。曰「徹底。」中國人重實務。先聖先賢之說，大抵就事論事之言。誠不敢謂先聖先賢，不知究極之理，然其所傳之說，則固以就事論事者爲多矣。佛家則不然。每立一說，必審其所一安立一之處。曰「某說在某種標準之下言之，若易一標準，則不如是矣。」曰「某法不過一種方便，語其究竟，則不如此矣。」此等處，中國多不之及，佛家則極爲謹嚴。故其說路路可通，面面無病。稱佛說者，皆由以圓字美之也。此實印度人言語之法，與中國不同也。

以上所述，中國古代之哲學，乃理學家之所取材也。佛教之哲學，則或爲其所反對，或爲其所攝受也。明乎此，而理學可以進論矣。

篇三 理學源流派別

自宋以來，以理學名家者甚多。一一講之，勢將不可勝講。諸家有自有發明者，亦有僅守前人成說者。今先略述其源流派別。以下乃就其確有特見者，以次講之。

宋學先河，當推安定。（胡瑗，字翼之，泰州如皋人。世居安定，學者稱安定先生。）泰山（孫復，字明復，晉州陽平人。退居泰山，學者稱泰山先生。）徂徠（石介，字守道，奉符人。居徂徠山下，魯人稱爲徂徠先生。）黃東發謂「本朝理學，雖至伊洛而精，實自三先生始」是也。安定於教育最有功。其在湖學，分經義治事爲兩齋，爲宋人之學純於儒之始。亦宋儒喜言經世之學之始。泰山作春秋尊王發微，爲宋學重綱紀，嚴名分之始。徂徠作怪說，中國論，以譏斥佛老時文，則宋學排二氏黜華采之始也。三先生者，雖未及心性之精微，然其爲宋學之先河，則卓然不可誣矣。

三先生同時，名儒甚多。其兼爲名臣者，則有若范文正。（范仲淹，字希文，蘇州吳縣人。文正之學，原出戚同文。同文，字同文，楚丘人。文正四子：長純祐，字天成。次純仁，字堯夫。次純禮，字彝叟。次純粹，字德孺。堯夫學最著。安定、泰山、徂徠，皆客文正門。堯夫皆從之游。又從南城李觀。觀，字泰伯，學者稱盱江先生。○橫渠少時喜言

兵，嘗欲結客取洮西。謁文正，文正曰：「名教中自有樂地，何事於兵？」授以中庸，乃繙然志於道。故橫渠之學，實文正啓之也。（韓忠獻，韓琦，字稚圭，安陽人。）歐陽文忠，（歐陽修，字永叔，吉州廬陵人。）富文忠，（富弼，字彥國，河南人。）司馬文正，（司馬光，字君實，陝州夏縣人。）而司馬氏最著，傳其學者，劉忠定，（劉安世，字器之，大名人。）忠定學最篤實。嘗問涑水：「有一言而可終身行之者乎？」曰：「其誠乎？」問其目，曰：「自不妄語始。」一學之七年而後成。（范正獻，（范祖禹，字淳夫，一字夢得，華陽人。）文正子康，字公休，又從正獻學。）晁景迂也。（晁說之，字以道，澧州人。）傳涑水之數學。其窮而在下，或雖仕宦而不以勳業著者，則有齊魯之士，劉，（士建中，字希道，鄆州人。）與泰山同時。泰山最推重之，徂徠亦服膺焉。劉顏，字子望，彭城人。）閩中之四先生，（陳襄，字述古，學者稱古靈先生。）陳烈，字季慈，學者稱季甫先生。）鄭穆，字閔中，周希孟，字公闢，四先生皆侯官人。少後於安定，而在周程張邵之前，講學海上，有四先生之目。宋人溯道學淵源不之及。全謝山修宋元學案，爲立古靈四先生學案。（明州之楊杜，（楊適，字安道，慈谿人。）杜淳，居慈谿。）永嘉之儒志經行，（王開祖，字景山，學者稱儒志先生。）丁昌期，學者稱經行先生。）皆永嘉人。）杭之吳師仁，（字坦求，錢塘人。）皆與湖學桴鼓相應。而閩中之章黃，（章望之，字表民，浦城人。）黃晞，字景微，建安人。）亦古靈一輩人。閩中之申侯，（侯可，字無可，其先太原人，徙華陰，主華學二十年，爲學極重禮樂，申顏，侯氏之友。）開橫渠之先路。蜀之宇文止

止，（字文之邵，字公南，縣竹人。）則范正獻之前茅也。

宋學之確然自成爲一種學問，實由周程張邵。（邵雍，字堯夫，范陽人。曾祖家衡漳；先生幼從父遷河南。元祐賜諡康節。）康節之學偏於數。理學家不認爲正宗。橫渠之學純矣。然小程謂其「苦心極力之象多，寬裕溫厚之氣少」，後人尊之，亦遂不如濂溪之甚。（張載，字子厚，鳳翔郿縣橫渠鎮人。）濂溪作太極圖說及通書，實爲宋儒言哲學之首出者。（周敦頤，字茂叔，道州營道人。知南康軍，家廬山蓮花峯下，有溪合於湓江，取營道故居濂溪名之。）二程少嘗受業於濂溪，長而所學實由自得。然周子以主靜立人極，明道易之以主敬，伊川又益之以致知，其學實一脈相承；朱子又謂二程之學，出自濂溪；後人遂尊爲理學之正宗焉。（程頤，字伯淳，洛陽人。學者稱明道先生。弟頤，字正叔，初稱廣平先生，後居伊陽，更稱伊川先生。）

與五子同時者，有范蜀公。（范鎮，字景仁，華陽人。祖禹其從孫也。蜀公猶子百祿，及從曾孫沖，亦皆理學家。）呂申公。（呂公著，字晦叔，東萊人。諡正獻。）韓持國。（韓維，諡持國，穎昌人。）又有呂汲公。（呂大防，字晦仲，其先汲郡人。祖葬藍田，因家焉。諡正愍。）王彥霖。（王巖炎，字彥霖，大名清平人。）又有豐相之。（豐稷，字相之，鄆縣人。）李君行。（李潛，字君行，虔州興國人。）雖不足與於道統，亦五子之後先疏附也。

術數之學，在中國本不盛，故傳邵子之學者頗少。伯溫（伯溫，字子文，南渡後，趙鼎從之學。鼎字元鎮，聞

喜人。雖號傳家學，實淺薄不足觀也。張子爲豪傑之士，其學又尙實行，故門下多慷慨善言兵。（种師道，字儀叔，洛陽人。爲北宋名將。范育，字巽之，邠州三水人。游師雄，字景叔，武功人。皆與於平洮河之役，爭元祐棄熙河。李復，字履中，長安人。喜言兵。張舜民，字芸叟，邠州人。亦慷慨喜言事。）而三呂（呂大忠，字晉伯，大防兄。大鈞，字和叔，大臨，字與叔，皆大防弟。）尤爲禮學大宗。（三呂皆並游張、程之門，然於張較厚。和叔知則行之，無所疑畏，論者方之季路。嘗撰鄉約，又好講井田兵制，撰成圖籍，皆可施行。喪祭一本古禮，推之冠昏、飲酒，相見、慶弔，皆不混習俗。橫渠謂「秦俗之變，和叔有力焉。」小程子嘗謂與叔守橫渠說甚固。橫渠無說處，皆相從，有說處，便不肯回。可見三呂皆篤於張氏矣。）二程之門，最著稱者爲游（游酢，字定夫，建州建陽人。學者稱厲山先生。）楊（楊時，字中立，南劍將樂人。）尹（尹惇，字彥明，一字德充，洛陽人。學者稱和靖先生。）謝（謝良佐，字顯道，壽春上蔡人。）游氏書不傳，弟子亦不著。謝氏之門，最著者爲朱漢上。（朱震，字子發，荆門軍人。）然漢上易學，實由自得，不出師門也。尹氏最後起，守師說亦最醇。（謝氏以覺言仁，實啓象山之學。游、楊二家，晚亦好佛。）其傳亦不廣。惟龜山最老壽，遂爲洛學大宗。

龜山之學，傳之羅豫章。（羅從彥，字仲素，南劍人。學者稱豫章先生。）延平（李侗，字愿中，南劍人。）章齋（朱松，字喬年，婺源人。朱子之父。爲尤溪縣尉，因家焉。學者稱章齋先生。）皆師豫章。而胡文定（胡安國

字康侯，崇安人。與游、楊、謝三先生，義兼師友。其子五峯（宏，字仁仲，其兄寧，字和仲，學者稱茅堂先生。茅堂治春秋，文定作春秋傳，修纂檢討，皆出其手。）致堂（寅，字明仲，實文定兄子，其母不欲舉，文定夫人子之。）皆學於豫章。籍溪（憲，字原仲，文定從父兄子，居籍溪，學者稱籍溪先生。）邦衡（胡銓，字邦衡，廬陵人，從鄉先生蕭子荆學春秋，卒業於文定。）則學於文定。朱子初師屏山（劉子翥，字彥沖，崇安人，韓子、子羽弟也。）籍溪、白水（劉勉之，字致中，崇安人，以女妻朱子。○白水師元城及龜山。）而卒業於延平（朱熹，字元晦，一字仲晦，初居崇安五夫，築書院於武夷之五曲，榜曰紫陽，識鄉關也。後築室建陽 蘆峯之巔，曰雪谷。其草堂曰晦庵。自號雲谷老人，亦曰晦庵，曰晦翁。晚更居考亭，築精舍曰滄洲，號滄洲病叟。趙汝愚竄永州，將諫，門人諫箴之，遇懸之同人，乃取稿焚之。自號曰懸翁。）南軒（張栻，字敬夫，一字樂齋，號南軒，廣漢人，遷於衡陽，浚子）之學，出於五峯。呂成公亦嘗師籍溪，又事汪玉山（呂祖謙，字伯恭，公著後也，祖好問，始居婺州，北宋理學，呂氏最盛，韓氏次之，詳見宋元學案。○汪應辰，字聖錫，信州玉山人。）玉山者，橫浦（張九成，字子韶，錢塘人，自號橫浦居士，又號無垢居士。）弟子，橫浦亦龜山弟子，故南渡後三先生之學，實皆出於龜山者也。

乾淳三先生，呂張皆早世，惟朱子年最高，講學亦最久，故其流傳最遠。南軒之學，盛於湖湘，流行於蜀，聞數傳而漸微。呂氏同氣子約（成公弟，名祖儉，學於成公，諡忠。）泰然（成公從弟，名祖泰，居宜興，趙汝愚之

罷。子約論教，安置韶州。後移筠州，卒。秦然詣登聞鼓院上書，請誅侂冑。配欽州，卒。皆以忠節著。浙學好言文獻，皆可謂呂氏之遺風。然如永嘉、永康，偏於功利，殊失呂氏之旨。（永嘉之學，始於薛季宣。季宣，字士龍，永嘉人。師事袁道潔。道潔師事二程。季宣加以典章制度，欲見之事功。陳傅良、葉適繼之，而其學始大。傅良，字君舉，瑞安人。適，字正則，永嘉人。永康之眉目爲陳亮。字同甫，永康人。學者稱瑞安先生）。王伯厚（王應麟，字伯厚，慶元、鄞縣人。學者稱厚齋先生）。長於經制，全謝山以爲呂學大宗，實則其學問宗旨，亦與朱氏爲近也。

朱門之著者有蔡西山父子（蔡元定，字季通，建之、建陽人。居西山。子沈，字仲默）。其律曆象數之學，足補師門之闕。勉齋（黃幹，字直卿，閩縣人）。以愛堦爲上座，實能總持朱子之學。勉齋歿而後，異說興，猶孔門七十子喪而大義乖矣。勉齋之學，一傳而爲金華（何基，字子恭，金華人，居金華山。學者稱金華先生）。再傳而爲魯齋（王柏，字會之，金華人）。白雲（許謙，字益之，金華人。學者稱白雲先生）。仁山（金履祥，字吉父，蘭溪人。居仁山下。學者稱仁山先生）。雙峯（饒魯，字伯與，一字仲元，餘干人。築石洞書院，前有兩峯，因號雙峯）。皆卓有聲光。輔漢卿（輔廣，字漢卿，號潛庵，崇德人）。學於朱子，兼受學於成公。其傳爲魏鶴山（魏了翁，字華父，邛州蒲江人。築室白鶴山下。學者稱鶴山先生）。詹元善（詹體仁，字元善，浦城人）。亦學於朱子。其傳爲真西山（真德秀，字景元，後更曰希元，建之、浦城人）。皆宋末名儒。詹氏再傳，輔氏四傳而得黃東發。

（黃震，字東發，慈溪人。學者稱於越先生。東發學於余端臣及王壘。壘學於詹元善。端臣學於韓性。性，字明善，私諡曰莊節先生。性之學，出自其父翼甫。翼甫，字灼齋，會稽人。輔漢卿之弟子也。）則體大思精，又非其師所能逮矣。此朱學之在南者也。其衍於北者，始於趙江漢。（趙復，字仁甫，德安人。學者稱江漢先生。元屠德安，姚樞在軍前，以歸，教授於燕。北方始知有程朱之學。）姚樞，（字公茂，柳城人。後徙洛陽。○樞從子燧，字端甫，學於許衡。）許衡，（字仲平，河內人。學者稱魯齋先生。）郝經，（字伯常，澤州陵川人。）劉因，（字夢吉，雄州容城人。學者稱靜修先生。）皆出其門。朱學自宋理宗時，得朝廷表章，元延祐科舉，又用其法，遂如日中天矣。

洛學明道、伊川，性質本有區別。學於其門者，亦因性之所近，所得各有不同。故龜山之後爲朱，而上蔡、信伯，遂啓象山之緒。（朱子謂上蔡「說仁說覺，分明是禪」，又謂「今人說道，愛從高妙處說，自上蔡已如此。」又云「上蔡之說，一轉而爲張子韶。子韶一轉而爲陸子靜。」案上蔡近乎剛，龜山近乎柔。朱子謂「上蔡之言，多踴厲風發；龜山之言，多優柔平緩」是也。王蘋，字信伯，世居福之，福清父徙吳。師伊川。龜山最稱許之。全謝山曰：「象山之學，本無所承。東發以爲遷出上蔡，予以爲兼出信伯。」案信伯嘗奏高宗「堯舜禹湯文武之道，若合符節，非傳聖人之道，傳其心也。非傳聖人之心，傳己之心也。己之心，無異聖人之心，萬善皆備。欲傳堯舜以來之道，擴充此心焉耳。」可見其學之一斑。）金溪之學，梭山啓之，復齋昌之，象山成之，與朱學雙峯並

時。（象山兄弟六人：長九思，字子強。次九紘，字子儀。次九皋，字子昭，號庸齋。次九韶，字子美，講學校山，號梭山居士。次九齡，字子壽，學者稱復齋先生。次九淵，字子靜，號存齋，結廬象山，學者稱象山先生。）傳陸學者，爲明州四先生。（舒沈，字元質，一字元賓，奉化人。沈煥，字叔晦，定海人。袁燮，字和叔，鄞縣人。楊簡，字敬仲，慈谿人。築室德潤湖上，更其名曰慈湖。）袁、楊仕宦高，其名較顯。袁言有矩矱，楊則頗入於禪。攻象山者，每以爲口實焉。朱子門下，闢陸氏最力者爲陳安卿，（陳淳，字安卿，龍溪人。）至草廬而和會朱、陸。（吳澄，字幼清，學者稱草廬先生，撫州崇仁人。）○繼草廬而和會朱、陸者，又有鄭師山，名玉，字子美，徽州歙縣人。嘗構師山書院，以處學者，故稱師山先生。論者謂師山多右朱，草廬多右陸。（陸氏門下，至安仁三湯，而息菴存齋皆入於朱，惟晦靜仍守陸學。（湯干，字升伯，學者稱息菴先生。安仁人。弟巾，字仲能，學者稱晦靜先生。中，字季庸，學者稱存齋先生。）傳之從子東澗（湯漢，字伯紀。）及徑阪（徐霖，字景說，衡之西安人。謝疊山其門人也。疊山名枋，字君直，弋陽人。）徑阪之後，陸學寢衰。靜明，（陳苑，字立大，江西上饒人。學者稱靜明先生。）寶峯，（趙偕，字子永，宋宗室與憲後。慈谿人。隱大寶山麓，學者稱寶峯先生。）得其遺書而再振之。元代科舉用朱，朱學幾於一統。至明，王陽明出，乃表章陸氏焉。

元代理學，不過衍紫陽之緒餘，明人則多能自樹立者，而陽明其尤也。明初學者，篤守宋儒矩矱。方正學

（方孝孺，字希直，台之寧海人。自名其讀書之堂曰正學。正學大節凜然。論者謂其「持守之嚴，剛大之氣，與紫陽相伯仲」焉。）曹月川（曹端，字正夫，號月川，河南滎池人。劉蕡山云：方正學後，斯道之絕而復續，實賴曹月川。卽薛敬軒亦聞其風而興起者。）吳康齋（吳與弼，字子傅，號康齋，撫州崇仁人。刻苦奮厲，辭官躬耕，或譏其所學未見精微。然其克己安貧，操持不懈，凜乎其不可犯，要不易及也。）薛敬軒（薛瑄，字德溫，號敬軒，山西河津人。其學兢兢於言行間檢點，惴惴無華，可謂恪守宋人矩矱。然有未見性之譏。）皆其卓卓者。河東之學，傳諸涇野（呂柟，字仲木，號涇野，陝之高陽人。涇野講學所至甚廣，講席幾與陽明中分。一時篤行之士，多出其門。）三原（王恕，字宗貫，號介菴，晚又號石渠，陝之三原人。）仍重禮樂，篤躬行，存關學之面目，與師門少異其趣。康齋之學，傳諸白沙，主張「靜中養出端倪」，一則於師門大變手眼矣。（陳獻章，字公甫，號石齋，新會白沙里人。諡文恭。）○康齋弟子又有胡居仁，字叔心，饒州餘干人。學者稱敬齋先生。婁諒，字元貞，號一齋，廣信上饒人。一齋以收放心爲居敬之門，以何思何慮，勿忘勿助爲居敬要指。敬齋闢之，謂其陷於異教。論者謂「有明之學，至白沙而後精，至陽明而後大」，白沙實陽明之前驅也。

有明之學，自當以陽明（王守仁，字伯安，餘姚人）爲大宗。理學名家，非衍陽明之緒餘，卽與陽明相出入者也。陽明之學，蓋承朱學之敝而起。其學實近法象山，遠承明道，特較象山、明道尤精且大耳。傳陽明之學

者，當分浙中、江右、泰州三大派。浙中之學，以龍溪、緒山爲眉目。（浙中王門，實以徐曰仁爲稱首。曰仁名愛，號橫山，餘姚人。陽明之內兄弟也。受業最早。及門有未信者，曰仁輒爲之騎郵，門人益親。陽明稱爲吾之顏淵。早卒。龍溪、緒山，講學最久，遂爲王門之翹楚。龍溪王氏，名畿，字汝中山陰人。緒山錢氏，名德洪，字洪甫，餘姚人。）江右則東廓、（鄒守益，字謙之，江西安福人。）念菴、（羅洪先，字達夫，江西吉水人。）兩峯、（劉文敏，字宜充，安福人。）雙江、（聶敬，字文蔚，江西永豐人。）及再傳塘南、（王時槐，字子植，安福人。師兩峯。）思默、（萬廷言，字以忠，江西南昌人。師念菴。）皆有發明。泰州多豪桀之士，其流弊亦最甚。末年得劉敬山、（劉宗周，字起東，號念臺，山陰人。）提唱慎獨，又王學之一轉手也。與王學同時角立者，有止修、甘泉二家。（李材，字孟誠，號見羅，江西豐城人。以止修二字爲學鵠。湛若水，字元照，號甘泉，廣東增城人。師白沙。）其繼起而矯正其末流之弊者，則東林中之高、顧也。（高攀龍，字存之，別號景逸。顧憲成，字叔時，別號涇陽，皆常州無錫人。涇陽契陽明，而深闢無善無惡之論。）

明末大儒：梨洲、（黃宗羲，字大沖，餘姚人。）夏峯、（孫奇逢，字啓泰，號鍾元，北直容城人。）二曲、（李中孚，號屋人。家在二曲間。學者稱二曲先生。）皆承王學，而亭林、（顧炎武，初名絳，字寧人，崑山人。）船山、（王夫之，字而農，號薑齋，衡陽人。）蒿菴、（張爾岐，字稷若，濟陽人。）楊圓、（張履祥，字考夫，號念芝，居桐鄉之楊

園，學者稱楊園先生。楊園嘗師戴山，然學宗程。朱（梈亭，（陸世儀，字道威，太倉人。）則皆宗朱。其後清獻起於南。（陸隴其，字稼書，平湖人。關陸王最力。）清格起於北。（張伯行，字孝先，號敬菴，儀封人。）而學風乃漸變。湯文正（湯斌，字孔伯，號荆峴，晚號潛菴，睢州人。）嘗師夏峯，後亦折入程。朱，但不關陸王耳。清代名臣，負理學重名者頗多，皆宗朱；然實多曲學阿世之流，心學承晚明之猖狂，彌以不振；蓋至是而宋明之哲學，垂垂盡矣。

篇四 濂溪之學


一種新哲學之創建，必有一種新宇宙觀，新人生觀，前已言之。宋代哲學，實至慶曆之世，而始入精微。其時創立一種新宇宙觀及人生觀者，則有若張子之正蒙，司馬氏之潛虛，邵康節之觀物。司馬氏之書，不過揚子太玄之倫。邵子之說，頗有發前人所未發者。然術數之學，我國本不甚行，故其傳亦不盛。張子之說醇矣；然不如周子之渾融。故二程於周子，服膺較深。朱子集北宋諸家之成，亦最宗周。程焉。而周子遂稱宋學之開山矣。

周子之哲學，具於太極圖說及通書。太極圖說或議其出於道家，不如通書之純。此自昔人存一儒釋道

之界限，有以致之。其實哲學雖有末流之異，語其根本，則古今中外，殆無不同；更無論儒道之同出中國者矣。通書與太極圖說相貫通。通書者，周子之人生觀；太極圖說，則其宇宙觀也。人生觀由宇宙觀而立。廢太極圖說，通書亦無根柢矣。朱子辨太極圖說，必為濂溪所作，而非受諸人。（潘輿嗣作周子墓志，以圖為周子自作，陸象山以為不足據。）其說誠不可信。然謂「傳者誤以此圖為通書之卒章，而讀通書者，遂不知有所總攝」，則篤論也。

太極圖之出於道家，殆不可諱。然周子用之，自別一意，非道家之意也。（見下。）所謂太極圖者，如左：

無極而太極



萬物化生

上一圈為太極。太極不

能追原其始，故曰「無極而

太極」。次圈之黑白相間者

為陰靜陽動。（黑為陰靜，白

為陽動。）陰居右，陽居左。陽

變為陰，陰變為陽，故左白右黑之外，間以左黑右白一圈，其外則復為左白右黑焉。（次圖之中一白圈，即太極。）其下為水、火、木、金、土五小圈。水、金居右，火、木居左者，水、金陽而火、木陰也。土居中，沖氣也。水、火、木、金、土，上

屬於第二圈，明五行生於陰陽也。下屬於第四圈，明人物生於五行也。水、火、木、金、土各爲一小圈，所謂「五行各一其性」也。其序自水之木，自木之火，自火之土，自土之金，沿洪範五行首水，及古人以五行配四時之說，所謂「五氣順布而四時行」也。下一圈爲「乾道成男，坤道成女」，明萬物所由生也。又下一圈曰「萬物化生」，人亦萬物之一，實不可分作兩圈，周子蓋沿道家舊圖，未之改也。（周子之意，或以「乾道成男，坤道成女」爲絀象之言，不指人。）

周子之說此圖也，曰：「無極而太極，太極動而生陽，動極而靜，靜而生陰，靜極復動。一動一靜，互爲其根，分陰分陽，兩儀立焉。陽變陰合，而生水、火、木、金、土，五氣順布，四時行焉。五行一陰陽也，陰陽一太極也，太極本無極也。五行之生也，各一其性，無極之真，二五之精，妙合而凝。乾道成男，坤道成女，二氣交感，化生萬物，萬物生生而變化無窮焉。」案此周子根據古說，以說明宇宙者也。古有陰陽五行之說，已見前。二說在後來，久合爲一，而推原其始，則似係兩說。以一爲二元論，一爲多元論也。其所以卒合爲一者，則以哲學所求，實爲惟一，多元二元之說，必進於一元而後安。五行之說，分物質爲五類，乃就認識所及言之。其後研究漸精，知人所能認識之物質，與其不能認識，而指爲虛空者，實無二致。其所以或能認識，或不能認識者，則以物質有聚散疏密之不同，自人觀之，遂有隱顯微著之各異耳。至此，則認識所及之水、火、木、金、土，與認識所不及之至微之氣，

可以并爲一談。而五行之多元論，進爲一元矣。陰陽之說，蓋因「男女構精，萬物化生」悟入。其始蓋繼以陰陽爲二體。研究漸精，乃知所謂陰陽者，特人所見現象之異，其本體初不能謂爲不同。於是陰陽二者，可謂同體而異用。乃爲之假立一名曰太極。而陰陽二元之論，亦進爲一元矣。二說既同進爲一元，自可合併爲一說。乃以太極爲世界之本體，世界之現象，爲人所認識者，實爲變動。則以陰陽之變化說之，而二者仍爲同體而異用。此所以說世界流轉之原理。若以物質言，則一切物之原質，皆爲氣、水、火、木、金、土，皆此氣之所爲。萬物之錯綜，則又五行之所淆而播也。氣之所以分爲五行，五行之所以淆而爲萬物，則以不可知之太極。無始以來，卽有此一靜一動之變化也。此乃自古相傳之說。周子亦不過融會舊文，出以簡括之辭耳，非有所特創也。

中國無純粹之哲學，凡講哲學者，其意皆欲措之人事者也。周子亦然。故於說明宇宙之後，卽繼之以人事。曰：「惟人也，得其秀而最靈。」此言人之所以爲人也。曰：「形既生矣，神發知矣。五性感動而善惡分，萬事出矣。聖人定之以仁、義、中、正，而主靜，立人極焉。」此爲周子之人生觀。凡一元論之哲學，必將精神物質，并爲一談。（一物而兩面。）此等思想，中國古代亦已有之。其分人性爲仁、義、禮、智、信五端，以配木、金、火、水、土五行是也。周子亦沿其說。思想淺薄之時，恆以爲善惡二者，其實本異。迨其稍進，乃知所謂善惡者，其實實無不同。特其所施有當有不當耳。至此，則二元論進爲一元矣。周子之說亦如是。周子既沿舊說，以五性配五行，又摠

括之爲仁義兩端，以配陰陽。仁義二者，皆不可謂惡也。更進一步言之，陰陽同體而異用，仁義亦一物而二名。（視其所施而名之。）愆陰伏陽，特其用之有常有不當，而其本體（太極）初無所謂惡；則人之行爲，所以或失之剛，或失之柔者，亦不過其用之或有不當，而其本體初無所謂惡；此世界之本體，所以至善，亦人性之所以本善也。然則所謂善惡者，卽行爲當不當之謂而已。（不論其所施，而但論其行爲，則無所謂善惡。）世界之現象，自認識言之，無所謂靜也，祇見其動耳。然自理論言之，固可假設一與動相對之境，名之曰靜。本體既無所謂惡，所謂惡者，既皆出於用，則固可謂靜爲善，動爲惡。然則人而求善，亦惟求靜境而處之而已矣。（恢復本體。）然認識所及，惟是變動，所謂靜境，不可得也。乃進一步而爲之說曰：世界本體不可見，可見者惟現象，本體卽在現象之中。然則靜境亦不可得，靜卽在乎動之中。人之所求，亦曰動而不失其靜而已矣。（雖墮落現象界，而仍不離乎本體。）動而不失其靜者，用而不離乎體之謂也。用而不離乎體者，不失其天然之則之謂也。以幾何學譬之，所謂真是，惟有一點。此一點，卽人所當守之天則，卽至當之動，而周子之所謂中正也。然此一點非有體可得，仍在紛紜蕃變之中。蓋人之所爲，非以爲人，卽以爲我。爲人，仁也。爲我，義也。欲求於仁義之外，別有一既不爲人，又不爲我之行爲，卒不可得。然則欲求中正，惟有卽仁義之施，無不當者求之。而欲求仁義，亦必毋忘中正而後可。否則不當仁而仁，卽爲不仁；不當義而義，卽爲不義矣。故仁義同實而

異名，猶之陰陽同體而異用。陰陽之體，所謂太極者，惟有假名，更無實體。仁義之體，所謂中正者亦然也。然則所謂善者，即仁義之施無不當者也。施無不當，則雖動而不離其宗。雖動而不離其宗，則動如未動。動如未動，固可以謂之靜，此則周子之所謂靜也。此爲道德之極致，故命之曰「人極」。能循此，則全與天然之則合，所謂「聖人與天地合其德，與日月合其明，與四時合其序，與鬼神合其吉凶」也。能循此者，必獲自然之福；而不然者，則必遇自然之禍。所謂「君子修之吉，小人悖之凶」也。此以行爲言也。若以知識言，則現象之紛紜蕃變，不外乎陰陽五行；陰陽五行，又不離乎太極。能明此理，則於一切現象，無不通貫矣。所謂「原始要終，故知死生之說」也。周子蓋由易悟入，亦自以爲祖述易說，故於篇末贊之曰：「大哉易也，斯其至矣」也。

太極圖說雖寥寥數百言，然於世界之由來，及人所以自處之道，無不備，其說可謂簡而該。宜朱子以爲「根極領要，天理之微，人倫之著，事物之衆，鬼神之幽，莫不洞然，畢貫於一」也。

太極圖說，推本天道以言人事，通書則專言人事，然其理仍相通。故朱子以爲廢太極圖說，則通書無所總攝也。太極圖說所言自然界之理，通書名之曰「誠」。一誠者，眞實無妄之謂。自然界之事，未有不眞實者也。故曰「大哉乾元，萬物資始，誠之原也。乾道變化，各正性命，誠斯立焉」。自然界之現象，見其如此，即係如此，更無不如此者之可言，是爲誠。自然界之現象，人所認識者，爲變動不居；從古以來，未嘗見其不動；則動即自

然界之本相也。然則誠與「動」一物也。故曰：「至誠則動，動則變，變則化。」聖人當與天地合其德，通書以誠稱自然界，故亦以誠爲聖人之德，曰：「聖，誠而已矣。」人之所知，止於現象。然自理論言之，固可假說一實體界，以與動相對。誠既皆屬現象，固可謂由動而生，則動最當慎。此由靜至動之境，（卽自實體界入現象界。）周子名之曰「幾」。所謂「動而未形，有無之間」也。本體無善惡可言，動則有善惡矣。故曰：「誠無爲，幾善惡。」又曰：「吉凶悔吝生乎動，吉一而已，可不慎乎」也。

動之循乎當然之道者爲善，不循乎當然之道者爲惡。循乎當然之道者，動而不失其則者也，所謂誠也。不循乎當然之道者，動而背乎真實之理者也，所謂「妄」也。（如人四體之動，順乎生理者爲誠，逆乎生理者爲妄。）人之動作，貴合乎天然之理，故當祛其妄而復其誠。故曰：「誠，復其本善之動而已矣。不善之動，妄也。妄復則無妄矣。無妄則誠矣。」

本善之動爲道。道之名，自人所當循之路言之也。自其畜於身，見於事爲者言之，則曰德。德也，道也，二名一實，特所從言之者異耳。德之目，周子亦如古說，分爲仁、義、禮、智、信，而又以仁義二端總括之。禮者，所以行之而備其條理。智者，所以知之。信者，所以守之。而所行，所知，所守，則仍不外乎仁義。故曰：「聖人之道，仁義中正而已矣。」其說全與太極圖說合。

人性之有仁義，猶天道之有陰陽，地道之有剛柔，其本體皆不可謂之惡也。故世界本無所謂善，協乎兩者之中而已矣。亦無所謂惡，偏乎兩者中之一而已矣。故曰：「性者，剛、柔、善、惡，中而已矣。」（見諸事乃可云仁義。此但就性言，故曰剛柔。）剛善爲義，爲直，爲斷，爲嚴毅，爲幹固。惡爲猛，爲隘，爲彊梁。柔善爲慈，爲順，爲巽。惡爲懦弱，爲無斷，爲邪佞。」義也，直也，斷也，嚴毅也，幹固也，非實有其體也。剛之發而得其當焉者也。猛也，隘也，彊梁也，亦非實有其體也。剛之發焉而不得其當者也。柔之善惡視此。然則天下信無所謂善惡，惟有中不中而已。故曰：「惟中也者和也，中節也，天下之達道也，聖人之事也。」故聖人立教，俾人自易其惡，自至其中而止矣。」

然則人何以自易其惡而止於中哉？逐事檢點，固已不勝其勞。抑且未知何者謂之中，自亦無從知何者謂之偏。苟能知何者謂之中，則但謹守此中焉足矣。夫人之本體，本能止於中者也。所以失其中者，以其有不當之動也。不當之動，始萌於欲，而終著於事爲者也。人能無欲，則自無不當之動矣。無欲，所謂靜也，亦所謂一也。無欲則動無不當矣。動無不當，則不離乎當然之境而謂之靜，非謂寂然不動，若槁木死灰也。（通書曰：「動而無靜，靜而無動，物也。動而無動，靜而無靜，神也。動而無動，靜而無靜，非不動不靜也。」此之謂也。）故曰：「聖可學乎？」曰：「可。」有要乎？曰：「有。」請問焉。曰：「一爲要。」一者，無欲之謂也。無欲則靜虛動直。靜虛則明，明則通。動直則公。

公則溥。明通公溥，庶幾乎！夫人之所求，動直而已；而動直之本，在於靜虛；此太極圖說，所以謂「聖人以主靜立人極」也。故「主靜」實周子之學脈也。

中者，當然之則而已矣。當然之則，非人人所能知之也。必先求知之，然後能守之。求而知之者，智識問題。既知之，又求行之，則行爲問題也。周子爲理學開山，但發明其理於修爲之方，尙未及詳，故注重於思。通書曰：「無思而無不通爲聖人。不思則不能通微，不容則不能無不通。是則無不通生於通微，通微生於思。是故思者，聖功之本，而吉凶之幾」是也。程朱格物窮理之說，蓋本諸此。

以上所言，皆淑身之術也。然一種新哲學之人生觀，固不當止於淑身，而必兼能淑世。故曰：「志伊尹之所志，學顏子之所學。」噫！周子之言，內外本末，亦可以謂之兼備矣哉！

周子之說，雖自成爲一種哲學，然其源之出於道家，則似無可諱。黃晦木太極圖辯曰：「周子太極圖，創自河上公，乃方士修煉之術也。河上公本圖，名無極圖。魏伯陽得之，以著參同契。鍾離權得之，以授呂洞賓。洞賓後與陳圖南同隱華山，而以授陳。陳刻之華山石壁。陳又得先天圖於麻衣道者。（宋時有所謂正易心法者，託之麻衣道者，謂爲希夷之學所自出，實則南宋時戴師愈之所僞也。見朱子書麻衣心易後，再跋麻衣易說後。）皆以授種放。放以授程脩與僧壽涯。修以先天圖授李挺之。挺之以授邵天叟。天叟以授子堯夫。修以

無極圖授周子。周子又得先天地之偈於壽涯。（鬼公武謂周子師事鶴林寺僧壽涯，得其「有物先天地，無形本寂寥，能爲萬象主，不逐四時彫」之偈。劉靜修記太極圖說後曰：「或謂周子與胡宿、邵古，同事潤州一浮屠，而傳其易書。」所謂潤州浮屠，即壽涯也。）其圖自下而上，以明逆則成丹之法。其重在水火。火性炎上，逆之使下，則火不燥烈，惟溫養而和燠。水性潤下，逆之使上，則水不卑溼，惟滋養而光澤。滋養之至，接續而不已。溫養之至，堅固而不敗。其最下圈名爲玄牝之門。玄牝即谷神。牝者，竅也。谷者，虛也。指人身命門兩腎空隙之處，氣之所由生，是爲祖氣。凡人五官百骸之運用知覺，皆根於此。於是提其祖氣，上升爲稍上一圈，名爲鍊精化氣，鍊氣化神。鍊有形之精，化爲微芒之氣；鍊依希呼吸之氣，化爲出有入無之神。使貫徹於五藏六府，而爲中層之左木火、右金水、中土相聯絡之一圈，名爲五氣朝元。行之而得也，則水火交媾而爲孕。又其上中分黑白而相間雜之一圈，名爲取坎填離，乃成聖胎。又使復還於無始，而爲最上之一圈，名爲鍊神還虛，復歸無極。而功用至矣。周子得此圖，而顛倒其序，更易其名，附於大易，以爲儒者之秘傳。蓋方士之訣，在逆而成丹，故從下而上。周子之意，以順而生人，故從上而下。太虛無有，有必本無，乃更最上圈鍊神還虛，復歸無極之名曰無極而太極。太虛之中，脈絡分辨，指之爲理，乃更其次圈取坎填離之名曰陽動陰靜。氣生於理，名爲氣質之性，乃更第三圈五氣朝元之名曰五行各一性。理氣既具，而形質呈，得其全者靈者爲人，人有男女，乃更第四


圈鍊精化氣，鍊氣化神之名曰乾道成男，坤道成女。得其偏者，益者爲萬物，乃更最下圈玄牝之名曰萬物化生。」案參同契有水火匡廓及三五至精兩圖，卽周子太極圖之第二第三圈也。胡臚明易圖明辨曰：「唐真



水火匡廓圖，又名水火二用

圖。坎離二卦，運爲一軸。中一

○爲坎離之胎。



三五至精圖。

土，火，木，水，金，合而歸於一元。

一元，謂下一○也。

玄妙經品有太極先天圖，合三輪五行爲一，而以三輪中一○，五行下一○爲太極。又加以陰靜陽動，男女萬物之象，凡四大○。陰靜在三輪之上，陽動在三輪之下。（三輪左離右坎，水火既濟之象。二○上陰下陽，天地交泰之象。鼎器歌云：「陰在上，陽下奔，卽此義也。」男女萬物，皆在五行之下。與宋紹興甲寅朱震在經筵所進周子太極圖正同。今性理大全所載，以三輪之左爲陽動，右爲陰靜，而虛其上下二○，以爲大極，乃後人所改，非其舊也。」其說與晦木，又有異同。蓋在道家，此圖亦非一本也。然太極圖之原出道家，則無疑矣。然此不過借用其圖，其用意則固大異也。

朱陸無極太極之辯，亦爲理學家一重公案。案此說似陸子誤也。通書與太極圖說，實相貫通，已如前說。而梭山謂「太極圖說與通書不類，疑非周子所爲，否則其學未成時作，又或傳他人之文，後人不辨。」似於周子之學，知之未審。象山謂無極二字，出老子知其雄章，以引用二氏之言爲罪案，此實宋儒習氣。理之不同者，雖措語相同，而不害其爲異。理之不易者，凡古今中外，皆不能不從同。安得撫拾字面，以爲非難乎？（象山又謂「二程言論文字至多，亦未嘗一及無極字。」案卽就字面論，儒家用無極二字者，亦不但周子。黃百家曰：「柳子厚曰：無極之極。邵康節曰：無極之前，陰含陽也。有極之後，陽分陰也。是周子之前，已有無極之說。」若謂「繫辭言神無方矣，豈可言無神？言易無體矣，豈可言無易？」則繫辭乃就宇宙自然之力，無乎不在言之。周子之言，則謂世界本體，無從追原其所自始。其所言者，固異物也。無極而太極，猶佛家言「無始以來，」言「法爾而有」耳。必責作繫辭傳者，推原神與易所自始，彼亦祇得云無從說起矣。安得拘泥字面，而疑周子所謂無極而太極者，乃謂有生於無，落「斷空」之見哉？朱子曰：「無極而太極，猶曰莫之爲而爲，莫之致而至。乃語勢當然，非謂別有一物也。」又曰：「無極二字，乃周子令後之學者，瞭然見太極之妙，不屬有無，不落方體。」可謂能得周子之意矣。故無極而太極之辯，實陸子誤會文義，以辭害意也。又陸子謂「一陰一陽，卽是形而上者」，朱子則謂「一陰一陽，屬於形器，所以一陰一陽者，乃道理之所爲」，亦爲兩家一爭端。案

此說兩家所見本同，而立言未明，遂生辯難。蓋陸子之意：以爲人之所知，止於現象。現象之外，不得謂更有本體其物，爲之統馭。朱子之意：謂現象之然，雖不必有使之然者；然自理論言之，有其然，即可謂有其所以然。固不妨假立一名，名之曰道，而以現象爲形器。陸子疑朱子謂本體實有其物，立於現象之外，遂生辯難。若知朱子所謂道者，乃係就人之觀念，虛立一名，而非謂實有其物，則辯難可以無庸矣。陸子曰：「一直以陰陽爲形器，而不得爲道，尤不敢開命。易之爲道，一陰一陽而已。先後，始終，動靜，晦明，上下，進退，往來，闔闢，盈虛，消長，尊卑，貴賤，表裏，隱顯，向背，順逆，存亡，得喪，出入，行藏，何適而非一陰一陽哉？奇耦相尋，變化無窮，故曰其爲道也屢遷。」朱子曰：「若以陰陽爲形而上者，則形而下者，復是何物？熹則曰：凡有形有象者皆器也，其所以爲是器之理則道也。如是，則來書所謂始終，晦明，奇耦之屬，皆陰陽所爲之形器。獨其所以爲是器之理，乃爲道耳。」此則謂現象之所以然，雖不可知，然自理論言之，不得不分爲兩層：名其然曰器，名其所以然曰道也。此特立言之異，其意固不甚懸殊也。（朱陸辯論之辭甚多，除此節所舉兩端外，皆無甚關係，故今不之及。）○朱子論道與形器之說，須與其論理氣之說參看。○又案太極兩儀等，皆抽象之名，由人之觀念而立。後人或誤謂實有其物，遂生櫻耦。許白雲曰：「太極，陰陽，五行之生，非如母之生子，而母子各具其形也。太極生陰陽，而太極即具陰陽之中。陰陽生五行，而太極陰陽，又具五行之中。安能相離也？何不即五行一陰陽，陰陽一太極之說？」


觀之乎？」其言最爲明析。昔之講哲學者，不知有認識論，此太極、陰陽、理氣等說，所以輕輻不清也。

篇五 康節之學

北宋理學家，周程張邵同時並生。其中惟邵子之學，偏於言數。我國所謂數術者，爲古代一種物質之學，前已言之。邵子之惜，亦不外此。其觀物篇謂「天使我如是謂之命，命之在我謂之性，性之在物謂之理。」又謂「數起於質，天下之數出於理」是也。（人性即精神現象，物理即物質現象，邵子以爲二者是一。「數起於質」者，如謂筋肉發達至何種程度，即能舉何種重量；筋力衰弛，則舉重之力亦減是也。何以筋肉發達，即能舉重，衰弛即不能？此則所謂「數出於理」之理，此理不可知。所謂「天之象數，可得而推，其神用不可得而測」也。

邵子之學，亦以易爲根據。其所謂易者，亦出於陳搏。（朱震經筵表謂陳搏以先天圖傳種放，放傳穆脩，脩傳李之才，之才傳邵雍。）蓋亦道家之學也。其先天次序，卦位圖如左：

八卦次序圖，最下一層爲太極。其上爲兩儀。又其上爲四象。又其上爲八卦。其序則乾一、兌二、離三、震四、巽五、坎六、艮七、坤八是也。以圖之白處，代易之一畫；黑處代易之一畫。是爲一分爲二，二分爲四，四分爲八。如



是推之，八分爲十六，十六分爲三十二，三十二分爲六十四，卽成伏羲先天六十四卦橫圖。以六十四卦規而圓之，則成圓圖；割而疊之，則成方圖。圓圖以象天，方圖以象地也。



八卦方位，見易「帝出乎震」一節。與大乙行九宮之說合，見第二篇。據其說，則離南、坎北、震東、兌西、乾西北、坤西南、艮東北、巽東南。邵子以爲後天卦位，爲文王所改。而云：此圖爲先天方位，爲伏羲所定。其根據，爲易「天地定位」一節。爲之說者，謂此先天方位，「天位乎上，地位乎下，日生於東，月生於西，山鎮西北，澤注東南，風起西南，雷動東北，自然與天地造化合」也。

邵子之學，亦以陰陽二端，解釋世界；而名陰陽之原爲太極。其經世衍易圖所謂「一動一靜之間」者也。觀物內篇云：「一動一

太柔	太剛	少柔	少剛	少陰	少陽	太陰	太陽
柔		剛		陰		陽	
靜 一				動 一			

一動一靜之間


生焉。一陰陽之中，復有陰陽；剛柔之中，復分剛柔，故各分爲太少。太陽爲日，太陰爲月，少陽爲星，少陰爲辰；此天之體也。太柔爲水，太剛爲火，少柔爲土，少剛爲石；此地之體也。日爲暑，月爲寒，星爲晝，辰爲夜，此天之變也。水爲雨，火爲風，土爲露，石爲雷，此地之化也。暑變物之性，寒變物之情，晝變物之形，夜變物之體，此動植之感。而變者也。雨化物之走，風化物之飛，露化物之草，雷化物之木，此動植之應地之化者也。推之一切，莫不皆然。其圖如左：

邵子之說，皆由博觀物理而得。試問天何以取日月星辰爲四象？地何以取水火土石爲四體？曰：「陽燧取於日而得火，火與日一體也。」方諸取於月而得水，水與月一體也。」星隕而爲石，石與星一體也。」日月

靜者，天地之至妙者歟？一動一靜之間者，天地人之至妙者歟？即指太極言之也。邵子謂「天生於動，地生於靜。」動之始則陽生焉，動之極則陰生焉。

靜之始則柔生焉，靜之極則剛

太陽	太陰	少陽	少陰	少剛	少柔	太剛	太柔
日	月	星	辰	石	土	火	水
暑	寒	晝	夜	雷	露	風	雨
性	情	形	體	木	草	飛	走
目	耳	鼻	口	氣	味	色	聲
元	會	運	世	歲	月	日	時
皇	王	帝	霸	易	書	詩	春秋



星之外，高而蒼蒼者皆辰，水火石之外，廣而厚者皆土，辰與土一體也。」何以不用五行，而別取水火土石曰：「木生於土，金出於石，水火木金土者後天，水火土石者先天。後天由先天出，一以體言，一以用言也。」（邵伯溫觀物內篇注。案此實以五行之說爲不安而改之耳，不欲直斥古人以駭俗，乃立先後天之名以闡停之。

其八卦之說，亦猶是也。故邵子之說，實可謂自有所得，非全憑藉古人者。日爲暑，月爲寒，星爲晝，辰爲夜，其理易明。水爲雨，火爲風，土爲露，石爲雷者，邵子曰：「其氣之所化也。」暑變物之性，寒變物之情，晝變物之形，夜變物之體者，邵子以動者爲性，靜者爲體。謂「陽以陰爲體，陰以陽爲性」。陽能知而陰不能知，（人死則無知者，性與體離也。）陽能見而陰不能見。『能知能見者爲有，故陽性有而陰性無。』陽有所不徧，而陰無所不徧。陽有去而陰常居。『邵子之意，凡知覺所及皆陽，出於知覺之外者皆陰。』無不徧而常居者爲實，故陰體實而陽體虛。性公而明，情徧而暗。公而明者屬陽，（陽動故公，能見故明。陰常居故徧，不能見故暗。）故變於暑。徧而暗者屬陰，故變於寒。形可見，故變於晝。體屬陰，故變於夜也。（以上皆據觀物內外篇。○邵子言哲理之作，爲觀物內外篇及漁樵問答。漁樵問答，理甚膚淺，或云僞物，蓋信。）其餘一切，皆可以是推之。此等見解，今日觀之，誠不足信。然在當日，則其觀察，可謂普徧於庶物，而不徧於社會現象者矣。中國數術之家，所就雖不足觀，然研究物質現象於舉世莫或措意之日，要不可謂非豪傑之士也。（邵子之學，二程頗不以爲然。晁以道云：「伊川與邵子，居同里巷，三十餘年，世間事無所不問，惟未嘗一字及數。一日雷起，邵子謂伊川曰：子知雷起處乎？」伊川曰：「某知之，堯夫不知也。」邵子愕然曰：「何謂也？」曰：「既知之，安用數推之？以其不知，故待推而知。」是邵子之數學，伊川頗不然之矣。明道云：「堯夫欲傳數學於某兄弟，某兄弟那得工夫要學，須是二

十年工夫。」雖不如伊川謂不待數推而知，亦以數爲非所急矣。朱子曰：「伊川之學，於大體上警激，於小小節目上，猶有疏處。康節能盡得事物之變，却於大體有未盡處。」夫使如心學者流，謂直證本體，卽萬事皆了，則誠無事於小節目上推。若如程朱之說，「人心之靈，莫不有知。天下之物，莫不有理。惟於理有未窮，故其知有不盡。」則一物之格未周，卽致知之功有歉。卽子所用之法，固不容輕議也。）

邵子本陰陽剛柔變化之見，用數以推測萬物之數。其法：以陽剛之體數爲十，陰柔之體數爲十二。故太陽、少陽、太剛、少剛之數凡四十；太陰、少陰、太柔、少柔之數凡四十八。以四因之，則陽剛之數凡一百六十；陰柔之數凡一百九十二。於一百六十中，減陰柔之體數四十八，得一百十二，爲陽剛之用數。於一百九十二中，減陽剛之體數四十，得一百五十二，爲陰柔之用數。以一百五十二，因一百十二，是爲以陽用數，唱陰用數；爲日月星辰之變數；其數凡一萬七千有二十四，謂之動數。以一百十二，因一百五十二，是爲以陰用數，和陽用數，是爲水火土石之化數；其數亦一萬七千有二十四，謂之植數。再以動數植數相因，（卽以一萬七千二十四，因一萬七千二十四。）謂之動植通數；是爲萬物之數。（求萬物之數，不本之實驗，而虛立一數以推之，亦物質科學未明時不得已之法也。）○易用九六，經世用十二。皆以四因之。易之數：陽用九，以四因之，得三十六，爲乾一爻之策數。陰用六，以四因之，得二十四，爲坤一爻之策數。以六因三十六，得二百一十六，爲乾一卦策

數。以六因二十四，得一百四十四，爲坤一卦策數。相加得三百六十，故曰：「乾坤之策，凡三百六十也。」以三十二因二百一十六，得六千九百一十二，爲三十二陽卦之策數。以三十二因一百四十四，得四千六百有八，爲三十二陰卦之策數。二者相加，得萬有一千五百二十，所謂「二篇之策，萬有一千五百二十」也。

邵子之推萬物如此。至於人，則邵子以爲萬物之靈。蔡西山嘗推邵子之意曰：「萬物感於天之變，性者善目，情者善耳，形者善鼻，體者善口。萬物應於地之化，飛者善色，走者善聲，木者善氣，草者善味。人則得天地之全。暑寒晝夜無不變，雨風露雷無不化，性情形體無不感，走飛草木無不應。目善萬物之色，耳善萬物之聲，鼻善萬物之氣，口善萬物之味。蓋天地萬物，皆陰陽剛柔之分，人則兼備乎陰陽剛柔，故靈於萬物，而能與天地參也。」其言最爲簡約明瞭。觀物內篇曰：「人之所以靈於萬物者，謂其目能收萬物之色，耳能收萬物之聲，鼻能收萬物之氣，口能收萬物之味。人亦物也，一物當兆物。聖亦人也，一人當兆人。是知人也者，物之至者也。聖也者，人之至者也。」又曰：人之至者，謂其能以「一心觀萬心，一身觀萬身，一世觀萬世。」如是，則能「上識天時，下盡地理，中盡物情，通照人事。」則能以「心代天意，口代天言，手代天工，身代天事。」蓋明乎宇宙之理，則措施無不當。（參看第一篇。）宇宙之理，邵子之所謂物理也。（此物字所該甚廣。能觀者我，我所觀者，一切皆物。）邵子謂人爲萬物之靈，以其能通物理，謂聖人爲人之至，以其能盡通物理而無遺也。

元會運世，歲月日時，乃邵子稽數以推測宇宙之變化者。其見解與揚子太玄等同，特其所用之數異耳。其法：以日經天之元，月經天之會，星經天之運，辰經天之世。日之數一，象一日也。月之數十二，象十二月也。星之數三百六十，象一年之日數也。辰之數四千三百二十，一日十二時，則三百六十日，得四千三百二十時也。一世三十年，凡十二萬九千六百年，是爲皇極經世一元之數。注曰：「一元在大化之間，猶一年也。」更以日月星辰四者，經日月星辰四者，則其數如左：

以日經日	元之元	一
以日經月	元之會	一二
以日經星	元之運	三六〇
以日經辰	元之世	四三二〇
以月經日	會之元	一二
以月經月	會之會	一四四
以月經星	會之運	四三二〇
以月經辰	會之世	五一八四〇

以星經日

運之元

三六〇

以星經月

運之會

四三二〇

以星經星

運之運

一二九六〇〇

以星經辰

運之世

一五五五二〇〇

以辰經日

世之元

四三二〇

以辰經月

世之會

五一八四〇

以辰經星

世之運

一五五五二〇〇

以辰經辰

世之世

一八六六二四〇〇

至此而後數窮焉。注曰：「窮則變，變則生生而不窮也。」皇極經世，但著一元之數，使人引而伸之，可至於終而復始也。此等思想，蓋以爲宇宙現象，一切周而復始，特其數悠久而非人之所能知，乃欲藉其循環之近者，以推測其遠者耳。（說詳第二篇。）朱子曰：「小者大之影，只晝夜便可見，」即此思想也。

此等數術，其可信與否，渺不可知。即著此等書者，亦未必以爲必可信，特以大化悠久，爲經驗所不及，不得不藉是以推測之耳。彼其信數可以推測宇宙者，以其深信「數起於質」一語也。此等數術家，視宇宙之

間，無非物質；而物質運動，各有定律，是爲彼輩所謂「數」。物質運動，既必循乎定律而不能違，則洞明物理者，固可以豫燭將來之變，此其所以深信發明真理，在乎「觀物」也。然今之所謂科學者，乃將宇宙現象，分爲若干部而研究之。研究愈精，分析愈細，謂其能知一部現象之原因結果則可。謂其能明乎全宇宙之現象，因以推測其將來，微論有所不能，并亦無人敢作此妄想也。然昔之治學問者，所求知者，實爲全宇宙之將來。夫欲知全宇宙之將來，非盡明乎全宇宙之現在不可。全宇宙之現在，固非人所能知。夫全宇宙之現在，數術家所謂「質」也。全宇宙之將來，數術家所謂「數」也。明乎質，固可以知數。今也無從知全宇宙之質，而欲據一部分之質，以逆測其餘之質，以推得全宇宙之數焉，孰能保其必確？故彼輩雖據一種數以推測，彼輩亦未必自信也。此所以數術之家，各有其所據之數，而不相襲也。（無從推測之事，姑立一法以推測之而已。）

然則術數家之所謂術數，在彼亦並不自信，而世之迷信術數者，顧據昔人所造之數，謂真足以推測事變焉，則惑矣。卽子曰：「天下之數出於理。違乎理，則入於術。世人以數而入術，則失於理。」此所謂術，謂私智穿鑿，強謂爲可以逆測將來之術。所謂理，則事物因果必至之符。惟入於術，故失於理。卽子之說如此，此其所以究爲一哲學家，而非迷信者流也。

術數家所用之數，固係姑以此爲推，未必謂其果可用。假使其所用之數，果能推測宇宙之變化，遂能盡

洩宇宙之祕奧乎？仍不能也。何也？所用之數，而真能推測宇宙之變化，亦不過盡知宇宙之質，而能盡知其未來之數耳。宇宙間何以有是質？質之數何以必如是？仍不可知也。故曰：「天之象數，可得而推。如其神用，則不可得而測。」此猶物理學家言：某物之理如何？可得而知也。何以有是物？何以有是理？不可得而知也。又曰：「道與一，神之強名也。以神爲神者，至言也。」此猶言宇宙之祕奧，終不可知；以不可知說宇宙，乃最的當之論也。此邵子之所以終爲一哲學家，而非迷信者流也。

皇王帝霸，易書詩春秋，乃邵子應世運之變，而謂治法當如是變易者。觀物內篇曰：「昊天之盡物，聖人之盡民，皆有四府焉。昊天之四府，春夏秋冬之謂也；陰陽升降於其間矣。聖人之四府，易書詩春秋之謂也；禮樂隆污於其間矣。」是也。

邵子求知真理之法，由於觀物。其觀物之法，果何如乎？曰：邵子之觀物，在於求真；其求真之法，則貴乎無我。觀物內篇曰：「所謂觀物者，非以目觀之也；非觀之以目，而觀之以心也；非觀之以心，而觀之以理也。聖人之所以能一萬物之情者，謂能反觀也。反觀者，不以我觀物，以物觀物之謂也。」行篇曰：「物理之學，或有所不通，不可以強通。強通則有我，有我則失理而入於術矣。」以物觀物，謂純任物理之真，而不雜以好惡之情，穿鑿之見，即今所謂客觀；有我則流於主觀矣。

宇宙之原理，邵子名之曰道。雖以爲不可知，然極尊崇之。故曰：「天由道而生，地由道而成，人物由道而行。天地人物則異，其由於道則一也。」道之所以然不可知，其然則無不可知。所以知之，觀物而得其理而已。故曰：「道也者，道無形，行之則見於事矣。」又曰：「以天地觀萬物，則萬物爲物。以道觀天地，則天地亦爲物。道之道，盡於天矣。天之道，盡於地矣。地之道，盡於物矣。天地萬物之道，盡於人矣。」（天地之道盡於物，卽理具於事，事外無理之謂。天地萬物之道盡於人，謂一切生於人心，無人，則無天地萬物，更無論天地萬物之理矣。）人能知天地萬物之道所以盡於人者，然後能盡民也。天之能盡物，則謂之昊天。人之能盡民，則謂之聖人。此道之所以可貴也。（邵子曰：「道爲太極。」又曰：「心爲太極。」卽「天地萬物之道盡於人」之說。）

世界之真原因惟一，而人之所知，則限於二。此非世界之本體有二，而人之認識自如此也。此理邵子亦言之。其說曰：「本一氣也，生則爲陽，消則爲陰，故二者一而已矣。是以言天而不言地，言君而不言臣，言父而不言子，言夫而不言婦。然天得地而萬物生，君得臣而萬化行，父得子，夫得婦而家道成。故有一則有二，有二則有四，有三則有六，有四則有八。」言天而不言地，云云，謂世之所謂二者，其實則一，特自人觀之，則見爲二耳。「有一則有二，有二則有四，」自此推之，則世界現象，極之億兆京垓，其實一也。朱子所謂一本萬殊，萬

殊一本，卽此理。

世界之本體惟一，而人恆見爲二者，以其動也。動則入現象界矣。入現象界，則有二之可言矣。故曰：「自下而上謂之升，自上而下謂之降。升者，生也。降者，消也。故陽生於下而陰生於上。是以萬物皆反。陰生陽，陽生陰，是以循環而不窮也。」人所知之現象，不外陰陽兩端。而陰陽之變化，實仍一氣之升降。降而升，則謂之陽升而降，則謂之陰耳。然則世界之本體果惟一，而所謂陰陽者，亦人所強立之二名耳。其實則非有二也。此論與張橫渠若合符節。


世界之現象，人既爲之分立陰陽剛柔等名目，至於本體，則非認識所及。非認識所及，則無可名。無可名而強爲之名，則曰「神」。邵子曰：「氣一而已，主之者神也。神亦一而已，乘氣而變化。能出入於有無生死之間，無方而不測者也。」又曰：「潛天潛地，不爲陰陽所攝者，神也。」又曰：「氣者，神之宅也。體者，氣之宅也。氣則養性，性則乘氣。故氣存則性存，性動則氣動也。」出入於有無生死之間，不爲陰陽所攝，「言其通乎陰陽也。通乎陰陽，則惟一之謂也。」潛天潛地，不行而至，「言其無所不在也。無所不在，則惟一之謂也。然又云：「神乘氣而變化，」氣者神之宅，體者氣之宅，」則形體卽氣，氣卽神，非物質之外，別有所謂神者在也。故邵子之論，亦今哲學家所謂汎神論也。

邵子曰：人能盡物，則謂之聖人。所謂盡物者，謂其能盡通乎物理也。人所以能通乎物理者，以人與物本是一也。故曰：「神無所在，無所不在。至人與他心通者，以其本一也。」


邵子之學，一言蔽之曰：觀察物理而已。其觀物外篇中，推論物理之言頗多。雖多不足據，（如云：「動者體衡，植者體縱，人宜衡而反縱。」以是爲人所以異於動物。又云：「指節可以觀天，掌文可以察地。」又曰：「天之神棲於日，人之神棲於目。人之神，寢則棲心，寐則棲腎，所以象天也。」以是比擬天人，自今日觀之，俱覺可笑。）然在當日，自不失爲一種推論也。夫推論物理，極其所至，亦不過明於事物之原理而已。何益？曰：不然，果能明於事物之理，則人之所以自處者，自可不煩言而解。其道惟何？亦曰：「循理」而已。宇宙之原理，天則也。發見宇宙之原理而遵守之，則所謂循理者也。故程朱循理之說，亦與邵子之學相通也。觀物內外篇中，論循理之言頗多。如曰：「自然而然者，天也。惟聖人能索之。效法者人也。若時行時止，雖人也亦天。」劉絢問無爲。對曰：時然後言，人不厭其言；時然後笑，人不厭其笑；時然後取，人不厭其取。此所謂無爲也。（此與周子「非不動爲靜，不妄動爲靜」之意同。）皆是循理之要，在於無我。故曰：「以物觀物，性也。以我觀物，情也。性公而明，情偏而暗。」又曰：「任我則情，情則蔽，蔽則昏矣。因物則性，性則神，神則明矣。」又曰：「以物喜物，以物悲物，此發而中節者也。」又曰：「時然後言，乃應變而言，不在我也。」又曰：「不我物，則能物物。」又曰：「易地

而處，則無我。」夫人我何以不可分？以其本不可分也。人我何以本不可分？以其本是一也。何以本一？曰：神爲之也。故曰：「形可分，神不可分。木結實而人種之，又成是木，而結是實。木非舊木也，此木之神不二也。此實生

生之理也。」又曰：「人之神，則天地之神。人之自歎，所以歎天地，可不慎哉！」此邵子本其哲學，所建立之人生觀也。




先天地圖，亦曰太極圖。後人謂之天地自然之圖，又謂之太極圖。



古太極圖

邵子之學，其原亦出於道家。宋時有所謂先天圖及古太極圖者。先天圖見趙撝謙（撝謙，字古則，餘姚人。宋宗室，別號古老先生。名山藏作趙謙。云洪武初聘修正韻。）六書本義云：此圖世傳蔡元定得之蜀隱者，祕而不傳。雖朱子亦莫之見。今得之陳伯敷氏。古太極圖，見趙仲全道學正宗。（蓋以濂溪有太極圖，故加古字以別之。）乃就先天圖界之爲八。宋濂曰：「新安羅端良願作陰陽相舍之象，就其中八分之，以爲八卦，開之河圖，用井父界分九宮，謂之洛書，言出青城隱者。」正卽此圖也。胡融明曰：此二圖，蓋合二用，三五（見前篇。）月體納甲，九宮，八卦而一之者。蓋就古太極圖所界分者而觀之，則上方之全白者卽乾，下方之全黑者

御坤。左方下白上黑，黑中復有一白點者當離。右方下黑上白，白中復有一黑點者當坎。乾之左，下二分白，上一分黑者爲兌。其右，下一分黑，上二分白者爲巽。坤之左，下一分白，上二分黑者爲震。其右，下二分黑，上一分白者爲艮。所謂與八卦相合也。八卦分列八方，而圖其中爲太極，所謂與九宮相合也。（案全圖爲太極。左白



右黑相向互爲兩儀。白中有黑，黑中有白，合爲四象。界而分之，則成八卦。（月體納甲，出魏伯陽參同契。以月之明魄多少，取象於卦畫，而以所見之方爲所納之甲。震一陽始生，於月爲生明，三日月出於庚，故曰震納庚。謂一陽之氣納於西方之庚也。兌二陽爲上弦，八日月見於丁，故曰兌納丁。謂二陽之氣納於南方之丁也。乾純陽，望十五夕，盈於甲，故曰乾納甲。謂三陽之氣納於東方之甲也。此望前三候，陽息陰消之月象也。巽一陰始生，於月爲生魄。十六旦，明初退於辛，故曰巽納辛。謂以一陰之氣納於西方之辛也。退二陰爲下弦。二十三旦，明半消於丙，故曰艮納

丙。謂二陰之氣，納於南方之丙也。坤純陰爲晦。三十旦，明盡滅於乙，故曰坤滅乙。謂三陰之氣，納於東方之乙也。此望後三候，陽消陰息之象也。乾納甲而又納壬，坤納乙而又納癸者，謂乾之中畫，即太陰之精。望夕夜半，月當乾，納其氣於壬方。地中對月之日也。坤之中畫，即太陽之精。晦朔之間，日在坤，納其氣於癸方。地中合日之月也。徐敬可曰：「望夕之陽，既盈於甲矣，其夜半，日行至壬，而與月爲衡。月中原有陰魄，所謂離中一陰者，平時含蘊不出，至是流爲生陰之本，故其象爲⊙，即望夕夜半壬方之日也。晦旦之陽，既盡於乙矣，其夜半，日行至癸，而與月同躔。月中原有陽精，所謂坎中一陽者，平時胚渾不分，至是發爲生陽之本，故其象爲⊙，即晦朔間癸方之日也。離爲日，日生於東，故離位乎東。坎爲月，月生於西，故坎位乎西。至望夕，則日西月東，坎離易位。其離中一陰，即是月魄；坎中一陽，即是日光。東西正對，交位於中，此二用之氣，所以納戊己也。」此蓋仍方家修煉，注重坎離之故智。太極圖白中黑點，黑中白點，即其義也。胡氏謂：「此圖蓋真出希夷。儒者受之，自神放後，皆有所變通，恢廓，非復希夷之舊。惟蜀之隱者，爲得其本真。故朱子屬蔡季通入峽求之。」案朱子屬季通入峽，購得三圖，見袁氏楊謝仲直易三圖序。而其圖仍不傳。胡氏謂此必其一，未知信否。然謂邵子之學，原出此圖，則說頗近之。以此圖與先天次序卦位圖，若合符節也。此可見邵子之學，原出道家矣。黃黎洲易學象數論曰：「乾南坤北，實養生家大旨。謂人身本具天地，因水潤火炎，會易交易，變其本體，故令乾之中畫，損而

成離坤之中畫，塞而成坎。是後天使然。今有取坎填離之法：挹坎水一畫之奇，歸離火一畫之耦。如鍊精化氣，鍊氣化神之類，益其所不足，離得固有也。鑿竅裏魄，五色五聲五味之類，損其所有餘，坎去本無也。離復返爲乾，坎復返爲坤，乃先天之南北也。養生所重，專在水火，比之天地。既以南北置乾坤，坎離不得不就東西。尤可見道家之說所自來。然邵子之學，自與養生家異。用其圖作藍本，亦猶周子之借用太極圖耳。不得以此遂輕邵子爲方士之流也。

篇六 橫渠之學

周、程、張、邵五子中，惟邵子之學，偏於言數。周、張、二程，則學問途轍，大抵相同。然伊川謂橫渠：「以大概氣象言之，有苦心極力之象，而無寬裕溫和之氣。非明睿所照，而考索至此，故意屢偏而言多窒。」朱子亦謂：「若論道理，他卻未熟。」後人之尊張，遂不如周程。然理學家中規模闊大，制行堅卓，實無如張子者。張子之學，合天地萬物爲一體，而歸結於仁。聞人有善，喜見顏色。見餓殍，輒咨嗟，對案不食者經日。嘗以爲欲致太平，必正經界。欲與學者買田一方試之。未果而卒。是真能以民胞物與爲懷者。其言曰：「學必如聖人而後已。知人而不知天，求爲賢而不求爲聖，此秦漢以來學者之大蔽。」又曰：「此道自孟子後，千有餘歲。若天不欲此道復

明，則不使今日有知者。既使人有知者，則必有復明之理。」其自任之重爲何如？又曰：「言有教，動有法。晝有爲，宵有得。息有養，瞬有存。」其自治之密爲何如？朱子謂：「橫渠說做工夫處，更精切似二程。」又謂：「橫渠之學，是苦心得之，乃是致曲，與伊川異。」則其克治之功，實不可誣也。朱子又曰：「明道之學，從容涵泳之味，治橫渠之學，苦心力索之功深。」又謂：「二程資稟，高明潔淨，不大段用工夫。橫渠資稟，有偏駁夾雜處，大段用工夫來。」似終右程而左張。此自宋儒好以聖賢氣象論人，故有此語。其實以規模闊大，制行堅卓論，有宋諸家，皆不及張子也。張子之言曰：「爲天地立心，爲生民立命，爲往聖繼絕學，爲萬世開太平。」此豈他人所能道哉？

橫渠之學，所以能合天地萬物爲一者，以其謂天地萬物之原質唯一也。此原質惟何？曰：氣是已。橫渠之言曰：「凡可狀皆有也，凡有皆象也，凡象皆氣也。」又曰：「太和所謂道，中涵浮沈、升降、動靜相感之性；是生絪縕相盪，勝負屈伸之始。其來也，幾微易簡，其究也，廣大堅固。散殊而可象爲氣，清通而不可象爲神。」神也，道也，氣也，一物而異名。宇宙之間，惟此而已。宇宙本體，亦此而已。

一非人所能識。宇宙本體，既惟是一氣，何以能入認識之域乎？以其恆動故也。宇宙之本體惟一，動則有絪縕相盪，勝負屈伸之可見，而入於現象界矣。故曰：「氣，塊然太虛。升降飛揚，未嘗止息。」又曰：「氣聚則離

明得施而有形，氣不聚則雖明不得施而無形。」（謂聚則可見，散則不可見也。不可見而已，非無。）又曰：「氣不能不聚而爲萬物，萬物不能不散而爲太虛。」（太虛卽氣之散而不可見者，非無。）夫如是，則所謂有無者，特人能認識不能認識，而非真有所謂有無。故曰：「氣之聚散於太虛，猶冰之凝釋於水。知太虛卽氣，則無無。聖人語性與天道之極，盡於參伍之神，變易而已。諸子淺妄，有有無之分，非窮理之學也。」（案諸子亦未嘗分有無爲二，此張子之誤。朱子謂：「濂溪之言有無，以有無爲一。老子之言有無，以有無爲二。五千言中，曷嘗有以有無爲二者耶？」）又云：「聖人仰觀俯察，但云知幽明之故，不云知有無之故。」所謂幽明，卽能認識不能認識之謂也。

知天下無所謂無，則生死之說，可不煩言而解。故曰：「氣之爲物，散入無形，適得吾體；聚爲有象，不失吾常。」（此言質力無增減。）「太虛不能無氣，氣不能不聚而爲萬物，萬物不能不散而爲太虛。循是出入，是皆不得已而然也。」（此言質力之變化，一切皆機械作用。）「彼語寂滅者，往而不反；（此闢佛之所謂寂滅者，實非如張子所聞。要之宋儒喜闢二氏，然於二氏之言，實未嘗真解。）徇生執有者，物而不化；（此闢流俗。）二者雖有間矣，以言乎失道則均焉。聚亦吾體，散亦吾體，知死之不可與言性矣。」（張子之意，個體有生，死，總體無所謂生死。個體之生死，則總體一部分之聚散而已。聚非有，散非無，故性不隨生死爲有無。故深闢

告子「生之爲性」之說，以爲「不通晝夜之道。」然告子之意，亦非如張子所闢，亦張子誤也。如張子之說，則死生可一。故曰：「盡性，然後知生無所得，則死無所喪。」

生死之疑既決，而鬼神之疑隨之。生死者，氣之聚散之名。鬼神者，氣之聚散之用也。張子之言曰：「鬼神者，往來屈伸之義。」又曰：「鬼神者，一氣之良能也。」蓋以往而屈者爲鬼，來而伸者爲神也。又詳言之曰：「動物本諸天，以呼吸爲聚散之漸。植物本諸地，以陰陽升降爲聚散之漸。物之初生，氣日至而滋息。物生既盈，氣日反而游散。至之爲神，以其伸也。反之爲鬼，以其歸也。」然則鬼神者，非人既死後之名，乃其方生方死，方生之時，自然界一種看似兩相反對之作用之名耳。然則鬼神者，終日與人不相離者也。然則人卽鬼神也。然則盈宇宙之間，皆鬼神也。此論至爲微妙。理學家之論鬼神，無能越斯旨者。

鬼神與人爲一體，則幽明似二而實一。幽明似二而實一，則隱微之間，不容不慎。故曰：「鬼神嘗不死，故誠不可揜。人有是心，在隱微，必乘間而見。故君子雖處幽獨，防亦不懈。」夫鬼神所以與人爲一體者，以天地萬物，本係一體也。故曰：「知性知天，則陰陽鬼神，皆吾分內耳。」此張子由其宇宙觀，以建立其人生觀者也。

宇宙之間，惟是一氣之運動。而自人觀之，則有兩端之相對。惟一者本體，兩端相對者現象也。故曰：「一

物而兩體，其太極之謂與？」又曰：「一物兩體，氣也。一故神，兩故化。」又曰：「兩不立，則一不可見。一不可見，則兩之用息。兩體者，虛實也，動靜也，聚散也，清濁也，其究一而已。」

所謂現象者，總括之爲陰陽兩端，細究之，則億兆京垓而未有已也。故曰：「游氣紛擾，合而成質者，生人物之萬殊。其陰陽兩端，循環不已者，立天地之大義。」又曰：「氣塊然太虛，升降飛揚，未嘗止息。浮而上者陽之清，降而下者陰之濁。其感遇聚散，爲風雨，爲霜雪，萬品之流形，山川之融結，精粕煖燼，無非數也。」（張子之學，雖與邵子異，然格物之功，亦未嘗後人。張子曰：「地純陰，凝聚於中。天浮陽，運旋於外。」又曰：「陰性凝聚，陽性發散。陰聚之，陽必散之。陽爲陰累，則相持爲雨而降。陰爲陽得，則飄揚爲雲而升。雲物班布太虛者，陰爲風驅，斂聚而未散者也。陰氣凝聚，陽在內者不得出，則奮擊而爲雷；在外者不得入，則周旋不舍而爲風。其聚有遠近虛實，故雷風有大小暴緩。和而散，則爲霜雪雨露；不和而散，則爲戾氣疔癘。」又曰：「聲者，形氣相軋而成。兩氣者，谷響雷聲之類。兩形者，桴鼓叩擊之類。形軋氣，羽扇敲矢之類。氣軋形，人聲笙簧之類。」皆其格物有得之言。自今日觀之，雖不足信，然亦可見其用心之深矣。○敲矢，莊子作嘯矢，卽鳴鏑，今響箭也。）

既知宇宙之間，惟有一氣，則一切現象，本來平等，無善惡之可言。然清虛者易於變化，則謂之善；重濁者難於變化，則謂之惡。又以寂然不動者爲主，紛紜變化者爲客。此等思想，哲學家多有之。蓋以靜爲本體，動爲

現象，本體不能謂之惡，凡惡皆止可歸諸現象界也。張子亦云：「太虛無形，氣之本體。其聚其散，變化之客形耳。至靜無感，性之淵源。有識有知，物交之客感耳。客感客形，與無感無形，惟盡性者能一之。」又曰：「太虛爲清，清則無礙，無礙故神。反清爲濁，濁則礙，礙則形。」又曰：「凡氣清則通，昏則壅，清極則神。」又曰：「凡天地法象，皆神化之糟粕。」蓋凡有形可見者，皆不足當本體之名也。

認識所及，莫非紛紜之現象也，何以知其爲客，而別有淵然而靜者爲之主？以其動必有反，而不差忒，如久客者之必歸其故鄉也。故曰：「天地之氣，雖聚散攻取百途，然其爲理也，順而不妄。」又曰：「天之不測謂之神，神之有常謂之天。」然則紛紜錯雜者現象，看似紛紜錯雜，而實有其不易之則者，本體也。現象之變化，不啻受制取於本體矣。故曰：「氣有陰陽，推行有漸爲化，合一不測爲神。」

張子之論天然如此。其論人，則原與天然界爲一物。蓋宇宙之間，以物質言，則惟有所謂氣，人固此氣之所成也。以性情言，則氣之可得而言者，惟有所謂浮沈升降，動靜相感之性，而此性卽人之性也。故人也者，以物質言，以精神言，皆與自然是「一非二也」。張子之言曰：「氣於人生而不離，死而游散者爲魂。聚成形質，雖死而不散者爲魄。」然則魂也者，卽清而上浮之氣。魄也者，卽濁而下降之氣也。又曰：「氣本之虛，則湛一無形。感而生，則聚而有象。有象斯有對，對必反其爲。有反斯有仇，仇必和而解。故愛惡之情，同出於太虛，而卒歸於

物欲。倏而生，忽而成，不容有豪髮之間。」此言人之情感，亦即自然界之物理現象也。故斷言之曰：「由太虛，有天之名。由氣化，有道之名。合虛與氣，有性之名。合性與知覺，有心之名。」又曰：「惟屈伸動靜終始之能，一也。故所以妙萬物而謂之神，通萬物而謂之道，體萬物而謂之性。」天也，道也，性也，其名雖異，其實則一物也。一元之論至此，可謂豪髮無遺憾矣。

人之性與物之性是一，可以其善感驗之。蓋宇宙之間，惟有一氣，而氣升降飛揚，未嘗止息。其所以不止息者，以其有動靜相感之性也。而人亦然，故曰：「感者性之神，性者感之體。」又曰：「天所不能自己者爲命，不能無感者爲性。」夫人與物相感，猶物之自相感也。此即所謂天道也。故曰：「天性，乾坤陰陽也。二端故有感，本一故能合。」天地生萬物，所受雖不同，皆無須臾之不感，「所謂性即天道也。」

張子以天地萬物爲一體，故深闢有無隱顯，歧而爲二之論，其言曰：「知虛空即氣，則有無隱顯，神化性命，通一無二。若謂虛能生氣，則虛無窮，氣有限，體用殊絕。」入老氏有生於無，自然之論。若謂萬象爲太虛中所見之物，則物與虛不相資；形自形，性自性；形性天人不相待，陷於浮屠以山河大地爲見病之說。」以如是，則人與自然，不能合爲一體也。（釋老之言，實非如此，又當別論。）

張子以人與天地萬物爲一體。夫天地萬物，其本體至善者也。而人何以不能盡善？曰：張子固言之矣。

「太虛爲清，清則無礙，無礙則神。反清爲濁，濁則礙，礙則形。」人亦有形之物，其所以不免於惡者，正以其不能無礙耳。張子曰：「性通乎氣之外，命行乎氣之內。」性通乎氣之外，謂人之性，與天地萬物之性是一，故可以爲至善。命行乎氣之內，命指耳之聰，目之明，知慧，強力等言，不能不爲形體所限，人之所以不能盡善者以此。夫「性者，萬物一原，非有我之所得而私也。」然既寓於我之形，則不能不藉我之形而見。我之形不能盡善，而性之因形而見者，遂亦有不能盡善者焉。此則張子所謂氣質之性也。氣質之性，所以不能盡善者，乃因性爲氣質所累而然，而非性之本不善。猶水然，因方爲圭，遇圓成璧，苟去方圓之器，固無圭璧之形。然則人能盡除氣質之累，其性固可以復於至善。故曰：「形而後有氣質之性。善反之，則天地之性存焉。故氣質之性，君子有弗性者焉。」又曰：「性於人無不善，繫其善反與不善反而已。」

人之性，善反之，固可以復於至善。然既云性爲氣質所限，則其能反與否，自亦不能無爲氣質所拘。故曰：「凡物莫不有是性。由通蔽開塞，所以有人物之別。由蔽有厚薄，故有智慧之別。塞者牢不可開，厚者可以開而開之也。薄者開之也易。」又曰：「上智下愚，習與性相遠既甚而不可變者也。」橫渠論性之說，朱子實祖述之。其說與純粹性善之說，不能相容。爲理學中一重公案。

氣質何以爲性？張子統括之曰：「攻取之欲，」計度之私。」前者以情言，後者以智言也。人之性，即天

地之性；天地之性固善，使人之感物，亦如物性之自然相感，而無所容心於其間，固不得謂之不善。所以不善者，因人之氣質，不能無偏，遂有因氣質而生之欲，如「口腹於飲食，鼻舌於臭味」是。所謂「湛一氣之本，攻取氣之欲」也。既有此欲，必思所以遂之，於是有一「計度之私」。抑且不必見可欲之物，而後計度以取之也；心溺於欲，則凡耳目所接，莫不惟可欲是聞，可欲是見，而非所欲者，則傾耳不聞，熟視無覩焉。所謂「見聞之知，乃物交而知，非德性所知」也。甚有無所見聞，亦憑空冥想者，則所謂「無所感而起者妄也」。凡若此者，總由於欲而來，故又可總括之曰「人欲」。對人欲而言，則曰「天理」。故曰「徇物喪心，人化物而滅天理者與？」又曰「德不勝氣，性命於氣；德勝其氣，性命於德」。窮理盡性，則性天德，命天理；氣之不可變者，獨死生壽夭而已。」又曰「爲學大益，在自能變化氣質」也。分性爲氣質之性，義理之性；又以天理人欲對舉，皆理學中極重要公案。而其原，皆自張子發之。張子之於理學，實有開山之功者也。

反其性有道乎？曰：有。爲性之累者氣質，反其性者，去其氣質之累而已。去氣質之累如之何？曰：因氣質而生者，欲去氣質之累者，去其心之欲而已。故曰「不識不知，順帝之則。有思慮知識，則喪其天矣。」又曰「無所感而起，妄也。感而通，誠也。計度而知，昏也。不思而得，素也。」又曰「成心者，意之謂與？成心忘，然後可與進於道。」

此等功夫，貴不爲耳目等形體所累，而又不能不藉形體之用。故曰：「世人心止於聞見之狭，望入盡性，不以聞見牿其心。」又曰：「耳目雖爲心累，然合內外之德，知其爲啓之之要也。」夫不蔽於耳目，而又不能不用耳目，果以何爲主乎？曰：主於心。主於心以復其性。張子曰：「心統性情者也。」與天地合一者謂之性，蔽於耳目者謂之情。心能主於性而不爲情之所蔽，則善矣。故曰：「人病以耳目見聞累其心，而不務盡其心。盡其心者，必知心所從來而後能。」夫心所從來，則性之謂也。

能若此，則其所爲純乎因物付物，而無我之見存。所謂「不得已而後爲，至於不得爲而止」也。人之所以不善者，既全由乎欲，則欲之既除，其所爲自無不善。故曰：「不得已當爲而爲之，雖殺人皆義也。有心爲之，雖善皆意也。」蓋所行之善惡，視其有無欲之成分，不以所行之事論也。故無欲卽至善也。故曰：「無成心者，時中而已矣。」又曰：「天理也者，時義而已。君子教人，舉天理以示之而已。其行已，述天理而時措之者也。」

人之所爲，全與天理相合，是之謂誠。中庸曰：「誠者，天之道也。思誠者，人之道也。」張子曰：「天所以長久不已之道，乃所謂誠。」所謂誠者，天之道也。又曰：「屈伸相感而利生，感以誠也。情僞相感而利害生，雜之僞也。至誠則順理而利，僞則不循理而害。」又曰：「誠有是物，則有終有始。僞實不有，何終始之有？」所謂思誠者，人之道也。張子曰：「天人異用，不足以言誠。天人異知，不足以盡明。所謂誠明者，性與天道，不見乎大小。」

之別也。」謂在我之性，與天道合也。夫是之謂能盡性。能盡性，則我之所以處我者，可謂不失其道矣。夫是之謂能盡命。故曰：「性其總，命其受。不極總之要，則不盡受之分。」故盡性至命，是一事也。夫我之性，即天地人物之性。性既非二，則盡此即盡彼。故曰：「盡其性者，能盡人物之性。至於命者，亦能至人物之命。」然則成己成物，以至於與天地參，又非二事也。此爲人道之極致，亦爲脩爲之極功。

此種功力，當以精心毅力行之，而又當持之以漸。張子曰：「神不可致思，存焉可也。化不可助長，順焉可也。」又曰：「窮神知化，乃養盛自致，非思勉之能強。故崇德而外，君子未之或知也。」又曰：「心之要，只是欲乎曠。熱後無心，如天簡易不已。今有心以求其虛，則是已起一心，無由得虛。切不得令心煩。求之太切，則反昏惑。孟子所謂助長也。孟子亦只言存養而已。此非可以聰明思慮力所能致也。」張子之言如此，謂其學由於苦思力索，非養盛自致，吾不信也。

張子之學，以天地萬物爲一體，故其道歸結於仁。故曰：「性者，萬物一原，非有我所得私也。惟大人爲能盡其性，故立必俱立，知必周知，愛必兼愛，成不獨成。」蓋不如是，不足以言成己也。故曰：「天體物而不遺，猶仁體事而無不在也。禮儀三百，威儀三千，無一物而非仁也。」張子又曰：「君子於天下，達善達不善，無物我之私。循理者共悅之，不循理者共攻之。攻之，其過雖在人，如在己，不忘自訟。其悅之，善雖在己，蓋取諸人，必以

與人焉。善以天下，不善以天下。」又曰：「正己而物正，大人也。正己以正物，猶不免有意之累也。有意爲善，利之也，假之也。無意爲善，性之也，由之也。」渾然不見人我之別，可謂大矣。

以上引張子之言，皆出正蒙及理窟。而張子之善言仁者，尤莫如西銘。今錄其辭如下。西銘曰：「乾稱父，坤稱母。予茲藐焉，乃混然中處。故天地之塞吾其體，天地之帥吾其性。民吾同胞，物吾與也。大君者，吾父母宗子，其大臣，宗子之家相也。尊高年，所以長其長；慈孤弱，所以幼其幼。聖其合德，賢其秀也。凡天下疲癯殘疾，惻獨孤寡，皆吾兄弟之顛連而無告者也。於時保之，子之翼也。樂且不憂，純乎孝者也。違曰悖德，害仁曰賊。濟惡者不才，其踐形，維肖者也。知化則善述其事，窮神則善繼其志。不愧屋漏爲無忝，存心養性爲匪懈。惡旨酒，崇伯子之顯養。育英才，穎封人之錫類。不弛勞而底豫，舜其功也。無所逃以待烹，申生其恭也。體其受而全歸者，參乎。勇於從而順令者，伯奇也。富貴福澤，將厚吾之生也。貧賤憂戚，庸玉汝於成也。存吾順事，沒吾寧也。」寥寥二百餘言，而天地萬物爲一體，不成物，不足以言成己，成己卽所以成物之旨，昭然若揭焉。可謂善言仁矣。

楊龜山寓書伊川，疑西銘言體而不及用，恐其流於兼愛。伊川曰：「西銘理一而分殊，墨氏則二本而無分。子比而同之，過矣。」劉剛中問：「張子西銘與墨子兼愛何以異？」朱子曰：「異以理一分殊。一者一本，殊者萬殊。脈絡流通，真從乾父坤母源頭上聯貫出來。其後支分派別，井井有條。非如夷之愛無差等。且理一體

也，分殊用也。墨子兼愛，只在用上施行。如後之釋氏，人我平等，親疏平等，一味慈悲。彼不知分之殊，又惡知理之一哉？釋氏是否不知分殊，又當別論。而張子之學，本末咸備，體用兼該，則誠如程朱之言也。

惟其如是，故張子極重禮。張子曰：「生有先後，所以爲天序。小大高下，相並而相形焉，是爲天秩。天之生物也有序，物之既形也有秩。知序然後經正，知秩然後禮行。」蓋義所以行仁，禮所以行義也。張子又曰：「世學不講，男女從幼便驕惰壞了。到長，益凶狠。只爲未嘗爲子弟之事，則於其親，已有物我，不肯屈下。病根常在，又隨所居而長，至死只依舊。爲子弟，則不能安洒掃應對。在朋友，則不能下朋友，有官長，則不能下官長。爲宰相，則不能下天下之賢。甚則至於徇私意，義理都喪，也只爲病根不去，隨所居所接而長。人須一事事消了病，則義理常勝。」又曰：「某所以使學者先學禮者，只爲學禮，便除去了世俗一副當習熟纏繞。譬之延蔓之物，解纏繞即上去。上去，即是理明矣，又何求？苟能除去一副當世習，便自然洒脫也。」可見張子之重禮，皆所以成其學。非若俗儒拘拘，即以節文之末，爲道之所在矣。張子教童子以洒掃應對進退。女子未嫁者，使觀祭祀，納酒漿。其後學，益酌定禮文，行之教授，感化所及之地，雖所行未必盡當，然其用意之善，則不可沒也。張子曰：「天下事大患，只是畏人非笑。不養車馬，食粗衣惡，居貧賤，皆恐人非笑。不知當生則生，當死則死。今日萬鍾，明日棄之；今日富貴，明日飢餓，亦不卹，惟義所在。」今日讀之，猶想見其泰山巖巖，壁立萬仞之氣象焉。吾師

乎吾師乎百世之下，聞者莫不興起也。

篇七 明道伊川之學

二程之性質，雖寬嚴不同，（二程之異，朱子「明道弘大，伊川親切」一語，足以盡之。大抵明道說話較渾融，伊川則於躬行之法較切實。朱子喜切實，故宗伊川。象山天資高，故近明道也。）然其學問宗旨，則無不同也。故合爲一篇講之。

欲知二程之學，首當知其所謂理氣者。二程以凡現象皆屬於氣。具體之現象固氣也，抽象之觀念亦氣。必所以使氣如此者，乃謂之理。大程曰：「有形總是氣，無形是道。」小程曰：「陰陽氣也，所以陰陽者道」是也。（非謂別有一無形之物，能使有形者如此。別有一所以陰陽者，能使陰陽爲陰陽。乃謂如此與使之如此者，其實雖不可知，然自吾曹言之，不妨判之爲二耳。小程曰：「冲穆無朕，萬象森然已具。未應不是先，已應不是後。如百尺之木，自根本至枝葉，皆是一貫。不可上面一段，是無形無兆，卻待人安排引出來。」此言殊有契於無始無終之妙。若謂理別是一物，而能生氣，則正陷於所謂安排引出來者矣。或謂程子所謂理能生氣，乃謂以此生彼，如橫渠所識，「虛能生氣，虛無窮，氣有限，體用殊絕」者，乃未知程子之意者也。○程子所以歧

理氣爲二者，蓋以言氣不能離陰陽，陰陽已是兩端相對，不足爲宇宙根原，故必離氣而言理。亦猶周子於兩儀之上，立一太極也。小程曰：「寂然不動，感而遂通，此已言人分上事。若論道，則萬理皆具，更不說感與未感。」其意可見。然以陰陽二端，不足爲世界根原，而別立一沖穆無朕之理以當之，殊不如橫渠之說，以氣卽世界之實體，而陰陽兩現象，乃是其用之爲得也。○小程以所謂惡者，歸之於最初之動。其言曰：「天地之化，既是兩物，必動已不齊。譬如兩扇磨行，使其齒齊不得。齒齊既動，則物之出者，何可得齊？從此參差萬變，巧曆不能窮也。」蓋程子之意，終以惡生於所謂兩者也。夫如明道之言，「有形總是氣，無形是道。」天地亦有形之物也，亦氣也。天地有惡，誠不害於理之善。然理與氣既不容斷絕，則動者氣也，使之動者理也。理既至善，何故氣有不善之動？是終不能自圓其說也。故小程子又曰：「事有善有惡，皆天理也。天理中物須有美惡。蓋物之不齊，物之情也。」至此，則理爲純善之說，幾幾乎不能自持矣。然以理爲惡，於心究有不安。乃又委曲其詞曰：「天下善惡皆天理。謂之惡者，本非惡，但或過或不及。」未免進退失據矣。○又案二程之論，雖謂理氣是二，然後來主理氣是一者，其說亦多爲二程所已見及。如「惡本非惡，但或過或不及」「一語，卽主理氣是一者所常引用也。小程又曰：「天地之化，一息不留。疑其速也，然寒暑之變甚漸。」又曰：「天地之化，雖廓然無窮，然而陰陽之度，日月寒暑晝夜之變，莫不有常。此道之所以爲中庸。」此二說，後之持一元論者，亦常引用之。

要之二程論理氣道器，用思未嘗不深，而所見不如後人之瑩澈。此自創始者難爲功，繼起者易爲力也。

職是故，伊川乃不認氣爲無增減，而以爲理之所生。語錄曰：「真元之氣，氣之所由生。不與外氣相雜，但以外氣涵養而已。若魚之在水，魚之性命，非是水爲之，但必以水涵養，魚乃得生耳。人居天地氣中，與魚在水無異。至於飲食之養，皆是外氣涵養之道。出入之息者，闔闔之機而已。所出之息，非所入之氣，但真元自能生氣。所入之氣，正當闔時，隨之而入，非假外氣以助真元也。若謂既反之氣，復將爲方伸之氣，則殊與天地之化不相似。天地之化，自然生生不窮，更何資於既斃之形，既返之氣。人氣之生，生於真元。天地之氣，亦自然生生不窮。至如海水，陽盛而涸，及陰盛而生，亦不是將已涸之氣卻生水，自然能生往來屈伸，只是理也。盛則便有衰，衰則便有夜，往則便有來。天地中如洪鍾，何物不銷鑠。」此說與質力不滅之理不合，且於張子所謂「無」之旨，見之未瑩，宜後人之護之也。

凡哲學家，祇能認一事爲實。主理氣合一者，以氣之屈伸往來卽是理。所謂理者，乃就氣之狀態而名之，故氣卽是實也。若二程就氣之表，別立一使氣如是者之名爲理，則氣不得爲實，惟此物爲實審矣。故小程謂「天下無實於理者」也。

二程認宇宙之間，惟有一物，卽所謂理也。宇宙間既惟此一物，則人之所稟受以爲人者，自不容舍此而

有他。故謂性卽理。大程曰：「在天爲命，在人爲性，主於身爲心。」（小程亦有此語。）小程曰：「道與性」是也。（明道又曰：「窮理盡性，以至於命，二事一時竝了。」伊川語錄：「問人之形體有限量，心有限量否？」曰：以有限之形，有限之氣，苟不通之以道，安得無限？苟能通之以道，又豈有限？天下更無性外之物。若曰有限量，除是性外有物始得。」其所謂理者，既爲脫離現狀，無可指名之物，故其所謂性者，亦異常超妙，無可把握。大程謂「生之謂性，性卽氣」，「人生而靜，以上不容說；才說性，便已不是性」是也。伊川語錄：「季明問喜怒哀樂未發謂之中曰：當中之時，耳無聞，目無見否？」曰：雖耳無聞，目無見，然見聞之理在始得。實且說靜時如何？曰：謂之無物則不可。然自有知覺處。曰：既有知覺，卽是動也。怎生言靜？人說復以靜見天地之心，非也。復之卦，下面一畫，便是動也，安得謂之靜？」又：「或問先生於喜怒哀樂未發之前，下動字，下靜字，曰：謂之靜則可。然靜中須有物始得。這是最難處。」又：「或曰：喜怒哀樂未發之前，求中可乎？」曰：不可。既思於喜怒哀樂未發之前，求中，卻又是思也。既思卽是已發，便謂之和，不可謂之中。」既思卽是已發，有知覺卽是動，此卽明道才說性便已不是性之說。蓋二程之意，必全離乎氣，乃可謂之理；全離乎生，乃可謂之性也。既無聞無見，而又須有見聞之理在；謂之靜，而其中又須有物，則以理氣二者，不容隔絕爾。二者既不容隔絕，而又不容夾雜，則其說祇理論可有，實際無從想像矣。二程亦知其然，故於夾雜形氣者，亦未嘗不認爲性。（以舍此性更無可見也。）

大程謂「善固性，惡亦不可不謂之性」，小程謂「論性不論氣不備，論氣不論性不明」是也。夫如是，則二程所謂性者，空空洞洞，無可捉摸，自不得謂之惡。故二程以所謂惡者，悉歸諸氣質。

小程曰：「性卽是理。理自堯舜至於途人一也。才稟於氣。氣有清濁，稟其清者爲賢，稟其濁者爲愚。」又曰：「氣有善有不善，性則無不善。人之所以不知善者，氣昏而塞之耳。」又曰：「性卽理也。天下之理，原其所自來，未有不善。故凡言善惡者，皆先善而後惡，言是非者，皆先是而後非，言吉凶者，皆先吉而後凶。」明道語錄中論性一節，號爲難解，其意亦祇如此。其言曰：「生之謂性，性卽氣，氣卽性，生之謂也。人生氣稟，理有善惡。然不是性中元有此兩物相對而生也。有自幼而善，有自幼而惡，是氣稟使然也。善固性也，惡亦不可不謂之性也。蓋生之謂性，人生而靜，以上不容說，才說性，便已不是性也。凡人說性，只是說繼之者善也。孟子言人性善是也。夫所謂繼之者善也，猶水流而就下也。皆水也；有流而至海，終無所汙，此何煩人力之爲也？有流而未遠，固已漸濁；有出而甚遠，方有所濁。有濁之多者，有濁之少者。清濁雖不同，然不可以濁者不爲水也。如此，則人不可以不加澄治之功。故用力敏勇則疾清，用力緩怠則遲清。其清也，卻只是元來水也。亦不是將清來換卻濁，亦不是取出濁來，置在一隅也。水之清，則性善之謂也。故不是善與惡在性中爲兩物相對，各自出來。」大程此言，謂性字有兩種講法：一告子所謂「生之謂性」，此已落形氣之中，無純善者。孟子所謂性善，亦指此。

不過謂可加澄治之功耳。一則所謂人生而靜以上。此時全不雜氣質，故不可謂之惡。此境雖無可經驗。然人之中，固有生而至善，如水之流而至海，終無所汙者；又有用力澄治，能復其元來之清者。如水然。江河百川，固無不與泥沙相雜。然世間既有清澄之水，人又可用力澄治，以還水之清，則知水與泥沙，雖係兩物，就水而論，固不能謂之不清，而濁非水之本然矣。此人性所以可決爲善，而斷定其中非有所謂惡者，與善相對也。（性本至善，然人之生，鮮有不受氣質之累者，不知此理，則將有性惡之疑。故小程謂「論性不論氣不備，論氣不論性不明」也。○二程謂心性是一，故於心，亦恆不認其有不善。大程曰：「心本善，發於思慮，則有善有不善。既發則可謂之情，不可謂之心。」小程謂「在天爲命，在人爲性，主於身爲心，運用處是意。」問上知下愚不移是性否？曰：此是才。才猶言材料，曲可以爲輪，直可以爲梁是也。」朱子則善橫渠心統性情之說，謂「性是靜，情是動，心則兼動靜而言。」）

天下惟有一理，所謂性者，亦即此理；此理之性質，果何如乎？二程斷言之曰：仁。蓋宇宙現象，變化不窮，便是生生不已。凡宇宙現象，一切可該之以生，則生之外無餘事。（生殺相對，然殺正所以爲生，如冬藏所以爲春生地也。故二者仍是一事。）故生之大無對，生即仁也，故仁之大亦無對。人道之本，惟仁而已。大程識仁篇暢發斯旨，其言曰：「仁者渾然，與物同體。義理智信，皆仁也。識得此理，以誠敬存之而已。不須防檢，不須窮索。」

此道與物無對，大不足以明之。天地之用，皆我之用。孟子言萬物皆備於我，須反身而誠，乃爲大樂。若反身未誠，猶是二物有對，以己合彼，終未有之，又安得樂？訂頑意思，乃備言此體。（橫渠銘其書室之兩牖，東曰致思，西曰訂頑。伊川更爲東銘、西銘。）以此意存之，更有何事？必有事焉而勿正，心勿忘，勿助長，未嘗致纖毫之力，此其存之之道。若存得，便合有得。蓋良知良能，元不喪失，以昔日習心未除，卻須存習此心，久則可奪舊習，此理至約，惟患不能守。然既體之而樂，亦不思不能守也。」曰：「與物同體。」曰：「天地之用，皆我之用。」曰：「萬物皆備於我，苟能有之，則非復二物相對，不待以己合彼。」皆極言其廓然大公而已。無人我之界，則所謂仁也。小程曰：「仁人道，只消道一公字。」亦此意。（伊川語錄：「問仁與心何異？」曰：「心是就所主言，仁是就事言。」）伊川以心與性爲一，理與仁爲一，性卽理，故心卽仁也。○六程言仁，有極好者。如曰：「醫書言手足痿痺爲不仁，此言最善名狀。仁者以天地萬物爲一體，莫非己也。至仁則天地萬物爲一身，而天地之間，品物萬形，爲四支百體。夫人豈有視四支百體而不愛者哉？」又曰：「仁至難言，故曰己欲立而立人，己欲達而達人，能近取譬，可謂仁之方也已。如是觀之，可以得仁之體。」又曰：「舍己從人最難，己者，我之所有，雖痛舍之，猶懼守己者固，而從人者輕也。」又曰：「大凡把捉不定，皆是不仁。」其言皆極勸察入微。○明道曰：「昔受業於周茂叔，每令尋顏子、仲尼樂處，所樂何事？」朱子語錄：「問顏子所樂何事，周子、程子終不言，先生以爲所樂何事？」

曰：人之所以不樂者，有私意耳。克己之私，則樂矣。」盡去己私，則不分人我矣。○伊川語錄：「問仁與聖何以異？」曰：人只見孔子言何事於仁，必也聖乎？便爲仁小而聖大，殊不知仁可以通上下言之，聖則其極也。今人或一事是仁，可謂之仁。至於盡人道，亦可謂之仁。此通上下言之也。如曰：若聖與仁，則吾豈敢，則又仁與聖兩大。大抵盡仁道者，卽是聖人，非聖人則不能盡得仁道。」亦以仁爲人道之極也。○所謂「義禮智信皆仁」者，乃謂義禮智信，皆可該於仁之中耳。非謂有仁，遂可無義禮智信也。明道語錄曰：「仁者體也，義者用也。知義之爲用而不外焉，可以語道矣。世之所論於義者，皆外之。不然，則混而無別。」此數語爲義禮知信皆仁之經好注脚。蓋所謂義理智信皆仁者，謂仁者目的，義禮智信皆其手段；手段所以達目的，故目的而外，更無餘事也。外之，則義禮智信與目的對立爲二物矣。如殺以止殺，殺義也，以止殺故乃殺，則所以行仁也。毒蛇螫手，壯士斷腕，斷腕義也，行此義，正所以全其身，則仍仁也。良藥苦口，忍痛而飲之，飲之義也，亦所以全其身，則仁也。蓋義之目的在仁，而其手段則與仁相反。故以仁爲目的而行之，則義仍是仁。卽以義爲目的而行之，則竟是不仁矣。此外之之謂也。故外義卽不仁也。混而無別，則又有目的而無手段，所謂婦人之仁也。其心雖仁，其事亦終必至於不仁而後已。故混而無別，亦不仁也。」

識得仁，以誠敬存之，固已，然人何緣而能識仁，亦一問題也。此理也，大程於定性篇發之。其言曰：「所謂

定者，動亦定，靜亦定；無將迎無內外。苟以外物爲外，素己而從之，是以己性爲有內外也。且以己性爲隨物於外，則當其在外時，何者爲在內？是有意於絕外誘，而不知性之無內外也。既以內外爲二本，則又烏可處語定哉？夫天地之常，以其心普萬物而無心。聖人之常，以其情順萬事而無情。故君子之學，莫若廓然而大公，物來而順應。易曰：貞吉悔亡，憧憧往來，朋從爾思。苟規規於外誘之除，將見滅於東而生於西也。非惟日之不足，顯其端無窮，不可得而除之。人之情，各有所蔽，故不能適道。大率患在於自私而用智，自私則不能以有爲爲應迹，用智則不能以明覺爲自然。今以惡外物之心，而求昭無物之地，是反鑑而索照也。易曰：艮其背，不獲其身，行其庭，不見其人。孟氏亦曰：所惡於智者，爲其鑿也。與其非外而是內，不若內外之兩忘也。兩忘則澄然無事矣。無事則定，定則明，明則尙何應物之爲累哉？此篇所言一言蔽之，因物付物而已。因物付物而我無欲焉，則合乎天然之理。合乎天然之理，則仁矣。故誠敬存之，是識仁後事。而因物付物，（不自私，不用智。）則由之以識仁之道也。（此篇所言，亦爲鍼砭學佛者而發。伊川曰：「學佛者多要忘是非，是非安可忘得？自有許多道理，何事忘得？夫事外無心，心外無事。世人只爲被物所役，便覺苦事多。若物各付物，便役物也。」又曰：「如明鑑在此，萬物畢照，是鑑之常，難爲使之不照。人心能交感萬物，亦難爲使之不思慮。」皆與此篇意同。○二程所謂止者，卽物各付物之謂也。明道曰：「知止則自定。」伊川曰：「釋氏多言定，聖人則言止。」○伊川論止

之理，有極精者。其言曰：「人多不能止。蓋人萬物皆備，遇事時，各因其心之所重者，更互而出。才見得這裏重，便有這事出。若能物各付物，便是不出來也。」又曰：「養心莫善於寡欲。欲不必沈溺，只有所向便是欲。」又曰：「外物不接，內欲不萌，如是而止，乃得止之道。有疑病者，事未至，先有疑端在心。周羅事者，先有周羅事之端在心，皆病也。」其言皆深切著明，足以使人猛省。○伊川又曰：「聖人與理爲一，故無過不及，中而已矣。其他皆是以心處這個道理。故賢者常失之過，不肖者嘗失之不及。」此可見因物付物，卽私欲淨盡之時也。

大程之所謂定，卽周子之所謂靜也。蓋世界紛紛，皆違乎天則之舉動。若名此等舉動爲動，則反乎此等舉動者，固可以謂之靜，謂之定。故周子所謂靜，大程所謂定，無二致也。雖然，周子僅言當靜而已，如何而可以靜，未之及也。程子則并言所以求定之方，曰：「涵養須用敬，進學在致知。」蓋當然之天則，在自悟而不容強求。若迫切求之，則卽此迫切之心，已與天則爲二矣。（伊川語錄：「問呂學士言：當求於喜怒哀樂未發之前，信斯言也，恐無著摸。如之何而可？」曰：「看此語如何地下。若言存養於喜怒哀樂未發之時則可。若言求中於喜怒哀樂未發之時則不可。又問：學者於喜怒哀樂發時，固當勉強裁抑。於未發之前，當如何用功？」曰：「未發之前，更怎生求？只平日涵養便是。」又「伊川曰：志道懇切，固是誠意。若迫切不中理，則反爲不誠。蓋實理中自有緩急，不容如是之迫。」○明道曰：「中者，天下之大本。天地之間，亭亭當當，直上直下之正理。出則不是。惟敬

而無失最盡。〔亦涵養須用敬之意也。〕故識得此理之後，在此以勿忘勿助之法存之也。〔勿忘者不離乎此之謂。勿助者不以人力強求，以致反離乎此之謂也。〕此即程子所謂敬也。然此爲識得天則後事，至於未識天則之前，欲求識此天則，則當即物而求其理。此則程子所謂致知也。故定者，〔即周子之靜。〕目的主敬致知，則所以達此目的也。故程氏之學脈，實上承周子，而其方法，則又較周子加詳也。

涵養須用敬，進學在致知二語，爲伊川之宗旨。朱子亟稱之。然其說實已備於明道。故二程之性質雖異，其學術則一也。明道論敬之語，已見前。伊川於此發揮尤爲透切。其言曰：「有主則虛，虛則邪不能入。無主則實，實則物來奪之。今夫餅餌，有水實內，則雖江海之侵，無所能入。安得不虛？無水於內，則淳注之水，不可勝注，安得不實？大凡人心不可二用。用於一事，他事便不能入，事爲之主也。事爲之主，尙無思慮紛擾之患。若主於敬，又焉有此患乎？〔所謂「閑邪則誠自存，主一則不消閑邪」也。〕所謂敬者，主一之謂敬。所謂一者，無適之謂一。且欲涵泳主一之義。一則無二三矣。但存此涵養久之，自然天理明。」程子所謂主一，乃止於至當，而無邪思雜念之謂。故其所謂一者，初非空空洞洞，無所著落。語錄：「或問思慮果出於正，亦無害否？曰：且如宗廟則主敬，朝廷則主莊，軍旅則主嚴，此是也。若發不以時，紛然無度，雖正亦邪。」如此說，則強繫其心於一物，或空空洞洞，一無著落者，皆不得爲思之正。何則？所謂一物者，初非隨時隨地所當念，而隨時隨地，各有其所

當念之事，原亦不當落入空寂故也。語錄又載伊川語曰：「張天祺嘗自約：上著牀，便不得思量事。不思量事後，須強把這心來制縛，亦須寄寓在一個形像，皆非自然。君實只管念個中字，則又爲中繫縛。愚夫不思慮，冥然無知，此過與不及之分也。」周子所謂靜，本係隨時隨地，止於至當之謂，非謂虛寂。然學者每易誤爲虛寂，易之以主敬，則無此弊矣。故主敬之說，謂即發明周子主靜之說可。謂補周子之說末流之弊而救其偏，亦無不可也。故伊川又鄭重而言之曰：「敬則自虛靜，不可把虛靜喚做敬。」（虛寂之靜固有弊，然恆人所患，究以紛擾爲多。故學道之始，宜使之習靜，以祛塵累而見本心。此非使之入於虛寂也。故伊川每見人靜坐，輒歎其善學。○初學敬時，雖須隨時檢點，留意於主一。及其後，則須自然而然，不待勉強，否則有作意矜持之時，必有遺漏不及檢點之處矣。故伊川又謂「忘敬而後無不敬」也。○誠敬二字，義相一貫。蓋誠即真實無妄之謂，敬即守此真實無妄者而不失之謂也。一有不敬，則私意起，私意起，即不誠矣。伊川語錄：「季明曰：願書患思慮不定，或思一事未了，他事如麻又生，如何？」曰：「不可。此不誠之本也。」令人悚然。）

致知之說，欲即事物而求其理，頗爲陽明學者所嘗。今之好言科學者，又頗取其說。其實二程所謂致知，不盡如陽明學者所議，亦非今世所謂科學之致知也。致知之說，亦發自明道。語錄：「問不知如何持守？」曰：「且未說到持守。持守甚事？須先在致知」是也。明道謂「致知在格物」之格爲至，謂窮理而至於物，則物理盡。

伊川則訓格爲窮，訓物爲理。謂格物猶言窮理。意亦相同。伊川云：「若只守一個敬，不知集義，卻是都無事也。且如欲爲孝，不成只守個孝字。須知所以爲孝之道。所以奉侍當如何？溫清當如何？然後能盡孝道也。」與後來陽明之說正相反。又曰：「學者先要會疑。」又曰：「人思如泉涌，汲之愈新。」又曰：「不深思而得者，其得易失。」又：「問人有志於學，然知識蔽錮，力量不至，則如之何？」曰：「只是致知。若致知，則知識當漸明。不曾見人有一件事，終思不到也。知識明，則力量自進。」其視致知之重，而勸人以致思如此。明道謂：「知至則便意誠。不誠，皆知未至耳。」伊川曰：「勉強行者，安能持久？除非燭理明，自然樂循理。」又曰：「人謂要力行，亦只是淺近語。人既能知見，豈有不能行？」一若行全繫於知；既知，則行更無難者。不獨主陽明之學者嘗之。卽從常識立論者，亦多疑之。然二程之所謂知，實非常人之所謂知也。常人所謂知者，不過目擊耳聞，未嘗加以體驗，故其知也淺。二程所謂知，則皆既經身驗，而確知其然者也，故其知也深。伊川曰：「知有多少般，煞有淺深。向親見一人，曾爲虎所傷。因言及虎，神色便變。旁有數人，見他說虎，非不知虎之猛，可畏。然不如他有畏懼之色。蓋真知虎者也。學者深知亦如此。且如膾炙，貴公子與野人，皆知其美。然貴人聞著，便有欲嗜膾炙之色。野人則不然。學者須是真知，才知得，便泰然行將去也。」又曰：「如曾子易簣，須要如此乃安。人不能若此者，只爲不親實理。實理得之於心，自別。若耳聞口道，心實不見。若見得，必不肯安於所不安。」又曰：「古人有捐軀

殞命者。若不實見得，烏能如此？須是實見得生不重於義，生不安於死也，故有殺生成仁者。只是成就一個是而已。」又曰：「執卷者莫不說禮義。王公大人，皆能言軒冕外物。及其臨利害，則不知就義理，卻就富貴。如此者，只是說得不實見。」凡此所謂知者，皆身體力行後之真知灼見，非口耳剿襲者比。故伊川謂「聞見之知，非德性之知。」而譬世之所謂博學多聞者，皆聞見之知也。蓋二程所謂致知者，原係且實行，且體驗，非懸空摸案之謂也。然則其所謂知者，實在行之後矣。安得以流俗知而不行之知，譏之哉？故曰：二程之致知，不盡如陽明學者所譏也。（知行二者，真切言之，固亦難分先後。然自理論言之，固可謂知在先，行在後，此則人之言語思想，不得不然者也。伊川謂「譬如行路，須是光照」，卽此理。○不知而行，往往有貌是而實非者。伊川語錄：「到底須是知了方能行。若不知，只是覷了堯學他行事。無幾許多聰明睿知，怎生得如他動容周旋中禮」是也。○用過此等工夫後，自然有真知灼見，與常人不同。故小程謂爲人處世，聞見事無可疑，多少快活」也。）至謂二程之致知，非今世科學所謂致知者，則以其所言，多主道德，不主知識。明道曰：「良知良能，皆出於天，不係於人。人莫不有良知。惟蔽於人欲，乃亡天德。」伊川曰：「致知在格物，非由外鑠我也，我固有之也。因物而遷，迷而不悟，則天理滅矣。故聖人欲格之。」其所謂知者可知。故伊川又曰：「致知但知止於至善，如爲人子止於孝，爲人父止於慈之類，只務觀物理。正如游騎無歸。」又曰：「物我一理，才明彼，卽曉此，合內外之道。」

也。」此豈今科學所謂知哉？伊川曰：「人道莫如敬。未有致知而不在敬者。」又曰：「致知在格物。物來則知起，物各付物，不役其知，則意誠。意誠則心正。此始學之事也。」明道曰：「目畏尖物，此事不得放過，須是克下室中率置尖物，以理勝他。」有患心疾者，見物皆師子。伊川教以見即直前捕執之，無物也。久之，疑疾遂愈。此等致知工夫，皆兼力行言之。故伊川謂「有恐懼心，亦是燭理不明」。又謂「克己所以治怒，明理所以治懼」。若如尋常人所爲，則稍有知識者，誰不知鬼魅之不足畏，然敢獨宿於墟墓之間者，幾人歟？故曰：二程之致知，非今科學家所謂致知也。

格物之說，欲即事物而窮其理。事物無窮，即理無窮，格之安可勝格？然於物有所未格，即於理有所未窮，而知亦有所不致矣。此世之致疑於格物之說之最大端也。雖然，此以疑今科學之所謂格物則可。若二程所言之格物，則其意本主於躬行，但須格到此心通曉爲止，豈有格盡天下之物之疑哉？（如欲通文字者，但須將他人文字讀之，至自己通曉爲止。豈有憂天下文字多，不能盡讀之理？）故如此之說，實不足以疑二程也。伊川語錄：「或問格物須物物格之，還是格一物而萬物皆知？曰：怎生便會該通？若只格一物，便通衆理，雖願子亦不能如此。須是今日格一件，明日格一件，積習既多，然後有脫然貫通處。」又曰：「自一身之中，至萬物之理，但理會得多，相次自然豁然有覺處。」所謂脫然貫通，豁然有覺，雖不能謂其必當於真理，然自吾心言

之，確有此快然自得之境。試問今之爲學者，孰敢以其所得爲必確然用力既深，又孰無此確然自信之境乎？故如此之說，實不足以難二程也。故曰：「所謂窮理者，非道須盡窮天地萬物之理，又不道是窮得一理便到。只是要積累多後，自然見去。」（窮理以我爲主，故無論何物皆可窮。小程謂「窮理亦多端，或讀書講明義理，或論古今人物，別其是非，或應事接物，而處其當然」是也。惟其然，故不通於此者，不妨舍而之彼。小程謂「若於一事思未得，且別換一事思之，不可專守著這一事。蓋人之知識，在這裏蔽著，雖強思亦不通」是也。然則王陽明格庭前之竹七日而至於病，乃陽明自誤，不關二程事矣。）

格物窮理，皆以求定性，而定性則所以求合乎天則，故宋儒於天理人欲之界最嚴。明道曰：「吾學雖有所受，天理二字，卻是自家體帖出來。」其視之之重可知。所謂天理者，即合乎天則之謂也。所謂人欲者，即背乎天理之謂也。伊川曰：「視聽言動，非禮不爲，即是禮。禮即是理也。不是天理，便是人欲。」又曰：「無人欲，即是天理。」可見其界限之嚴矣。理學家所謂天理者，往往實非天然之則，而持之過於嚴酷，故爲世人所设。然謂理學家所謂天理者非盡天理則可，謂立身行事，無所謂當然之理者，固不可也。伊川曰：「天下之害，無不由末之勝也。峻宇雕牆，本於宮室。酒池肉林，本於飲食。淫酷殘忍，本於刑罰。窮兵黷武，本於征伐。凡人欲之過者，皆本於奉養。其流之遠，則爲害矣。先王制其本者，天理也。後人流於末者，人欲也。損之義，損人欲以復天

理而已。」歷舉各事，皆性質同而程度有差者，而其利害，遂至判然，殊足使人悚惕也。

統觀二程之學，定性之說，與周子之主靜同。識仁一篇，與橫渠之正蒙無異。所多者，則「涵養須用敬，進學在致知」二語。實行之法，較周張爲詳耳。蓋一種哲學之興，其初必探討義理，以定其趨向；趨向既定，則當求行之之方。學問進趨之途，固如是也。然二程性質，實有不同，其後朱子表章伊川，象山遠承明道，遂爲理學中之兩大派焉。

二程格物致知之說，既非如流俗所疑，則其與陽明之學之異，果何在？曰：二程謂天則在物，（伊川曰：「物各有則，須是止於物。」）陽明謂天則在心，此其異點也。參看講陽明之學一篇自明。

篇八 晦菴之學

宋學家爲後人所尊者，莫如朱子。朱子於學，最宗濂溪及二程。然於其餘諸家，亦皆加以研究評論。至其哲學思想，則未有出於周、張、二程之外者。不過研究更爲入細，發揮更爲透闢耳。故朱子非宋學之創造家，而宋學之集成者也。（陸子一派，僅修養之法，與朱子不同。哲學思想，亦不能出周、張、二程之外。）

人類之思想，可分爲神學、玄學、科學三時期。神學時期，恆設想宇宙亦爲一人所創造。遂有天主造物，黃

上博人等說。此不足論。玄學時期，則舉認識之物分析之，或以爲一種原質所成，或以爲多種原質所成。所謂一元論、多元論是也。二者相較，又以一元論爲較圓滿。玄學之說明宇宙，至此而止，不能更有所進也。

宋學家以氣爲萬物之原質，與古人同。而又名氣之所以然者爲理。此爲當時之時代思想，朱子自亦不能外此。

有其然必有其所以然，乃人類思想如此，非事實也。就實際言，然與所以然，原係一事。故理氣爲二之說，實不如理氣爲一之說之的。然謂氣之外，真有一使氣如此之理，則非。若明知理氣是一，特因人類思想，有其然，必推求其所以然，因爲假立一名，以資推論，則亦無所不可。朱子之論理氣，即係如此。其所見，誠有不如後人榮澈之處。然世之譏之者，或竟疑朱子謂氣之外別有所謂理之一物焉，則亦失朱子之意已。

語類云：「理氣本無先後之可言。必欲推其所從來，則須說先有是理。然理又非別爲一物，即存乎是氣之中。」又云：「天地之間，只有動靜兩端，循環不已，更無餘事。此之謂易。而其動其靜，則必有所以動靜之理。是則所謂太極者也。」（伊川論復卦云：「一陽復於下，乃天地生物之心也。先儒皆以靜爲見天地之心，蓋不知動之端，乃天地之心也。」朱子又論之曰：「天地以生物爲心者也。雖氣有闢闢，物有盈虛，而天地之心，則亙古亙今，未始有毫釐之間斷也。故陽極於外，而復生於內，聖人以爲於此可以見天地之心焉。蓋其復者氣

也；其所以復者，則有自來矣。向非天地之心，生生不息，則陽之極也，一絕而不復續矣。尙何以復生於內，而爲闢闢之無窮乎？此則動之端，乃一陽之所以動，非指夫一陽之已動者而言之也。」答劉叔文云：「所謂理與氣，決是二物。但在物上看，則二物渾淪，不可分開，各在一處。然不害二物之各爲一物也。若在理上看，則雖未有物，而已有物之理。」此皆謂理氣之別，出於人之擬議，而非真有此二物也。（語類云：「太極，理也。動靜，氣也。氣行則理亦行。二者常相依，而未嘗相離也。當初元無一物，只有此理。有此理，便會動而生陽，靜而生陰；靜極復動，動極復靜。」云云。極似以理爲實有其物者。此等處，最易招後人之訾議。然統觀全體，則朱子未嘗以理爲實有一物，在氣之外，固彰彰也。語類又云：「太極非是別爲一物。卽陰陽而在陰陽，卽五行而在五行，卽萬物而在萬物，只是一個理而已。」其說固甚明顯已。）

語類：「問天地之氣，當其昏明駁雜時，理亦隨而昏明駁雜否？曰：理卻只恁地，只是氣如此。又問：若氣如此，理不如此，則是理與氣相離矣。曰：氣雖是理之所生，然既生出，則理管他不得。如道理寓於氣了，日用運用間，都由這個氣。只是氣強理弱。」朱子之意，蓋亦如橫渠謂氣之清虛者無礙，無礙則神；重濁者有形，有形則不免有礙也。如人稟天地之氣以生，元依據這個理。然形質既成，則其所受之理，卽不免隨其形質之偏，而有昏明之異。至此，則理亦不能超乎形氣，而自全其善矣。所謂「管他不得」也。然此固非理之罪，所謂「理卻只

慙地」也。

又：「可機問：大鈞播物，還是一去便休？還有去而復來之理？曰：一去便休耳，豈有散而復聚之氣。」此說與伊川「天地之化，自然生生不窮，更何貴於既斃之形，已反之氣」同。殊與實力不滅之理相背，不免陷於斷絕之議。

朱子之論陰陽，亦以爲同體而異用，與橫渠同。語錄曰：「陰陽只是一氣。陽之退，便是陰之生。不是陽退了，又別有個陰生。」答楊元範曰：「陰陽只是一氣。陰氣流行卽爲陽，陽氣凝聚卽爲陰。非直有二物相對」是也。

陰陽亦人之觀念，而非實有其物，故逐細分析，可以至於無窮。（人非分別不能認識。凡人所認識，皆有彼此之分，卽可以陰陽名之。）此理朱子亦見及。語類：「統言陰陽只是兩端，而陰中自分陰陽，陽中亦有陰陽。乾道成男，坤道成女。男雖屬陽，而不可謂其無陰。女雖屬陰，而不可謂其無陽。人身氣屬陽，而氣有陰陽。血屬陰，而血有陰陽」云云。此說殊有裨於實用。知此，則知大小善惡等，一切皆比較之詞，而非有一定之性質。以臨事，不滯固矣。（如人之相處，陵人爲惡，見陵於人爲善，此通常之論也。然世實無陵人之人，亦無見陵於人之人，視所值而異耳。甲強於乙，則陵乙，而乙不敢陵甲。則甲爲陵人之人，而乙爲見陵於人之人。然丙弱於

乙又將陵之；丁更強於甲，亦不免陵甲；則甲又爲見陵於人之人，乙又爲陵人之人矣。知此，則知世無真可信之人，亦無真可託之國。同理，亦無真不可信之人，真不可託之國。吾國當日俄戰前，羣思倚日以排俄；德日戰後，又欲結美以攘日；近日高唱打倒帝國主義，則又不分先後緩急，欲舉外人一切排之；皆不知此等理誤之也。故哲學思想真普及，則羣衆程度必增高。）

凡言學問，必承認因果。因果者，現象界中，自然且必然之規律也。此規律，以時間言，則不差秒忽；以空間言，則不爽毫釐；此爲舊哲學家所謂數。朱子之思想亦如此。語類云：「有是理，便有是氣，有是氣，便有是數。」又云：「數者，氣之節候」是也。

理學家之所謂理，非普通人之所謂理也。普通人之所謂理，乃就彼所知之事，摘繹得之，約略言之而已。至理學家之所謂理，則必貫通萬事而無礙，乃足以當之。蓋就知識言，必於萬事萬物，無所不曉，而其所知乃真。以行爲言，必其所知既真，而所行始可斬其不繆也。此等思想，在今日科學既明，固已知其徒存虛願。然在昔日，哲學家之願望，固多如是。職是故，理學家之於物理，亦多有格致之功。以此雖非急務，固亦在其學問之範圍內也。朱子之好學深思，實非尋常理學家所及。故於物理，探索尤勤，發明亦多。衡以科學，固多不足信。然自是當時哲學家一種見解；而於其學問宗旨，亦多有關係，固不可以不知也。今試略述其說如下：

朱子推想宇宙之生成，亦以陰陽五行之說爲本。其言曰：「天地始初混沌未分時，想只有水火二者。水之滓脚便成地。今登高而望，羣山皆爲波浪之狀，便是水泛如此。只不知因甚麼事凝了。初間極軟，後方凝得硬。問想得如潮水湧起沙相似。曰：然。水之極濁便成地。火之極清，便成風雲雷電日星之屬。」又曰：「大抵天地生物，先其輕清，以及重濁。天一生水，地二生火，二物在五行中最輕清。金木重於水火，土又重於金木。」又論水火木金土之次曰：「竊謂氣之初，溫而已。溫則蒸溽，蒸溽則條達，條達則堅凝，堅凝則有形質。五者雖一有俱有，然推其先後之序，理或如此。」又曰：「天地初開，只是陰陽之氣。這一個氣運行，磨來磨去。磨得急了，便拶許多渣滓。裏面無處出，便結成個地在中央。氣之清者，便爲天，爲日月，爲星辰，只在外常周環運轉。地便在中央不動，不是在下。」又曰：「造化之運如磨。上面常轉而不止。萬物之生，似磨中撒出。有粗有細，自是不齊。」又曰：「晝夜運而無息，便是陰陽之兩端。其四邊散出紛擾者，便是游氣，生人物之萬殊。如磨麵相似。其四邊只管層層散出。天地之氣，運轉無已，只管層層生出人物。其中有粗有細，如人物有偏有正。」朱子設想宇宙之生成如此。

又推想宇宙之毀壞。其見地，亦與舊說所謂渾沌者同。語類：「同天地會壞否？曰：不會壞。只是相將人無道極了，便一齊打合，混沌一番，人物都盡。此所謂不壞者，卽是壞。但不斷絕了。」或問：天地壞也不壞？曰：既有

形氣，如何不壞？但一個壞了，便有一個生得來。凡有形有氣，無不壞者。壞已復生，不知其極。天地亦不能不壞，壞已不能不生。氣之作用如此。」又曰：「萬物渾論未判，陰陽之氣，混合幽暗。及其既分，中間放得開闊光明，而兩儀始立。卻康節以十二萬九千六百年爲一元，則是十二萬九千六百年之前，又是一個大開闢。更以上亦復如此。真是動靜無端，陰陽無始。小者大之影，只晝夜便可見。五峯所謂一氣大息，震蕩無垠。海宇變動，山川勃陸。人物消盡，舊迹大滅。是謂鴻荒之世。嘗見高山有螺蚌殼，或生石中。此石即舊日之土，螺蚌即水中之物。下者卻變而爲高，柔者却變而爲剛。」云：「有形有氣，無不壞者。天地亦不能不壞，壞已不能不生。」可見其深信物理規則。又謂「雖壞而不斷絕」，「動靜無端，陰陽無始」，一則其說，雖置之認識論中，亦無病矣。

生物之始，朱子亦以意言之。語類：「問初生第一個人時如何？曰：以氣化。二五之精，合而成形，釋家謂之化生。如今物之化生者甚多，如蠶然。」又曰：「生物之初，陰陽之精，自凝結成兩個，一牝一牡。後來卻從種子漸漸生去，便是以形化。」

張子以鬼神爲二氣之良能，程子以鬼神爲造化之迹，朱子則兼取其說。語類：「問近思錄既載鬼神者造化之迹，又載鬼神者二氣之良能，似乎重了？曰：造化之迹，是日月星辰風雨之屬。二氣良能，是屈伸往來之理。」又曰：「且就這一身看，自會笑語，有許多聰明知識，這是如何得恁地虛空之中，忽然有風有雨，忽然有

雷有電，這是如何得恁地？這都是陰陽相感，都是鬼神。看得到這裏，見得到一身只是個軀殼在這裏，內外無非天地陰陽之氣。如魚之在水，外面水，便是肚裏面水；鯉魚肚裏水，與鯉魚肚裏水一般。」又曰：「以二氣言，則鬼者，陰之靈也；神者，陽之靈也。以一氣言，則至而伸者爲神，反而歸者爲鬼。日自午以前是神，午以後是鬼。月自初三以後是神，十六以後是鬼。草木方發生來是神，彫殘衰落是鬼。人自少至壯是神，衰老是鬼。鼻息呼吸是神，吸是鬼。」如此，則宇宙之間，一切現象，無非鬼神矣。故曰：「以功用謂之鬼神，以妙用謂之神。」

如此，則所謂鬼神，初不足怪，亦不必以爲無何則不足怪，自不待以爲無也。朱子論世俗所謂鬼神怪異者曰：「雨霖風雷，日月晝夜，此鬼神之迹也。此是白日公平正直之鬼神。若所謂有囂於梁，觸於胸，此則所謂不正邪暗，或有或無，或去或來，或聚或散者，又有所謂繒之而應，祈之而獲，此亦所謂鬼神。同一理也。問伊川言鬼神造化之迹，此豈亦造化之迹乎？曰：皆是也。若論正理，則似樹上忽生出花葉，此便是造化之迹。又如空中忽然有雷霆風雨，皆是也。但人所常見，故不之怪。忽聞鬼嘯鬼火之屬，則便以爲怪。不知此亦造化之迹，但不是正理，亦非理之所無也。」又曰：「如起風，做雨，打雷，閃電，花生，花結，非有神而何？自不察耳。才說見鬼神事，便以爲怪。世間自有個道理如此，不可謂無，特非造化之迹耳。此爲得陰陽不正之氣，不須驚惑。所以夫子不語怪，以其明有此事，特不語耳。南軒說無便不是。」此等說，今日觀之，未爲得當。然在當日，無實驗科學可

據：而自古相傳之說，其勢方盛，勢難遽斷爲無。故雖有哲學思想者，於神怪之說，亦多認其有，而以物理釋之。（如王仲任即其人也。）其說雖未得當，然其務以平易可識之理，解釋奇怪不可思議之事，則固學者所有事，而與恆人不同者也。

理學家之論鬼神如此。其說與世俗「人死爲鬼，一切如人，特有形無質」之見，最不相容。自理學家之論推之，可決世俗所謂鬼神者爲無有。然古代書籍，固多以鬼爲有。宋儒最尊古者也，其敢毅然決此藩籬乎？曰：朱子固能之矣。此說也，見於朱子答廖仲晦之書。廖氏原書曰：「德明平日鄙見，未免以我爲主。蓋天地人物，統體只是一性。生有此性，死豈遽亡之？夫水有所激與所礙，則成漚。正如二機，國闢不已，妙合而成人物。夫水固水也，漚亦不得不謂之水，特其形則漚，滅則還復是本水也。人物之生，雖一形具一性，及氣散而滅，還復統體是一而已。豈復分別是人是物之性所未者？正惟祭享一書，推之未行。若以爲果饗耶？神不散非類，大有界限，與統體還一之說不相似。若曰饗與不饗，蓋不必問，但報本之道，不得不然。而詩書卻明言神嗜飲食，祖考來格之類，則又極似有饗之者。竊謂人雖死無知覺，知覺之原仍在。此以誠感，彼以類應。若謂盡無知覺之原，只是一片大虛寂，則斷滅無復實然之理，亦恐未安。君子曰終，小人曰死，則智愚於此，亦各不同。故人不同於鳥獸草木，愚不同於聖。雖以爲公共道理，然人須全而歸之，然後足以安吾之死。不然，則人何用求至聖賢？」

何用與天地相似？倒行逆施，均於一死，而不害其爲人，是真與鳥獸禽魚俱壞，惜不知其所存也。」廖氏之說，卽以所謂鬼者，自理論推之，不能有然。古書明言其有，不敢決其爲無，因而曲生一解，以爲人死，仍有其知覺之原，凝然具在，不與大化爲一。雖與世俗之見異，實仍未脫乎世俗之見之曰窠也。朱子答之曰：「賢者之見，所以不能無失者，正坐以我爲主，以覺爲性爾。夫性者，理而已矣。乾坤變化，萬物受命，雖稟之在我，然其理則非有我之所得私也。所以反身而誠，蓋謂盡其所得乎己之理，則知天下萬物之理，初不外此。非謂盡得我之知覺，則衆人之知覺，皆是此物也。性只是理，不可以聚散言。其聚而生，散而死者，氣而已矣。所謂精神魂魄，有知有覺者，皆氣之所爲也。故聚則有，散則無。若理則初不爲聚散而有無也。但有是理，則有是氣，苟氣聚乎此，則其理亦命乎此耳。不得以水瀕比也。鬼神便是精神魂魄；程子所謂天地之功用，造化之迹；張子所謂二氣之良能，皆非性之謂也。故祭祀之禮，以類而感，以類而應。若性則又豈有類之可言邪？然氣之已散者，既化而無有矣；其根於理而日生者，則固浩然而無窮也。上蔡謂我之精神卽祖考之精神，蓋謂此也。豈曰一受其成形，則此性遂爲吾有，雖死而猶不滅，截然自爲一物，藏乎寂然一體之中，以俟夫子孫之求，而時出以饗之邪？必如此說，則其界限之廣狹，安頓之處所，必有可指言者。且自開闢以來，積至於今，其重併積疊，計已無地之可容矣。是又安有此理邪？且乾坤造化，如大洪鍾，人物生生，無少休息，是乃所謂實然之理，不覺其漸減也。今

乃以一片大虛寂目之，而反認人物已死之知覺，謂之實然之理，豈不誤哉？又聖賢所謂歸全安死者，亦曰：無失其所受乎天之理，則可以無愧而死耳。非以爲實有一物，可奉持而歸之，然後吾之不斷不滅者，得以晏然安處乎冥漠之中也。天壽不貳，修身以俟之，是乃無所爲而然者。與異端爲生死事大，無常迅速，然後學者，正不可同日而語。今乃混而言之，以彼之見，爲此之說，所以爲說愈多而愈不合也。」此論將世俗所謂有鬼之見，摧破殆盡。其曰理無斷滅，氣之根於理而日生者，浩然而無窮，可見宇宙雖不斷滅，而人之自私其身，而不欲其亡，因之強執死後仍有一無體質而有精神之我，純是虛說。如此，則既無天堂可歆，亦無地獄可怖，而用力求不愧不作，全受全歸，可謂無所爲而爲之。其情感，或不如僧教者之熱，其動機，則較之信教者高尚多矣。然宋學所以僅能爲哲學，而不能兼神教之用者，亦以此。（古書所謂有鬼者，自係世俗迷信之談。以理學家之解釋之，無論如何，無有是處。朱子答吳伯豐書曰：「吾之此身，卽祖考之遺體。祖考之所以爲祖考者，蓋具於我而未嘗亡也。是其魂升魄降，雖已化而無有，然理之根於彼者，既無止息，氣之具於我者，復無間斷。吾能致精竭誠以求之，此氣既純一而無所雜，則此理自昭著而不可掩。此其苗脈之較然可觀者也。」上蔡云：「三日喪，七日戒，求諸陰陽上下，只是要集自家之精神。蓋我之精神，卽祖考之精神，在我者既集，卽是祖考之來格也。」此說雖勉強調和，然幾於卽以生人之精神，爲鬼神矣。）

然朱子之說雖妙，而謂氣聚則有，散則無；又謂氣之已散者化而無有，根於理而日生者，浩然無窮；則殊與質力不滅之理相背；而與其大鈞播物，一去便休之說同病。實信伊川大過致之也。語類：「橫渠說形潰反原，以爲人生得此個物事，既死，此個物事卻復歸大原去，又從裏面抽出來生人。如一塊黃泥，既把來做彈子，了；卻依前歸一塊裏面去，又做個彈子出來。伊川便說是不必以既屈之氣爲方伸之氣。若以聖人精氣爲物，游魂爲變之語觀之，則伊川之說爲是。蓋人死則氣散，其生也，又從大原裏面發出來。」此二說者，比而觀之，不必科學，亦不必森嚴之論理，卽以常識推斷，亦覺張子之說爲是，小程之說爲非。以張子能泯有無之見，而小程不然也。而朱子願以程子之說爲是，何哉？蓋由先存一關佛之見，故有此蔽。語類又曰：「釋氏謂人死爲鬼，鬼復爲人。如此，則天地間只是許多人來來去去，更不由造化。生生都廢，卻無此理也。」此朱子所以不信橫渠之說也。殊不知所謂生生，只是變化，並非自無出有。輪迴之說，實較伊川之言，爲合於論理也。

朱子既有此蔽，故於有無聚散，分別不甚清楚。其論鬼神皆然。語類：「問人死時，這知覺便散否？曰：不是散，是盡了。氣盡則知覺亦盡。」又曰：「神祇之氣，常屈伸而不已。人鬼之氣，則消散而無餘矣。其消散，亦有久速之異。人有不伏其死者，所以既死而此氣不散，爲妖爲怪。如人之凶死，及僧道既死，多不散者。聖賢則安於死，豈有不散而爲神怪者乎？」又曰：「死而氣散，泯然無迹者，是其常道理。恁地有託生者，是偶然聚得氣不

散，又怎生去湊著那生氣，便再生。然非其常也。」又曰：「氣久必散。人說神仙，一代說一項。漢世說甚安期生。至唐以來，則不見說了。又說鍾離權、呂洞賓。而今又不見說了。看得來，他也養得分外壽考，然終久亦散了。」又曰：「爲妖孽者，多是不得其死，其氣未散。若是尪羸病死的人，這氣消耗盡了方死，豈復更鬱結成妖孽？然不得其死者，久之亦散。如今打麵做糊，中間自有成小塊核不散底，久之漸漸也自會散。」麵糊中小塊核，可云散而不可云無，朱子未之思也。（朱子之意，蓋以尙有形迹者爲散，豪無形迹，卽尋常人所謂空者爲無。然此說殊誤也。）

朱子論人，則以爲魄屬鬼，氣屬神。其說曰：「人之語言動作是氣，屬神。精血是魄，屬鬼。發用處皆屬陽，是神。氣定處皆屬陰，是魄。知識處是神，記事處是魄。人初生時，氣多魄少。後來魄漸盛，到老魄又少。所以耳聾目昏，精力不強，記事不足。」此據陰陽立說也。又據五行，謂水是魄，火是魂。以左氏有「人生始化曰魄，既生魄，陽曰魂」之語也。因謂人有魄而後有魂，故「魄爲主爲幹」。（案此與卽子「陽有去而陰常居」之說合。）又謂人「精神知覺，皆有魄後方有。」引周子「形既生矣，神發知矣」之說爲證。（周子之意，似不謂形神有先後。）又有取於釋氏地水火風之說。謂火風是魂，地水是魄。人之暖氣是火，運動是風，皮肉屬地，涕唾屬水。魂能思量記度，運用作爲，魄則不能。故人之死也，風火先散，則不能爲祟。」皆據舊說推度而已矣。

朱子論性，亦宗程子「論性不論氣不備，論氣不論性不明」之說。其所以謂論性不論氣不備者，蓋以確見人及禽獸，其不善，確有由於形體而無可如何者也。語類曰：「論萬物之一原，則理同而氣異。觀萬物之異體，則氣猶相近，而理絕不同。（謂萬物已稟之而爲性之理也。）氣相近，如知寒暖，識饑飽，好生惡死，趨利避害，人與物都一般。理不同，如蜂蟻之君臣，只是他義上有一點子明；虎狼之父子，只是他仁上有一點子明；其他更推不去。大凡事物稟得一邊重，便占了其他的。如慈愛的人少，斷制的人多，殘忍。蓋仁多便遮了那義，義多便遮了那仁。」（案此即無惡只有過不及之說。）又曰：「惟其所受之氣，只有許多，故其理亦只有許多。如犬馬，他這形氣如此，故只會得如此事。」此猶今之主心理根於生理者，謂精神現象，皆形體之作用也。惟其然也，故朱子謂人確有生而不善者，欲改之極難。語類曰：「今有一樣人，雖無事在這裏坐，他心裏也只思量要做不好事。如蛇虺相似，只欲咬人。他有甚麼發得善？」又曰：「如日月之光，在露地則盡見之。若在蔀屋之下，有所蔽塞，則有見有不見。在人則蔽塞有可通之理。至於禽獸，則被形體所拘，生得蔽隔之甚，無可通處。」朱子之見解如此，故曰：「人之爲學，卻是要變化氣質，然極難變化」也。此等處，朱子以爲皆從氣質上來。蓋朱子以全不著形迹者爲理，而謂性即理，則性自無可指爲不善。語類曰：「氣之精英者爲神。金木水火土非神，所以爲金木水火土者是神。在人則爲理，所以爲仁義禮智信者是也。」又曰：「人生而靜以上，卽是

人物未生時。人物未生時，只可謂之理，說性未得，此所謂在天爲命也。才謂之性，便是人生以後，此理已墮在形氣之中，不全是性之本體矣。」夫如是，則所謂性者，全與實際相離，只是一可以爲善之物，又安得謂之不善？故朱子將一切不善，悉歸之於氣也。氣何以有不善？朱子則本其宇宙觀而爲言曰：「人所稟之氣，雖皆是天地之正氣，然滾來滾去，便有昏明厚薄之異。」又曰：「天地之運，萬端而無窮。日月清明，氣候和正之時，人稟此氣，則爲清明渾厚之氣，須做個好人。若是日月昏暗，寒暑反常，皆是天地之戾氣。人若稟此氣，則爲不好的人。」此朱子謂氣不盡善之由也。「性無氣質，卻無安頓處。」自朱子觀之，既落形氣之中，無純粹至善者。或問：氣清的人，自無物欲。曰：也如此說不得。口之欲味，耳之欲聲，人人皆然。雖是稟得氣清，才不檢束，便流於欲去。」若不兼論形氣，則將誤以人所稟之性爲純善，而昧於其實在情形矣。此所謂論性不論氣不備也。

其謂論氣不論性不明者，則以天下雖極惡之人，不能謂其純惡而無善。抑且所謂惡者，本非惡，特善之發而不得其當者耳。朱子論：「惡亦不可不謂之性。」曰：「他源頭處都是善，因氣偏，這性便偏了。然此處亦是性。如人渾身都是惻隱而無羞惡，都羞惡而無惻隱，這個便是惡德。這個喚做性邪？不是如墨子之性，本是惻隱。孟子推其弊，到得無父處。這個便是惡亦不可不謂之性也。」然則論氣不論性，不但不知惡人之善處，并其惡性質，亦無由而明矣。夫猶是善性也，所以或發而得其當，或發而不得其當者，形質實爲之累，此所謂

論性不論氣不備。然雖發不得當，而猶是可以發其當之物，則可見性無二性，理無二理。故語類譬諸隙中之日。謂「隙之大小長短不同，然其所受，卻只是此日。」又謂「蔽無少者，發出來天理勝；蔽無多者，發出來私欲勝；便見本原之理，無有不善」也。此而不知其同出一原，則於性之由來，有所誤會矣。此所謂論氣不論性不明也。

善惡既同是一性，所謂惡者，特因受形氣之累而然。夫形氣之累，乃後起之事；吾情所見，雖皆既落形氣之性，然性即是理，不能謂理必附於形質。猶水然，置諸欹斜之器，則其形亦欹斜，不能因吾情只見欹斜之器，遂謂水之形亦欹斜也。故世雖無純善之性，而論性則不得不謂之善也。

性既本善，而形氣之累，特後起之事，則善爲本質，而不善實非必然。故曰：「人生都是天理。人欲卻是後來沒把鼻生底。」此說實與釋氏真如無明之說，消息相通，可參看第二篇。（朱子所謂善者，不外本性全不受形氣之累。本性全不受形氣之累而發出，則所謂天理。而不然者，則所謂人欲也。所謂天理者，乃凡事適得其當之謂，此即周子之所謂中。朱子曰：「有個天理，便有個人欲。蓋緣這天理須有個安頓處，才安頓得不恰好，便有人欲出來。」安頓得恰好，即周子所謂中；守此中而勿失，則周子所謂靜也。故朱子之學，實與周子一脈相承者也。○安頓得恰好者，朱子曰：「飲食，天理也。要求美味，人欲也。」設喻最妙。）

朱子論性之說如此。蓋其所謂善者，標準極高，非全離乎形氣，不足以當之，故其說如此。因其所謂善者，標準極高，故於論性而涉及朱子之所謂氣者，無不加以駁斥；而於程張氣質之說，程子性即理之言，極稱其有功於聖門，有補於後學。蓋論性一涉於氣質，即不免雜以人欲之私，不克與朱子之所謂善者相副；而朱子之所謂性者，實際初無其物，非兼以氣質立論，將不能自圓其說也。（朱子評古來論性者之說，謂「孟子恐人謂性元來不相似，遂於氣質內挑出天之所命者，說性無有不善，不曾說下面氣質，故費分疏。荀子只見得不好底，揚子又見得半上半天下底。」韓子所言，卻是說得稍近，惜其少一氣字，性那裏有三品來？」以氣質論，則凡言性不同者，皆冰釋矣。」氣質之說，起於張程，極有功於聖門，有補於後學。」又謂「程先生論性，只云性即理也，豈不是見得明？真有功於聖門。」○朱子之堅持性即理，而力闢混氣質於性，亦由其欲闢佛而然。故曰：「大抵諸儒說性，多說着氣。如佛氏，亦只是認知覺作用爲性。」知覺作用，固朱子所謂因形氣而有者也。）

人之一生，兼備理氣二者，其兼備之者實爲心。故朱子深有取於橫渠「心統性情」之說，以爲顛撲不破。又詳言之曰：「性者，心之理。情者，性之動。心性情之主。」又譬之曰：「心如水，性猶水之靜，情則水之流，欲則水之波瀾。」又曰：「心如水，情是動處，愛即流向去處。」又以「心爲大極，心之動靜爲陰陽。」孟子所善四端，朱子謂之情，曰：「性不可言，所以言性善者，只看惻隱辭遜四端，如見水流之清，則知源頭必清矣。」心兼

動靜言，則動靜皆宜致養。故朱子曰：「動靜皆主宰，非靜時無所用，至動時方有主宰。」又謂「惟動時能順理，則無事時能靜。靜時能存，則動時得力。須是動時也做工夫，靜時也做工夫也。」

朱子論道德，亦以仁爲最大之德，靜爲求仁之方。其仁說謂「仁者仁之本體。禮者仁之節文。義者仁之斷制。知者仁之分別。信以見仁。義禮智實有此理。必先有仁，然後有義禮智信。故以先後言之，則仁爲先。以大而言之，則仁爲大。」又謂「明道聖人以其情順萬物而無情，說得最好。」（語類曰：「動時靜便在這裏。順理而應，則雖動亦靜，不順理而應，則雖塊然不交於物，亦不能得靜。」順理而應，即所謂以其情順萬物而無情也。）至於實行之方，則亦取伊川「涵養須用敬，進學在致知」二語。而於用敬，則提出求放心三字；於致知，則詳言格物之功，實較伊川言之尤爲親切也。

中庸曰：「喜怒哀樂之未發，謂之中。發而皆中節，謂之和。中也者，天下之大本也。和也者，天下之達道也。」龜山門下，以「體認大本」爲相傳指訣。謂執而勿失，自有中節之和。朱子以爲少偏。謂「才偏便做病。道理自有動時，自有靜時。學者只是敬以直內，義以方外，見得世間無處不是道理。不可專要去靜處求。所以伊川謂只用敬，不用靜，便說平也。」又云：「周先生只說一者無欲也，這話頭高，卒急難淡泊。尋常人如何便得無欲？故伊川只說個敬字。教人只就這敬字上捱去。庶幾執捉得定，有個下手處。要之皆只要人於此心上見得。」

分明，自然有得爾。然今之言敬者，乃皆裝點外事，不知直截於心上求功，遂覺累墜不快活。不若眼下於求放心處有功，則尤得力也。」此朱子主敬之旨也。又曰：「敬有死敬，有活敬，若只守着主一之敬，遇事不濟之以義而不活，然後敬便有義，義便有敬，靜則察其敬與不敬，動則察其義與不義，敬義夾持，循環無端，則內外透徹。」

其論致知，則盡於大學補傳數語。其言曰：「人心之靈，莫不有知，而天下之物，莫不有理。惟於理有未窮，故其知有不盡也。是以大學始教，必使學者，即凡天下之物，莫不因其已知之理而益窮之，以求至乎其極。至於用力之久，而一旦豁然貫通焉，則衆物之表裏精粗無不到，而吾心之全體大用無不明矣。」此數語，謂理不在心而在物，最爲言陽明之學者所詆背。然平心論之，實未嘗非各明一義，至於致知力行，朱子初未嘗偏廢。謂朱子重知而輕行，尤誣詆之辭也。今摘錄語類中論知行之語如下：

語類曰：「動靜無端，亦無截然爲動爲靜之理。且如涵養致知，亦何所始？^上謂學莫先於致知，是知在先。又曰：未有致知而不在敬者，則敬亦在先，從此推去，只管恁地。」是朱子初未嘗謂知在先行在後也。又曰：「自家若得知是人欲蔽了，便是明處。只這上，便緊緊着力主定，一面格物。」是朱子實謂力行致知，當同時並進也。又曰：「而今看道理不見，不是不知，只是爲物塞了。而今粗法，須是打疊了胸中許多惡雜，方可。」一則并謂

治心在致知之前矣。又曰：「方其知之而未及行之，則知尙淺。既親歷其域，則知之益明，非前日之意味。」則知必有待於行，幾與陽明之言，如出一口矣。又朱子所謂格物致知，乃大學之功，其下尙有小學一段工夫。論朱子之說者，亦不可不知。朱子答吳晦叔曰：「夫泛論知行之理，而就一事以觀之，則知之爲先，行之爲後，無可疑者。然合夫知之淺深，行之大小而言，則非有以先成乎其小，亦將何以馴致乎其大者哉？蓋古人之教，自其孩幼，而教之以孝悌誠敬之實；及其少長，而傳之以詩書禮樂之文，皆所以使之即夫一事一物之間，各有以知其義理之所在，而致涵養踐履之功也。及其十五成童，學於大學，則其洒掃應對之間，禮樂射御之際，所以涵養踐履之者，略已小成矣。於是不離乎此，而教之以格物以致其知焉。致知云者，因其所已知者，推而致之，以及其所未知者，而極其至也。今就其一事之中而論之，則先知後行，固各有其序矣。誠欲因夫小學之成，以進乎大學之始，則非涵養踐履之有素，亦豈能以其雜亂紛糾之心，而格物以致其知哉？故大學之書，雖以格物致知爲用力之始，然非謂初不涵養踐履，而直從事於此也。又非謂物未格，知未至，則意可以不誠，心可以不正，身可以不脩，家可以不齊也。若曰：必俟知至而後可行，則夫事親從兄，承上接下，乃人生所一日不能廢者，豈可謂吾知未至，而暫輟以俟其至而後行之說？讀此書而朱子於知行二者，無所輕重先後，可以曉然矣。」

偏重於知之說，朱子亦非無之。如曰：「講得道理明時，自是事親不得不孝，事兄不得不弟，交朋友不得不信。」論前人以黑白豆澄治思慮（起一善念，則投一白豆於器中，起一惡念，則投一黑豆於器中）曰：「此則是個死法。若更加以讀書窮理底工夫，則去那般不正底思慮，何難之有？」皆以爲知卽能行。（惟此所謂知者，亦非全離於行，必且力行，且體驗，乃能知之。）蓋講學者，大抵係對一時人說話。陽明之時，理學旣已大行，不患此理之不明，惟患知之而不能有之於己，故陽明教以知行合一之說。若朱子之時，則理學尙未大行，知而不行之弊未著，惟以人之不知爲患，故朱子稍側重於知。此固時代之異，不足爲朱子諱，更不容爲朱子咎。朱子、王子，未必不易地皆然也。讀前所引朱子論知行之說，正可見大賢立言之四平八穩，不肯有所偏重耳。（在今日觀之，或以爲不免偏重。然在當日，則已力求平穩矣。必先尙論其世，乃可尙論其人。凡讀先賢之書皆然，亦不獨朱子也。）

以上爲朱子學說之大略。其與他家辯論之語，別於講他家之學時詳之。

朱子之不可及處，實在其立身之剛毅，進學之勇猛。今錄其言之足資激發者如下。俾學者知所矜式焉。語類曰：「事有不當耐者，豈可常學耐事？學耐事，其弊至於苟賤不廉。學者須有廉隅牆壁，便可擔負得大事去。如子路，世間病痛都沒了。親於其身爲不善者不入，此大者立也。」又曰：「恥有當忍者，有不當忍者。今有

一樣人，不能安貧，其氣餒屈，以至立脚不住，亦何所不至？因舉呂舍人詩云：逢人卽有求，所以百事非。」又曰：「學者常常以志士不忘溝壑爲念，則道理重而計較死生之心輕矣。况衣食至微末事，不得亦未必死，亦何用犯義犯分，役心役志以求之邪？」某觀今人，因不能咬菜根，而至於違其本心者，衆矣！可不戒哉？惟君子，然後知義理之必當爲，與義理之必可恃。利害得失，既無所入於其心，而其學又足以應事物之變，是以氣勇謀明，無所憚懼。不幸蹉跌，死生以之。小人之心，一切反是。」答劉季章曰：「天下只有一理，此是卽彼非，此非卽彼是，不容並立。故古之聖賢，心存目見，只有義理，都不見有利害可計較。日用之間，應事接物，直是判斷得直截分明。而推以及人，吐心吐膽，亦只如此，更無回互。若信得及，卽相與俱入聖賢之域。若信不及，卽在我亦無爲人謀而不盡的心。而此理是非，昭然明白；今日此人雖信不及，向後他人，須有信得及底，非但一人之計也。若如此所論，則在我者，未免視人顏色之可否，以爲語默，只此意思，何由能使彼信得及乎？以上數條，皆是見朱子立身之剛毅。國有道，不變塞焉。國無道，之死不變。眞足使貪夫廉，懦夫有立志也。其論進學之語云：「書不記，熟讀可記。義不精，細思可精。惟有志不立，直是無著力處。只如而今，貪利祿而不貪道義，要作貴人而不要作好人，皆是志不立之病。直須反覆思量，究見病痛起處，勇猛奮躍，不復作此等人。一躍躍出，見得聖賢所說，千言萬語，都無一事不是實語，方始立得此志。就此積累工夫，迤邐向上去，大有事在。」又曰：「直須抖擻精神。」

神，莫要昏鈍。如救火治病然，豈可悠悠歲月？」又曰：「學者讀書，須是於無味處致思。至於羣疑並興，寢食俱廢，乃能驟進。因歎驟進二字，最下得好。須是如此。若進得些子，或進或退，若存若亡，不濟事。如用兵相殺，爭得些兒，小可一二十里地，也不濟事。須大殺一番，方是善勝。」以上數條，皆足見朱子進學之勇猛。能使玩時愒日者，讀之悚然汗下。固知一代大儒，其立身行己，必有異於尋常人之處也。凡我後學，可不懷見賢思齊之念哉？

篇九 象山之學

一種學問，必有其興起之時，亦必有其成熟之時。興起之時，往往萬籟爭鳴，衆源竝發。至成熟之時，則漸匯爲一二派。北宋之世，蓋一種新哲學興起之時；南宋之世，則漸就成熟之時也。其時講學有名者，乾淳三先生而外，當推陸象山。乾淳三先生：呂之學較粗，其後遂流爲永嘉、永康兩派。雖可謂獨樹一幟，然在宋代學派中，不過成割據之局。南軒之學，與朱子大同，并不能獨樹一幟。（南軒亦主居敬窮理，惟稍側重於居敬耳。其說謂「必先從事於敬，使人欲盡除，乃可以言格物。否則辨擇於發見之際，恐不免於紛擾。」案此等議論，朱子亦非無之。朱子謂「南軒伯恭之學皆疏略。南軒疏略，從高處去。伯恭疏略，從卑處去。」蓋謂其操持之功

稍欠。至其學問宗旨，則無甚異同也。）其與朱學對峙，如晉楚之爭霸中原者，則象山而已。

朱子謂「上蔡之說，一轉而爲張子韶，張子韶一轉而爲陸子靜。」又謂「上蔡說仁說覺，分明是禪。」又云：「如今人說道，愛從高妙處說，便入禪去。自上蔡以來已然。」又謂「明道說話渾淪，然太高，學者難看。」又云：「程門高第，如謝上蔡、游定夫、楊龜山，稍皆入禪學去。必是程先生當初說得高了，他們只瞞見上一截，少下面著實工夫，故流弊至此。」然則象山之學，實遠承明道。（象山不甚稱伊川，而稱明道處極多。）蓋道理自有此兩派，至南宋衆流漸匯時，朱陸各主其一也。（上蔡以有知覺痛癢爲仁。又曰：「桃杏之核，爲種而生者，謂之仁，言有生之意。」又曰：「堯舜湯武事業，只是與天理合一。幾曾做作蓋世的功業，如太空中一點雲相似，他把做甚麼？」說皆極似象山。然實自明道識仁、定性篇出。）

朱陸之異，象山謂「心卽理」，朱子謂「性卽理」而已。惟其謂性卽理，而心統性情也，故所謂性者，雖純粹至善，而所謂心者，則已不能離乎氣質之累，而不免雜有人欲之私。惟其謂心卽理也，故萬事皆具於吾心，吾心之外，更無所謂理；理之外，更無所謂事。一切工夫，只在一心之上。二家同異，後來雖枝葉繁多，而溯厥根源，則惟此一語而已。

象山年譜云：「象山三四歲時，思天地何所窮際，不得，至於不食。父呵之，乃姑置，而胸中之疑終在。後十

餘歲讀書，至宇宙二字，解者曰：四方上下曰宇，往古來今曰宙。忽大省曰：元來無窮。人與天地萬物，皆在無窮之中者也。乃援筆書曰：宇宙內事，乃己分內事。己分內事，乃宇宙內事。又曰：宇宙便是吾心，吾心即是宇宙。東海有聖人出焉，此心同，此理同也。西海有聖人出焉，此心同，此理同也。南海北海有聖人出焉，此心同，此理同也。千百世之上，有聖人出焉，此心同，此理同也。千百世之下，有聖人出焉，此心同，此理同也。」象山之攝萬有於一心，自小時已然矣。

惟其然也，故象山之學，極爲「簡易直截」。（此陽明稱之之語。）其言曰：「道徧滿天下，無些小空闕。四端萬善，皆天之所予，不勞人妝點。但是人自有病，與他相隔了。」此言人心之本善也。又曰：「此理充塞宇宙，所謂道外無事，事外無道。舍此而別有商量，別有趨向，別有規模，別有形迹，別有行業，別有事功，則與道不相干；則是異端，則是利欲，謂之陷溺，謂之曰窳，說只是邪說，見只是邪見。」此言欲做工夫，惟有從事於一心也。又曰：「涓涓之流，積成江河。泉源方動，雖只有涓涓之微，卻有成江河之理。若能不舍晝夜，如今雖未盈科，將來自盈科；如今雖未放乎四海，將來自放乎四海。然學者不能自信，見夫標末之盛者，便自荒忙，舍其涓涓而趨之，卻自壞了。曾不知我之涓涓，雖微，卻是真；彼之標末，雖多，卻是僞。恰似僞水來，其涸可立而待也。」此言從事於此一途者之大可恃也。象山嘗曰：「余於踐履，未能純一。然才自警策，便與天地相似。」又語學者：

「念慮之不正者，頃刻而知之，即可以正。念慮之正者，頃刻而失之，即可不正。」又謂：「我治其大而不治其小，一正則百正。」誠不愧簡易直截矣。

象山之學，實陽明所自出，故其言有極相似者。如曰：「人精神在外，至死也勞擾，須收拾作主宰，收得精神在內，當惻隱，即惻隱；當羞惡，即羞惡。誰欺得你？誰瞞得你？」居象山，多告學者曰：「汝耳自聰，目自明，事父自能孝，事兄自能弟，本無欠闕，不必他求，在自立而已。」皆與陽明如出一口。

象山之學，以先立乎其大者為主。故於榜人門戶，無所自得者，深鄙視之。於包藏禍心，作偽於外者，尤所痛絕。其言曰：「志於聲色貨利者，固是小。剿摸人之言語者，與他一般是小。」又曰：「學者須是打疊田地淨潔，然後令他奮發植立。若田地不淨潔，則奮發植立不得；亦讀書不得。若讀書，則是藉寇兵，資盜糧。」象山非謂不當讀書，亦非謂不當在事上磨練。特如吾儕今日之居心，則自象山視之，皆不足讀書，亦不足磨練者耳。所謂先立乎其大者也。

象山與陽明，學皆以心為主，故有心學之稱。凡從事於心學者，其於外務必較疏，自省之功則較切；其能發覺心之病痛，亦較常人爲深；故其言多足發人深省。象山策勵人之語曰：「要當軒昂奮發，莫恁地沉埋，在卑陋凡下處。」又云：「處難終日營營，無超然之意。須是一刀兩斷。何故營營如此？營營底討個甚麼？」此等

語，真是暮鼓晨鐘，令吾輩日在世情路上討生活者，悚然汗下矣。陸子之訪朱子於南昌也，朱子請登白鹿洞講席，講君子喻於義一章。後刻其文於石。其言曰：「此章以義利判君子小人，辭旨曉白。然讀之者苟不切己觀省，恐亦未能有益也。某平日讀此，不無所感。竊謂學者於此，當辨其志。人之所喻，由其所習；所習由其所志。志乎義，則所習者必在於義；斯喻於義矣。志乎利，則所習者必在於利；斯喻於利矣。故學者之志，不可不辨也。科舉取士久矣，名儒巨公，皆由此出。今爲士者，固不能免此。然場屋之得失，顧其技與有司好惡如何耳。非所以爲君子小人之辨也。而今世以此相尚，使汨沒於此，而不能自拔，則終日從事者，雖曰聖賢之書，而要其志之所鄉，則有與聖賢背而馳者矣。推而上之，則又惟官資崇卑，祿廩厚薄是計。豈能悉心力於國事民隱，以無負於任使之者哉？從事其間，更歷之多，講習之熟，安得有所喻？顧恐不在於義耳。誠能深思是身，不可使之爲小人之歸，其於利欲之習，但焉爲之痛心疾首，專志乎義，而日勉焉。博學審問，慎思明辨而篤行之。由是而進於場屋，其文必皆道其平日之學，胸中之蘊，而不詭於聖人。由是而仕，必皆供其職，勤其事，心乎國，心乎民，而不爲身計。其得不謂之君子乎？」此文滑口讀過，亦只平平。細思之，真乃一棒一條痕，一捆一掌血。宜乎朱子謂其「一切中學者隱微深痼之病」，而能令聽者悚然動心，至於泣下也。夫鈞是人也，或爲大人，或爲小人，何也？流俗不察，或曰：是地位爲之，遭際爲之。斯固然也。然人卽至貧至賤，必有可以自奮

之途。何以并此而不能爲解之者？或曰：人固有智慧賢不肖之不同，天限之也。斯固然也。然尙論古人，縱觀竝世，或則立德，或則立功，或則立言，其天資高於我者固多，才智僅與我等者亦自不乏，而何以彼有成而我無成？解者將曰：彼學焉，我未嘗學。彼學，我何以不學？流俗或又將曰：地位爲之，遭際爲之。然則我之地位，我之遭際，果所成就者，必止於我之今日；而我之所以自靖者，已豪髮無遺憾乎？無論何人，不敢應曰然也。推論至此，則圖窮而匕首見矣。志爲之也。天下儘有在同一境地中，彼之所見，此則不見；彼之所聞，此則不聞者。否則同在一學校中，所讀之書同也，所師所友亦相同，因天資之高下，學業成就，有淺深大小可也；而何以或爲聖賢，或爲豪傑，或爲中庸，或且入於下流哉？無他。初則好惡不同，因好而趨之，因惡而去之。久之，則所趨者以習焉而愈覺其便安，雖明知其非，而不能去；甚或入鮑魚之肆，久而不知其臭。所惡者以不習焉而日益荆棘，雖明知其善，亦無由自奮以趨之；甚或并不知其善矣。此則陸子所謂所喻由其所習，所習由其所志者也。人徒見兩方向相反之線，引而愈遠，而忽知其始之發自一點哉？吾儕今日所志，果何如乎？誠有如陸子所謂先立必爲聖賢之志者乎？抑亦如陸子所謂從事聖賢之書，而志之所向，則與聖賢背馳者乎？由前之說，則卽陸子所謂才自警策，便與天地相似者，何善如之？由後之說，則豈徒不能上進爲聖賢，誠恐如陸子所云：更歷愈多，講習愈熟，所喻愈深，而去聖賢且益遠也。可不懼哉？

工夫既惟在一心，則從事於學者，首須將「田地打掃潔淨。」然此事最難。陸子曰：「人心只愛去泊著事。教他棄事時，如猢猻失了樹，更無住處。」又曰：「內無所累，外無所累，自然自在。才有一些子意，便沈重了。」（恆人所好，不越聲色貨利名位之私。終日泊著事，則將如處難之終日營營，無超然之意矣。凡事根株盡絕最難。世非無自謂能超然於利欲之外者。然試一自檢勘，果能無一些子意，而免於陸子所謂沉重之患者乎？不可不深自省也。）謂此義也。然此自謂不可牽累於物欲。至於心地澄澈，然後去理會事物，則非徒無害，抑且有益。所謂「大綱提掇來，細細理會去」也。（所謂先立乎其大者也。）又人之所知，固由其最初意之所向。然所知愈多，所志亦愈大，故知識亦不可以已。陸子曰：「夫子曰：吾十有五而志於學。今千百年，無一人有志，也是怪他不得。志個甚底？須是有智識，然後有志願。」又曰：「人要有大志。常人泊沒於聲色富貴間，良心善性，都蒙蔽了。今人如何便解有志，須先有智識始得。」（詆陸王之學者，每謂其盡棄萬事，專主一心，其實殊不然也。）朱子語錄：「子靜只是拗。伊川云：惟其深喻，是以篤好。子靜必要云好後方喻。看來人之於義利，喻而好也多。若全不曉，又安能好。然好之則喻矣。畢竟伊川說占得多。」（案喻而後好，好而後喻，自常識言之，兩說皆通，莫能相破。必深論之，則好之與喻，原係一事，不過分爲兩語耳。此亦見陽明知行合一之說之確也。）

朱陸異同，始於淳熙三年乙未鵝湖之會，而成於乙巳丙午之間。乙未之歲，朱子年四十六，象山年三十七。東萊以二家講學有異同，欲和會之，約會於信州之鵝湖寺。朱子及復齋象山皆會。象山語錄：「先兄復齋謂某曰：伯恭約元晦爲此集，正爲學術異同。某兄弟先是不同，何以留鵝湖之同？先兄遂與某議論致辨。又令某自說。至晚罷。先兄云：子靜之說是。次早，某請先兄說。先兄云：某無說。夜來思之，子靜之說極是。方得一詩云：孩提知愛長知欽，古聖相傳只此心。大抵有基方築室，未聞無址忽成岑。留情傳注方榛蕪，著意精微轉陸沈。珍重友朋勸琢切，須知至樂在於今。」某云：詩甚佳。但第二句微有未安。先兄云：說得恁地，又難求索，更要如何？某云：不妨一面起行，某沿途卻和此時。及至鵝湖，伯恭首問先兄別後新功。先兄舉詩才四句，元晦顧伯恭曰：子壽早已上子靜船了也。舉詩罷，遂致辨於先兄。某云：某途中和得家兄此時城嘉興哀宗廟欽，斯人千古不磨心。涓流積至滄溟水，卷石崇成泰華岑。易簡工夫終久大，支離事業竟浮沉。舉詩至此，元晦失色。至末二句云：欲知自下升高處，真僞先須辨自今。元晦大不懌。於是各休息。翌日，二公商量數十折。議論來莫不悉破其說。繼日，凡致辯，其說隨屈。伯恭甚有虛心相聽之意，竟爲元晦所尼。所謂議論數十折者，悉已不可得聞。惟象山年譜謂「鵝湖之會，論及教人，元晦之意，欲令人泛觀博覽，而後歸之約。二陸之意，欲先發明人之本心，而後使之博覽。朱以陸之教人爲太簡，陸以朱之教人爲支離」而已。朱子年譜曰：「其後子壽頗悔其非，而

子靜終身守其說不變。一案子書以五年戊戌訪朱子於鉛山。是歲朱子與呂伯恭書曰：「近兩得子壽兄弟書，卻自訟前日偏見之說。不知果如何？」庚子，東萊與朱子書曰：「陸子壽前日經過，留此二十餘日。幡然以鵝湖所見爲非，甚欲著實看書講論。心平氣下，相識中甚難得也。」是歲九月，子壽卒。朱子祭之以文。有曰：「別未幾時，兄以書來，審前說之定，曰子言之可懷。遽子辭官而未幾，停驂道左之僧寮。兄乃枉車而來教，相與極論而無猜。自是以還，道合志同。」云云。此所謂子壽頗悔其非者也。象山則庚子 朱子答呂伯恭書曰：「其徒曾立之者來訪，持得子靜答渠書與劉淳叟書，卻說人須是讀書講論。然則自覺其前說之誤矣。但不肯翻然說破，今是昨非之意，依舊遮前掩後，巧爲詞說。」又一書云：「子靜似猶有舊來意思。聞其門人說子壽言其雖已轉步，而未曾移身。然其勢久之亦必自轉。回思鵝湖講論時，是甚氣勢？今何止十去七八邪？」案陸子但欲先發明人之本心，而後使之博覽，非謂不必讀書講論。則朱子謂其自覺前說之誤，實屬億度之辭。在陸子初未嘗改。故辛丑 朱子答呂伯恭書：「謂子靜近日講論，比舊亦不同。但終有未盡合處。」又一書云：「子靜舊日規模終在。」此則所謂子靜終身守其說不變者也。朱子癸卯答項平父書曰：「大抵子思以來，教人之法，惟以尊德性、道問學兩事爲用力之要。今子靜所說，專是尊德性事。而熹平日所論，卻是道問學上多了。所以爲彼學者多持守可觀，而看得義理全不仔細。又別說一種杜撰道理，遮蓋不肯放下。而熹自覺雖於義理

不敢亂說，卻於緊要爲己爲人上，多不得力。今當反身用力，去短截長，集思廣益，庶幾不墮一邊耳。」又答陳庸仲書：「陸學固有似禪處。然鄙意近覺婺州朋友，專事見聞，而於自己身心，全無功夫。所以每勸學者兼取其善，要得身心稍稍端靜，方於義理知所抉擇。吾道之衰，正坐學者各守己偏，不能兼取衆善，所以終有不明不行之弊。」丙午答陸子靜書：「道理雖極精微，然初不在耳目見聞之外。是非黑白，卽在面前。此而不察，乃欲別求玄妙於意慮之表，亦已誤矣。邇來日用功夫，頗覺有力。無復向來支離之病。甚恨未得從容面論。未知異時相見，尙復有異同否耳？」雖仍各持一說，議論頗極持平。循是以往，未必不可折衷和會。然癸卯歲，朱子撰曹立之墓表，陸子之徒，謂攻其短，頗爲不平。丙午，朱子答程正思書，又謂「去年因其徒來此，狂妄凶狠，手足盡露，乃始顧然鳴鼓攻之。」而關陸學之語又多矣。然及淳熙十五年戊申，無極太極之辯，詞氣雖少忿戾，究仍以辨析學術之意爲多。蓋朱陸兩家，學問途轍，雖或不同，其辨論亦止於是。至於入主出奴，叫囂狂悖，甚有非君子之詞者，則其門下士意氣用事者之失，及後世姝姝暖暖者，推波助瀾之爲之也。

朱子之學，所以與陸子異者，在陸子以心爲至善，而朱子則謂心雜形氣之私，必理乃可謂之至善。故語錄謂「陸子靜之學，千般萬般病，只在不知有氣稟之雜，把許多粗惡的氣，都把做心之妙理，合當恁地，自然做將去」也。其所以一認心爲至善，一以心爲非至善者，則以陸子謂理具於心，朱子謂理在心外。陸子曰：「天

理人欲之言，亦不是至論。若天是理，人是欲，則天人不同矣。此其原蓋出於老氏。樂記曰：人生而靜，天之性也。感於物而動，性之欲也。物至知知，然後好惡形焉。不能反躬，天理滅矣。天理人欲之言，蓋出於此。樂記之言，亦根於老氏。「排天理人欲之說，即謂理出於心也。」朱子曰：「古人之學，所貴於存心者，蓋將推此以窮天下之理。今之所謂識心者，乃欲恃此而外天下之理。」（答方賓王書）則明謂理在心外矣。然二家謂理在心之內外雖異，而其謂理之當順則同。陸子與朱濟道書曰：「此理在宇宙間，未嘗有所隱遁。天地之所以爲天地者，順此理而無私焉耳。人與天地竝立爲三極，安得自私而不順此理哉？」其說與朱子初無以異。此其所以途轍雖殊，究爲一種學問中之兩派也。

劉蕺山曰：「世言上等資質人，宜從陸子之學；下等資質人，宜從朱子之學。吾謂不然。惟上等資質，然後可學朱子。以其胸中已有個本領，去做零碎工夫，條分縷析，亦自無礙。若下等資質，必須識得道在吾心，不假外求，有了本領，方去爲學。不然，只是向外馳求，誤卻一生矣。」又曰：「大抵諸儒之見，或同或異，多係轉相偏矯，因病立方。盡是權教。至於反身力踐之間，未嘗不同歸一路。」黃梨洲明儒學案發凡曰：「學問之道，以各人自用得著者爲真。凡倚門傍戶，依樣葫蘆者，非流俗之士，則經生之業也。此編所刊，有一偏之見，有相反之論。學者於其不同處，正宜著眼理會。所謂一本而萬殊也。以永濟水，豈是學問？」此數條，皆足爲爭朱陸異同

者，痛下鍼砭。

象山之學，當以慈湖爲嫡傳。而其流弊，亦自慈湖而起。象山常說顏子克己之學。其所謂克己者，非如常人謂克去利害忿欲之私也。乃謂於意念起時，將來克去。意念克去，則還吾心體之本然。此心本廣大無邊，純粹至善。功力至此，則得其一，萬事畢矣。慈湖嘗撰己易，謂天地萬物皆一道，道即易，易即吾心。（大旨謂「天者吾性中之象，地者吾性中之形，在天成象，在地成形，皆吾之所爲也。坤者乾之兩者也。其他六卦乾之錯綜者也。故舉天下非有二物。」）此即象山「宇宙內事，皆己分內事；己分內事，乃宇宙內事」之說也。又謂人當以天地爲己，不當以耳目鼻口爲己，此則克去己私之本。蓋人與道本一（道與天地萬物爲一），所以隔之者乃私意，而私意由形體而起也。（即由我而起。）職是故，慈湖之學，以「不起意」爲宗。所謂意者，慈湖謂其狀不可勝窮。「窮日之力，窮年之力，縱說橫說，廣說備說，不可得而盡。」要之由己而起者皆是。（以形體爲己之己。）然則心與意奚辨？曰：「一則爲心，二則爲意。直則爲心，支則爲意。通則爲心，阻則爲意。」（即以天地萬物爲一體爲心，物我相對待爲意。）人心本與道一，意則蔽之。故須將意克盡，心體乃復見也。人之惡，何一非由意而起？苟能從此克去，則一切惡一掃而空。此誠最根本之義，亦最簡易之法矣。然此語談何容易？吾人自旦之暮，自暮至旦，刻刻不斷，生息於意念之中者，既非一日；加以衆生業力，相薰相染，直是重即我，

我卽意。一朝覺悟，而欲克去，所費功力，蓋十百千萬於建立事功，研求學問者，而未有已也。能見及此，不過覺悟之始。自此以往，功力方將無窮。而慈湖以救當時學者沉溺於訓詁詞章之習，所說多在絕意明心，而不及於斬艾持守。及門弟子，遂以入門義爲究竟法。偶有所見，卽以爲道在是，而不復加省察克治之功。後來王門之弊，亦多如是。此則自謂得心體之本然，而不知其仍息於意念之中也。（己易：「昏者不思而遂己，可乎？」）正恐不能遂己。誠遂己，則不學之良能，不慮之良知，我所自有也；仁義禮知，我所自有也；萬善自備也；百非自絕也；意必固我，無自而生也；雖堯舜禹湯文武周公孔子，何以異於是？「此中正恐不能遂己一句，最須注意。」○袁絮齋稱慈湖：「平生踐履，無一瑕玷。處閨門如對大賓，在閨室如臨上帝。年登耄耋，兢兢敬謹，未嘗須臾放逸。」可見其持守之嚴。此固學者之誤，不能以咎慈湖。然慈湖立教之少偏，似亦不能辭其責矣。袁絮齋宗旨，與慈湖同。然其教人，謂「心明則本立。」又謂「當精思以得之，兢兢以守之。」似較慈湖爲周備也。

篇十 浙學

理學何學也？談心說性，初不切於實際，而其徒自視甚高。世之言學問者，苟其所言，與理學家小有出入，則理學家必斥爲俗學，與之斤斤爭辯。其所爭者，不過毫釐之微，而其徒視之，不翅丘山之重。此果何義哉？果

其別有所見歟抑實無所有，而姑揭然以自大也？

隨事應付，常人本自能之。哲學家所以異於常人者，乃在每一問題，必追究到底，而不肯作就事論事之語。此義前已言之。理學亦一種哲學也。故理學之異於尋常學問者，在於澈底。（以一種學問與尋常人較，則尋常人之所言，恆不澈底，而學問家之所言，恆較澈底。以尋常學問與哲學家較，則尋常學問之所言，恆不澈底，而哲學家之所言，恆較澈底。故以尋常人與言學問者較，猶以尋常學問與哲學家較也。）澈底即追究到底之謂也。理學家就宇宙間事物，追究到底，而得其不易之則焉，即其所謂理也。此理也，自理學家言之，則亙古今而不變，通世界而無二。大之至於壽夭所不能紀，巧曆所不能窮，而莫之能外。小之至於耳目所不能聽睹，心思所不能想象，而亦不能不由。天下事由之則是，背之則非。一切學問議論，與此合者，看似迂曲，實甚迅捷，看似背繆，實極的當。而不然者，則皆似是而非；由之雖可得近功，而隱禍實已伏於其後者也。是則所謂俗學也已。（理學家曰：言天理而不能用諸人事，是謂虛無，是為異學。言人事而不本之於天理，是為粗淺，是為俗學。）

職是故，理學家之行事，不求其有近功，而必求其根柢上無絲毫破綻。所以貴王賤霸者以此。以一身論，亦必反諸己而無絲毫之嫌，而後可以即安。否則雖功蓋天下，澤被生民，猶為藝取，猶為徼幸也。（理學家所以不肯輕出身任天下事者，有二義：（一）己不正，必不能善事。朱子謂「多只要求濟事，不知自身不立，事決

不能成。自心若有一毫私意未盡，皆足敗事。」是也。(二)則論至精微處，天下至常不易之理，如幾何學之只有一點。此一點稍偏即不是，即必有後禍。而有心爲善，即已偏而與此點離矣。鄒聚所曰：「今人要做忠臣的，只倚著在忠上，便不中了。爲此驚世駭俗之事，便不庸了。自聖人看，還是索隱行怪。」理學家之精神，專注於內，事事求其至當不易，故覺得出身任事之時甚難。(理學家之見解如此，其言自不能不與尋常人大異。尋常人目爲迂曲，爲背繆，彼正忻然而笑，以世人爲未足與議也。

理學家之議論，自理論言之，固亦無以爲難。然天下事理，至無窮也。凡事必從根柢上做起，不容絲毫苟且，固是一理。然必先撐持目前，根柢上事，乃可徐圖，亦是一理。(如謂產當公不常私，豈非正論。然專將目前社會破壞，共產之新望，豈遂得達。欲求共產，有時或轉不得不扶翼私產矣。世界大同，豈非美事。然欲躋世界於大同，必先自強其國。若效徐偃宋襄之爲，轉足爲世界和平之累也。)以一人言之，必自己所學，十分到家，乃可出而任事。又必事事照吾主張做法，不容有絲毫委曲，乃得免於枉尺直尋之誚，而其事亦無後災。固是一理。然如此，則天下將永無可爲之日，而吾身亦永無出而任事之時。以天下爲己任者，正不容如此其拘。亦是一理。由前之說，則理學家之所以自處。由後之說，則非理學者之所以難理學家也。宋時所謂浙學者即如此。

浙學分永嘉永康二派。永嘉一派，道原於薛良齋，而大成於葉正則。與宋時所謂理學者，根本立異。永康一派，道原於呂東萊，變化於其弟子約及陳同甫。其所爭者，則以理學家所謂天理，範圍太隘，而欲擴而充之也。今略述其說如下：

薛良齋問學於袁道潔，袁道潔問學於二程，故永嘉之學，亦出伊洛。良齋好言禮樂兵農，而學始稍變。陳君舉繼之，宗旨亦與良齋同。然不過講求實務，期見諸施行而已。（君舉頗主周官，謂不能以王安石故，因廢食。）於伊洛宗旨，未嘗顯有異同也。至葉水心出，而其說大變。水心之意，以爲聖人之言，必務平實。凡幽深玄遠者，皆非聖人之言。理學鉅子，當推周、張、二程，其哲理皆出於易。故水心於易，力加排斥，謂惟象、象係孔子作，十翼不足信。而後儒講誦，於此獨多。魏晉而後，既與老莊並行，號爲孔老。佛說入中國，亦附會十翼，於是儒釋又並稱。使儒與釋老相雜者，皆十翼爲之。世之好言十翼者，皆援儒以入釋老者也。有范巽之者，（名育，鄒州三水人。）受業於橫渠，而其序正蒙，謂其以「六經所未載，聖人所不言者，與浮屠、老子辯，實爲冠盜設，郭助之扞禦。」水心深然其說。謂浮屠之道非吾道，學者援大傳「天地絪縕」，「通晝夜之道而知」，「不疾而速，不行而至」，「子思」，「誠之不可掩」，「孟子」，「大而化，聖而不可知」，而曰：吾所有之道固若是，實陽儒而陰釋者也。案宋儒之論，究與易意合否，誠難斷言。然一種學問，必有其哲學上之根據。儒亦當時顯學，安得

無之？如水心言，凡高深玄遠之說，悉出後人附會，則孔子乃一路通世故，止能隨事應付之人乎？必不然矣。

宋時有道統之說，其思想蓋遠源於孟子，而近接韓退之。孟子曰：「五百年必有王者興，其間必有名世者。」又曰：「由堯舜至於湯，五百有餘歲。若禹、皋陶，則見而知之。若湯，則聞而知之。由湯至於文王，五百有餘歲。若伊尹、萊朱，則見而知之。若文王，則聞而知之。由文王至於孔子，五百有餘歲。若大公望、散宜生，則見而知之。若孔子，則聞而知之。由孔子而來，至於今，百有餘歲。去聖人之世，若此其未遠也；近聖人之居，若此其甚也；然而無有乎爾，則亦無有乎爾。」孟子屢言願學孔子，又曰：「予未得爲孔子徒也，予私淑諸人也。」又曰：「由周而來，七百有餘歲矣。以其數，則過矣；以其時考之，則可矣。夫天未欲平治天下也，如欲平治天下，當今之世，舍我其誰也。」蓋隱然自附於見知孔子之列，而以名世之任自期。韓氏原道曰：「吾所謂道，堯以是傳之舜，舜以是傳之禹，禹以是傳之湯，湯以是傳之文、武，周公傳之孔子，孔子傳之孟軻。軻之死，不得其傳焉。荀與楊也，擇焉而不精，語焉而不詳。」始以孟子繼孔子。宋人以孟子受業於子思，子思受業於曾子，遂謂曾子獨得孔子之傳。朱子又推濂溪、二程，遙接其緒。其滄洲精舍告先聖文，所謂「恭惟道統萬理一原，遠自羲軒，集厥大成，人屬玄聖。述古垂訓，萬世作程。三千其徒，化若時雨。維顏曾氏，傳得其宗。逮思及興，益以光大。自時厥後，口耳失真。千有餘年，乃云有繼。周程授受，萬理一原」者也。後人又以朱子承周程之緒，而理學家

所謂道統者以成。水心既不喜伊洛，故亦不承其道統之說。別敘道統，自堯舜禹湯文王周公以至孔子，而斥宋儒曾子傳孔子之學，以至子思孟軻之說爲不足信。其言曰：「四科無曾子，而孔子曰參也魯，則曾子在孔門弟子中，不爲最賢。若謂孔子晚歲，獨進曾子，或孔子歿後，曾子德加尊，行加修，則無明據。又孔子謂中庸之德民鮮能，而子思作中庸，以爲遺言，則顏、閔猶無是告，以爲自作，則非傳也。」此等議論，看似考據精詳，實亦憑臆爲說。與主張曾子傳孔子之道，以及子思孟子者，同一無據。不足深論。水心之意，亦初不在此。所以必別敘道統，駁斥舊說，不過以達其崇實黜虛之見而已。水心之言曰：「孔子教顏淵：非禮勿視，非禮勿聽，非禮勿言，非禮勿動，必欲此身實行於度數折旋之中。而曾子告孟敬子，乃以爲所貴者容貌，正顏色，出辭氣，三事而已。是則度數折旋，皆可忽略而不省，有司徒具其文，而禮因以廢。」又曰：「周官言道則愛藝，易傳子思孟子言道，後世於道，始有異說。益以莊、列西方之學，愈以支離。」其意可概見矣。

宋儒於戴記，獨尊大學、中庸，諸子中獨尊孟子，以配論語，而爲四書。固由於大學言爲學之方，最有系統。《朱子語錄》：「問初學當讀何書？曰：六經、語、孟皆當讀，但須知緩急。大學、語、孟，最是聖賢爲人切要處。餘經、孟隨事答問，難見要領。惟大學是說古人爲學之大凡，體統都具。玩味此書，知得古人所鄉，讀語、孟便易入。後面功夫雖多，而大體已立矣。」又曰：「今且須熟究大學作問架，卻以他書填補之。」又曰：「大學是修身治人

的規模。如起屋相似，須先打個地盤。」（中庸所言之精微；孟子於諸子中，獨爲純正，亦與其道統之說相關也。）水心既不信道統之說，故於學庸、孟子，咸有詰難。其難大學格致之說曰：「大學以致知格物，在誠意正心之先。格字可有二解：物欲而害道，格而絕之，物備而助道，格而通之是也。程氏以格物爲窮理，夫窮盡物理，則天下國家之道，已無遺蘊，安得意未誠，心未正，知未至？以爲求窮理，則未正之心，未誠之意，未致之知，安能求之？故程氏之說不可通。然格物究作何解，殊未能定。蓋由爲大學之書者，自未能明，以致疑誤後學也。」其難中庸謂「書惟皇上帝降衷於下民，即中庸天命之爲性。若有恆性，即率性之爲道。克綏厥猷，惟后，即修道之謂教。」（案所引三語，出偽湯誥。）然言降衷可，言天命不可。何者？天命物所同，降衷人所獨也。惟降衷爲人所獨，故人能率性而物不能。否則物何以不能率性邪？性而曰恆，是以可率。但云受命，則不知當然之理，各以意之所謂當然者率之，則道離於性矣。民有恆性，而后綏之，無加損也。云修則有損益矣。是教者強民從己也。」其難孟子子曰：「洪範耳目之官不思，而爲聰明，自外入以成其內也。思曰睿，自內出以成其外也。古人未有不內外交相成，而至於聖賢者。古人之耳目，安得不官而蔽於物？思有是非邪正，心有人危道微，後人安能常官而得之？蓋以心爲官，出孔子後，以性爲善，自孟子始；然後學者盡廢古人之條目，而專以心爲宗主，虛意多，實力少，堯舜以來內外相成之道廢矣。」案此諸說，均屬牽強。格物之釋甚多，是非誠難遽定。然因其說之難定，

遂謂古人自不能通，則未免失之武斷。水心謂「功力當自致知始」，則大學言致知在格物，不云欲致其知者，先格其物，明格物致知，即係一事，原自致知爲始也。古書言性，本皆指人性言之。言物性須別之曰物，言人性不須別之曰人，言語之法，自如此也。孟子曰：「耳目之官不思，而蔽於物，物交物，則引之而已矣。心之官則思，思則得之，不思則不得也。」此天之所以與我者。先立乎其大者，則其小者不能奪也。」謂當以心之思，正耳目之蔽，非謂任心而遂廢耳目也。謂古人之耳目，安得不官而蔽於物，後人之心，安能常思而得之，試問耳目爲物所引，果有此事乎？無此事乎？耳目爲物所蔽，不藉心之思以正之，將何以正之乎？心不能常思而得，將廢心而專任耳目乎？抑當致力於治心乎？水心曰：「唐虞三代，上之治爲皇極，下之教爲大學，行之天下爲中庸。漢以來無能明之者。今世之學始於心，而三者始明。然唐虞三代，內外無不合，故心不勞而道自存。今之爲道者，獨出內心以治外，故常不合。」夫心思耳目，非對立而爲二物也。用耳目者，非能不用心思；而心思亦非能離耳目而爲用也。（物交物則引之，所引者仍系其心。謂心隨耳目之欲，而不思其邪正也。若竟廢耳目之用，則本無物欲之蔽矣。）今乃曰：自外入以成其內，自內出以治其外，其說果可通乎？

水心於大極先後天之說，亦曾加以駁詰。謂孔子象辭，無所謂太極。太始太素等茫昧荒遠之說，實惟莊、列有之。又謂河圖洛書之說，已爲怪誕，況於先後天乎？孔子繫易，辭不及數。惟大傳稱大衍之數五十，其下文

有五行生成之數。五行之物，徧滿天下，觸之卽應，求之卽得，而謂其生成之數，必有次第，蓋曆家立其所起，以象天地之行，不得不然。大傳以易之分揲象之，蓋易亦有起法也。大傳本以易象曆，而一行反以爲曆本於易。夫論易及數，非孔氏本意，而謂曆由易起，揠道以從數，執數以害道，云云。此說誠亦有理。然太始太素等名，見於易緯。（見第二篇。）緯書固多怪迂之論，中亦多存經說。謂其不足信則可，謂非古說則不可。專言數，誠非孔氏之意。然古代哲學，與天文曆數，相關極密。謂孔子不專言數則可，必謂言數之說，盡出後人附會，亦非。水心謂「天地陰陽，最忌以密理窺測。」推其意，必專就事論事，高深玄遠之說，一語不及而後可。然哲學固不容如是也。

水心又論「黃叔度爲後世顏子」之說云：「孔子所以許顏子者，皆言其學，不專以質。漢人不知學，以質爲道。遂使老莊之說，與孔顏並行。」案宋儒好言「聖賢氣象。」在彼修養之餘，誠不能謂無所見。然亦有入魔道處。水心此論，頗中其失。

水心旣以質角爲主，自不免功利之見。故謂「正誼不謀利，明道不計功，初看極好，細看全疏闊。古人以利與人，而不自居其功，故道義光明。旣無功利，則道義乃無用之虛語耳。」殊不知上下交征利，勢必至於不奪不厭。未有仁而遺其親，未有義而後其君，正古人之以義爲利，而正誼不謀利，明道不計功，亦正所以規這

利也。此等說，皆未免失之偏激。

凡主張功利之說者，世人每謂其心術不可問，此實不然。彼不過立說少偏耳，其意固欲以利人也。若但圖自利，則雞鳴而起，孳孳爲之可矣；而何必著書立說，以曉天下乎？故主張功利之說者，其制行往往高潔過人，方正不苟。以其策書與主張道義之人異，其斷向則同也。水心當韓侂胄用兵時，嘗一出任事，以是頗爲論者所譏。此實理學家好奇論人，而不察情實之弊。不可不有以正之。案水心當淳熙時，屢以大仇未復爲言。開禧欲用兵，除知建康府。輒力言此事未可易言。欲先經營淮、漢，使州有勝兵二萬，然後挑彼先動，因復河南。河南既復，乃於已得之地，更作一重，爲進取之計。實爲老謀勝算。而侂胄急於建功，（急於建功，便是私意。）不能用。水心又上劄子，請修實政，行實德。意主修邊而不急於開邊，整兵而不急於用兵。尤欲節用減賦，以寬民力。時亦以爲迂緩，不能用。但欲藉其名以草詔。水心力辭，則其不同侂胄之輕舉，彰彰矣。兵既敗，乃出安集兩淮。力陳救敗之計。旋兼江淮制置，措置屯田。時傳言金兵至，民渡江者億萬，爭舟至覆溺。吏持文書至官，皆手額不能出語。水心歎曰：「今竟何如？」乃用門下士滕成計，以重賞募勇士，渡江劫其營。十數往返，俘馘踵至。士氣稍奮，人心稍安。金人乃解。水心相度形勢，欲修沿江堡塢，與江中舟師相掎。自此漸北，撫用山水寨豪傑。中朝急於求和，水心以爲不必。請先自固，徐爲進取之圖。蓋其審慎於敗釁之先，效命於債軍之際，其忠忱才

略，咸有足多者。而忽以一節輕議之哉？况所議者，皆捕風捉影，不察情實之談乎？侂冑既死，其黨許及之、曾孝友等，懼得罪，反勸水心附會用兵，以圖自免。遂奪職奉祠。前此封事具在，竟莫能明其本末。亡國之是非必不明，功罪必倒置，可爲浩歎矣。水心弟子周南（字南仲，吳縣人）北伐時，嘗奉長樞密院機速房之命。辭曰：「吾方以先事造兵，爲發狂必死之藥，敢鄉邇乎？」卒不受命。侂冑之誅，水心弟子與者三人（趙汝談、汝鑑、王大受。汝鑑，一作汝鑑，字蹈中，大梁人。大受，字宗可，一字拙齋，饒州人。）亦可見水心之宗旨矣。水心既廢，杜門家居，絕不自辯，嘗歎「女真復爲天祚，他人必出而有之。」又謂「自戰國以來，能教其民而用之，惟一諸葛亮，非驅市人之比。故其國不勞，其兵不困，雖敗而可戰。」其經綸又可見矣。其與丁少詹（丁希亮，字少詹，黃巖人。水心弟子。）書謂「世間祇常理。所謂豪傑卓然興起者，不待教詔而自能，不待勉強而自盡耳。至於以機變爲經常，以不遜爲坦蕩，以窺測隱度爲義理，以見人隱伏爲新奇，以跌蕩不可羈束爲通達，以多所疑忌爲先覺，此道德之棄材也。讀書之博，祇以長敖；見理之明，祇以遂非。」云云。則卓然儒者之言，雖程、朱無以踰其淳也。然則世之踴躍自喜，好爲大言，而實際並無工夫，隱微之地，且不可問，而顯鑒託於功利之論，以譁世而愚衆者，寧非言功利者之罪人哉？

永康之學，原於東萊。然東萊之論，實與永康絕異，不可不察也。東萊與葉正則書曰：「靜多於動，踐履多

於發用，涵養多於講說，讀經多於讀史，功夫如此，然後可久可大。」與朱侍講曰：「向來一出，始知時事益難平，爲學功夫益無窮，而聖賢之言益可信。」其與陳同甫，則曰：「井渫不食，正指汲汲於濟世者。所以未爲井之盛，蓋汲汲欲施，與知命者殊科。」孔子請討見卻，但曰以吾從大夫之後，不敢不告。孟子雖有自任氣象，亦云吾何爲不豫哉？殆可深鏡也。」則實非急於功名之流。其論政事，亦恆以風俗爲重。所撰禮記說，嘗「秦漢以來，外風俗而論政事。」論語說曰：「後世人所見不明，或反以輕捷便利爲可喜，淳厚篤實爲過鈍，不知此是君子小人分處。」與學者及諸弟書曰：「審思時事所以艱難，風俗所以澆薄，推其病原，皆由講學不明之故。若使講學者多，其達也自上而下，爲勢固易；雖不幸皆窮，然善類既多，熏蒸上騰，亦有轉移之理。雖然，此特憂世之論耳。中天下而立，定四海之民，所性不存焉，此又當深長思也。」皆卓然儒者之論。其論自治，謂「析理當極精微，豪釐不可放過。」又謂：「步趨進退，左右周旋，若件件要理會，必有不到。惟常存此心，則自然不違乎理。」頗能兼朱、陸之長。史稱東萊少時，性極褊。後病中讀論語，至「躬自厚而薄責於人」，有省。遂終身無暴怒。因學紀聞紀其言，謂「爭校是非，不如斂藏收養。」則其氣象寬博，自有過人者。宜其不與於朱、陸之爭，且能調和二家也。

東萊死後，其弟子約，議論漸變。朱子答劉子澄曰：「伯恭無恙時，愛說史事。身後爲後生輩糊塗說出一

般惡口小家議論。賤王尊霸，謀利計功，更不可聽。子約立脚不住，亦曰：「吾兄蓋嘗言之云爾？」又一書曰：「婺州自伯恭死後，百怪都出。至如子約，別說出一般差異的話。全然不是孔孟規模，卻做管商見識，令人駭歎。然亦是伯恭自有些拖泥帶水，致得如此，又令人追恨也。」答潘端叔曰：「子約所守，固無可疑。然其論甚怪。教得學者相率舍道義之塗，以趨功利之域。充塞仁義，率獸食人，不是小病。故不免極力陳之。以其所守言之，固有過當。若據其議論，則亦不得不說到此地也。」可見功利之說，皆起於子約時矣。然其主持，實以陳同甫爲最力。故朱子答黃魯直書，謂「婺州近日一種議論，愈可惡。大抵名宗呂氏，而實主同甫。」語類又謂「伯恭門人，亦有爲同甫之說」者也。

同甫之爲人，不如水心之純；其才，亦不如水心之可用。（水心行事具見前。）龍川落魄，以疏狂爲快。嘗三下大理獄。其言曰：「研窮義理之精微，辨析古今之同異，原心於秒忽，較理於分寸，以積累爲工，以涵養爲主，晬面盎背，則於諸儒誠有愧焉。至於堂堂之陳，正正之旗，風雨雲雷，交發而並至；龍蛇虎豹，變見而出沒；推倒一世之智勇，開拓萬古之心胸，自謂差有一日之長。」乃大言耳。然其論王霸、義利之說，則其攻駁當時之論，實較水心爲有理致，不可誣也。龍川之言曰：「自孟荀論義利，王霸、漢唐諸儒，未能深明其說。本朝伊洛諸公，辨析天理人欲，而王霸、義利之說，於是大明。然謂三代以道治天下，漢唐以智力把持天下，固已使人不能

心服。而近世諸儒，遂謂三代專以天理，漢唐專以人欲行。其間有與天理暗合者，是以亦能久長。亮以爲漢唐之君，本領非不洪大開廓。惟其時有轉移，故其間不無滲漏。謂之雜霸者，其道固本於王也。諸儒自處者，曰義曰王。漢唐做得成者，皆曰利曰霸。一頭自如此，一頭自如彼。說得雖甚好，做得亦不惡。如此，卻是義利雙行，王霸並用。如亮之說，卻是直上直下，只有一個頭顱做得成耳。」又曰：「心之用，有不盡而無常泯，三代做之盡者也。漢唐做不到盡者也。本末感應，只是一理。使其田地根本，無有是處，安得有小康？」龍川之說，蓋謂義之與利，王之與霸，天理之與人欲，惟分量多少之異，性質則初無不同也。戴山之言曰：「不要錯看了豪傑。古人一言一動，凡可信之當時，傳之後世者，莫不有一段真至精神在內。不誠則無物，何從生出事業來？」與龍川之言，若合符節。如龍川戴山之言，則天下惟有一理，可以成事。如朱子之說，轉似僞者有時亦可成事矣。其意欲使道尊，而不知道以小之也。且如朱子之說，則世之求成事者，將皆自屏於道之外，而道真爲無用之物矣。龍川又極論其弊曰：「以爲得不傳之絕學者，皆耳目不洪，見聞不遠之辭也。人只是這個人，氣只是這個人，才只是這個才。譬之金銀銅鐵，鍊有多少，則器有精粗。豈其本質之外，換出一般，以爲絕世之美器哉。故浩然之氣，百鍊之血氣也。使世人爭驚高遠以求之，東扶西倒，而卒不著實而適用，則諸儒所以引之者過矣。」又曰：「眼盲者摸索得著，謂之暗合。不應二千年之間，有目皆盲也。亮以爲後世英雄豪傑，有時閉眼胡做，遂爲

聖門之罪人。及其閉眼運用，無往而非赫日之光明。今指其閉眼胡做時，便以爲盲無一分光。指其開眼運用時，只以爲偶合，天下之盲者能幾？利欲汨之則閉，心平氣定，雖平平眼光，亦會開得。況夫光如黑漆者，閉則其正也，閉則霎時浮翳耳。今因吾眼之偶開，便以爲得不傳之絕學。畫界而立，盡絕一世之人於門外。而謂二千年之君子，皆盲眼不可點洗；二千年之天地日月，皆若有若無；世界皆是利欲，斯道之不絕者，僅如縷耳。此英雄豪傑，所以自絕於門外，以爲建功立業，別是法門；這些好說話，且與留著妝景足矣。一案世謂儒術迂疏，正是如此。龍川之言，亦可深長思也。

凡講學家，往往設想一盡美盡善之境，以爲鵠。說非不高，然去實際太遠，遂至成爲空話。中國人素崇古，宋儒又富於理想，乃舉其所謂盡美盡善之境，一一傳之古人，而所謂古人者，遂成爲理想中物；以此期諸實際，則其功渺不可期；以此責人，人亦無以自處矣。此亦設想太高，持論太嚴之弊也。龍川與朱子書曰：「祕書以爲三代以前，都無利欲，都無要富貴底人。今時書載得如此潔淨，只此是正大本子。亮以爲才有人心，便有許多不潔淨。」破理想之空幻，而據實際以立論，亦理學家所當引爲他山之石也。

所謂義利，往往不可得兼。然此自係格於事實，以致如此。若論究竟，則二者之斬向，固未嘗不一。所謂舍利而取義者，亦以格於事勢，二者不可得兼云然，非有惡於利也。主張之過，或遂以利爲本不當取，則又誤矣。

龍川之言曰：「不失其馳，舍矢如破，君子不必於得禽也。而非惡於得禽也。絕我馳驅，而能發必命中者，君子之射也。豈有持弓矢審固，而甘心於空反者乎？」亦足箴理學家偏激之失也。

龍川之論，朱子距之如洪水猛獸，又視其關江西爲嚴。然其議論之可取如此。亦可見道理之弘，不容執一成之見以自封矣。然朱子之言，亦有足資警惕者。朱子答呂子約書曰：「孟子一生，忍窮受餓，費盡心力，只破得枉尺直尋四字。今日諸賢，苦心勞力，費盡言語，只成就得枉尺直尋四字。」其言足資猛省。蓋謂凡能成事者，皆有合於當然之道，不得謂惟吾理想中之一境有合，而餘皆不合，其言自有至理。然世事錯綜已極，成否實難豫料。就行事論，只能平心靜氣，據我所見爲最是者，盡力以行之，而不容有一必其成功之念。苟欲必其成功，則此心已失其正，成功仍未可必，所行先已不當矣。故論事不宜過嚴，而所以自律者，則本原之地，不容有毫髮之間。龍川箴朱子立論之過隘，朱子譏龍川立心之未淳，其言亦各有一理也。

篇十一 宋儒術數之學


宋儒術數之學，其原有二：（一）則周子之太極圖，邵子之先天圖，與參同契爲一家言，蓋方士修煉之書也。一則天地生成之數。司馬氏之潛虛，及劉氏、蔡氏、河圖洛書之說本之。

所謂天地生成之數者？其說見於鄭氏之易注。易繫辭傳曰：「天一，地二，天三，地四，天五，地六，天七，地八，天九，地十。」又曰：「天數五，地數五，五位相得而各有合。天數二十有五，地數三十。凡天地之數，五十有五，此所以成變化而行鬼神也。」一、三、五、七、九爲天數，二、四、六、八、十爲地數，所謂天數五，地數五也。一、三、五、七、九相加爲二十有五，二、四、六、八、十相加爲三十，所謂天數二十有五，地數三十也。二十五與三十相加爲五十有五，則易所言之凡數也。鄭氏注曰：「天一生水於北，地二生火於南，天三生木於東，地四生金於西，天五生土於中，陽無耦，陰無妃，未得相成。於是地六成水於北，與天一並，天七成火於南，與地二並，地八成木於東，與天三並，天九成金於西，與地四並，地十成土於中，與天五並。」此所謂五行生成之數。漢書五行志、左氏昭公九年：「裨竈曰：火，水妃也，妃以五成。」疏引陰陽之書，言五行妃合十八年，「梓慎曰：水，火之牡也。」疏引陰陽之書，言五行嫁娶，說皆略同。後人於鄭氏之說，或多駁難，然非此無以釋五位相得而各有合也。月令言五方，木、火、金、水皆成數，惟土爲生數。太玄玄圖篇云：「一與六共宗，二與七爲朋，三與八成友，四與九同道，五與五相守。」說亦大同，惟中央不言五與十而已。司馬氏潛虛所用，卽係此數。



溫公潛虛，亦從萬物之所由來說起。由此推原人性，而得其當然之道。其說曰：「萬物皆祖於虛，生於氣，氣以成體，體以受性。性以辨名，名以立行。行以俟命，故虛者，物之府也。氣者，生之戶也。體者，質之具也。性者，神

之賦也。名者，事之分也。行者，人之務也。命者，時之遇也。」蓋亦欲通天人之故者也。（謂萬物皆祖於虛，不如張子泯有無爲一之當。）

其氣圖以五行分布五方，用其生數爲原，癸、本、卅、基，而以其成數爲委，姦、末、刃、家。以此互相配合，其數五十有五，畫成級數，是爲體圖。體圖一等象王，二等象公，三等象岳，四等象牧，五等象率，六等象侯，七等象卿，八等象大夫，九等象士，十等象庶人。其說曰：「少以制衆，明綱紀也。位愈卑，黜愈多，所以爲順也。」又以五行生成之數遞相配，其數亦五十有五，謂之性圖。（其中以水配火，以火配火者，謂之十純，其餘謂之配。）又以一至十之數互相配，各爲之名，亦得五十五。其中以五配五曰齊，居中。餘則規而圓之，始於元而終於餘。是爲名圖。齊包幹萬物，無位。元，餘者，物之終始，無變。餘各有初二、三、四、五、六、上七變。凡三百六十四變。變尸一日。授於餘而終之。其說曰：人之生本於虛。虛然後形。形然後性。性然後動。動然後情。情然後事。事然後德。德然後家。然後國。國然後政。政然後功。功然後業。業終則反於虛矣。故萬物始於元，著於姦，存於齊，消於散，訖於餘。五者，形之運也。柔、剛、雍、昧、昭，性之分也。容、言、慮、聆、觀、動之官也。慈、濟、得、罷、耽，情之誠也。痔、卻、庸、妥、蠱，事之變也。訢、宜、沈、詰、戛、德之塗也。特、偶、暱、續，考、家之綱也。范、徒、醜、隸，林、國之紀也。禮、準、資、賓、戰，政之務也。敷、又、績、育、聲，功之具也。興、痛、泯、造，隆、業之著也。」蓋欲以徧象萬事也。元餘齊無變，不占。初、上者，事之終始，亦不占。餘五十二名，各



體圖



以其二、三、四、五、六爲占。五行相乘，得二十五；又以三才乘之，得七十五以爲策。虛其五而用七十占之。其占，分吉、臧、平、否、凶五者。


溫公好太玄，留心三十年，集諸說而作注。其作潛虛，自云：「玄以準易，虛以擬玄。」玄起冬至，終大雪，蓋象物之始終。虛亦然。其繫元之辭曰：「元，始也。夜半，日之始也。朔，月之始也。冬至，歲之始也。」繼之以貞，曰：「貞，聚也。氣聚而物宗，族聚而家，聖賢聚而國。」終之以散，繼之以餘，蓋亦象物之始終。其思想，實未能出於太玄之外。此等書，殊可不必重作也。

溫公潛虛，雖不足貴，而其踐履，則有卓然不可誣者。溫公之學，重在不欺。自謂「生平所爲，未嘗不可對人言」。一弟子劉安世問：「有一言而可以終身行之者乎？」曰：「其誠乎？」問其目，曰：「自不妄語始。」安世學之，七年而後成。故能屹然山立。論者稱涑水門下，忠定（安世諡）得其剛健篤實，范正獻（祖禹）得其純粹云。傳溫公之數學者，則晁景迂也。


景迂從溫公遊，又從楊寶實（康節弟子）傳先天之學，姜至之講洪範。溫公著潛虛，未成而病，命景迂補之。景迂謝不敏。所著書，涉於易者甚多。今惟易玄星紀譜，尙存景迂集中。其書乃將溫公之太玄曆，康節之太玄準易圖，據曆象合編爲譜，以見易與玄之皆本於天也。

五行生成之數，鄭氏以之注繫辭傳天地之數。其注大衍之數亦用之。其注「河出圖，洛出書」，則引春秋緯云：「河以通乾出天苞，洛以流坤吐地符。河龍圖發，洛龜書成。河圖有九篇，洛書有六篇。」初不言九篇六篇所載爲何事。漢書五行志載劉歆之言曰：「虞翻氏繼天而王，受河圖，則而畫之，八卦是也。禹治洪水，賜雒書，法而陳之，洪範是也。」（張衡東京賦：「龍圖授羲，龜書畀姒。」）始以河圖爲八卦，洛書爲五行。（偽孔傳及論語集解引孔氏，亦皆以河圖爲八卦。）然亦僅言八卦五行出於圖，書而圖，書究作何狀，則莫能質言。（邢昺論語疏：「鄭玄以爲河圖，洛書，龜龍銜負而出。如中候所說：龍馬銜甲，赤文綠字，甲似龜背，表廣九尺。上有列宿斗正之度，帝王錄紀興亡之數。」云「列宿斗正之度」，似圖。云「帝王錄紀興亡之數」，則亦似書矣。又云：「赤文綠字，甲似龜背」，則龍馬所負，亦龜書也。隋志：「河圖二十卷。河圖龍文一卷。其書出於前漢。有河圖九篇。洛書六篇。自黃帝至周文王所受本文。又別有三十篇，云自初起至於孔子九聖之所增演，以廣其意。」其書既亡，無可究詰。漢書五行志，以「初一日」以下六十五字，皆爲洛書本文。孔以「初一日」等二十七字，係再加。劉彪、顧焯，以爲龜背有二十八字。劉炫謂止二十字，亦皆以意言之而已。要之河圖、洛書，本神怪之談，無從徵實。必欲鑿求，適成其爲癡人說夢而已。）至宋時，始有所謂易龍圖者，託諸陳搏。（見李淑邯鄲書目。）朱子已明言其僞。清胡渭易圖明辨，謂其圖見於張仲純易象圖說者凡四：其第一圖，卽天數


二十有五，地數三十。第二圖上為五行生數，下為五行成數。第三圖合二者為一。第四圖則所謂「戴九履一」，




一 天
未 合 地
數



二 天
已 合 地
數




三 天 地
生 成 之
數



四 洛 書
縱 橫 十
五 之 象

左三右七，二四爲肩，六八爲足。五爲腹心，縱橫數之皆十五」者也。其數與大戴記明堂九室（大戴記明堂篇：「明堂者，古有之也。凡九室：二、九、四、七、五、三、六、一、八。」）及後漢書張衡傳注引易乾鑿度同。案後漢書劉瑜傳瑜上書：「河圖授圖，正在九房。」則以此數爲河圖。然九宮之數，合於九疇，故又有以此爲洛書者。

宋劉牧撰易數鉤隱圖，就龍圖天地已合之數，虛其中，以上圖爲兩儀，下圖爲四象，以爲河圖。其有五數及十數者爲洛書。蔡元定則以第三圖爲河圖，第四圖爲洛書。引關朗易傳爲證。易傳曰：「河圖之文，七前六後，八左九右。聖人觀之以畫卦。是故全七之三以爲離，奇以爲巽。全八之三以爲震，奇以爲艮。全六之三以爲坎，奇以爲乾。全九之三以爲兌，奇以爲坤。正者全其位，隅者盡其量。洛書之文，九前一後，三左七右，四前左，二前右，八後左，六後右。後聖稽之爲三象：一、四、七爲天生之數，二、五、八爲地育之數，三、六、九爲人資之數。」所謂則圖書卦者，與劉牧之四象生八卦圖合。宋時言圖書者，所由以圖書附合於易也。（劉氏曰：「水居坎而生乾，金居兌而生坤，火居離而生巽，木居震而生艮。」謂水數六，除三畫爲坎，餘三畫爲乾，金數九，除三畫爲兌，餘六畫爲坤，火數七，除三畫爲離，餘四畫爲巽，木數八，除三畫爲震，餘五畫爲艮也。乾坤艮巽畫數恰合，巧矣。然坎離震兌皆止三畫，殊不可通。）關朗易傳，乃北宋阮逸所造僞書，見陳無己後山叢談，實本諸劉牧，而又小變其說者，蔡氏爲所欺也。



東都事略儒學傳謂：「陳搏讀易，以數學授穆脩，脩以授种放，放授許堅，堅授范諤昌。」朱漢上經筵表謂：「陳搏以先天圖傳种放，放傳穆脩，脩傳李之才，之才傳邵雍。」（明道誌康節藁，亦謂其學得之李挺之，挺之得之穆伯長。）放以河圖、洛書傳李旣，旣傳許堅，堅傳范諤昌，諤昌傳劉牧。脩以太極圖傳周敦頤，敦頤傳程頤、程顥。「晁公武郡齋讀書志：「易證墜簡一卷。天禧中，毘陵從事范諤昌撰。自謂其學出於潞浦李處約，廬陵許堅。」處約不知卽旣否。然邵子之學，出於先天圖；劉牧之學，出於河圖、洛書；周子之學，出於太極圖，則不可輕也。」

南渡以後，精於數學者，莫如蔡西山父子。西山以十爲河圖，（五行生成數。）九爲洛書，（九宮。）又謂

「河圖、洛書虛其中爲太極。奇耦各居二十（謂一、三、七、九與二、四、六、八相加皆爲二十。）則亦兩儀。一、六爲水，二、七爲火，三、八爲木，四、九爲金，五、十爲土，固洪範之五行，而五十有五，又九疇之子目也。（五行五，五事五，八政八，五紀五，皇極一，三德三，稽疑七，庶徵十，福極十一。）洛書一、二、三、四，而合九、八、七、六，縱橫十五，而互爲九、八、七、六，則亦四象也。四方之正，以爲乾、坤、離、坎，四隅之偏，以爲兌、震、巽、艮。（此邵子先天方位。）則亦八卦也。洛書固可以爲易，河圖固可以爲範，且又安知圖之不爲書，書之不爲圖邪？」又曰：「太極者，象數未形，而其理已具之稱；形器已具，而其理無朕之目。在河圖、洛書皆虛中之象也。周子曰：無極而太極；邵子曰：道爲太極。又曰：心爲太極。此之謂也。太極之書，各生一奇一耦，而爲一畫者二，是爲兩儀。其數則陽一而陰二。在河圖、洛書，則奇耦是也。周子所謂太極動而生陽，動極而靜，靜而生陰，靜極復動，一動一靜，互爲其根，分陰分陽，兩儀立焉；邵子所謂一分爲二者，皆謂此也。兩儀之上，各生一奇一耦，而爲二畫者四，是爲四象。其立則太陽一，少陰二，少陽三，太陰四。其數則太陽九，少陰八，少陽七，太陰六。以河圖言之，則六者，一而得於五者也。七者，二而得於五者也。八者，三而得於五者也。九者，四而得於五者也。以洛書言之，則九者，十分一之餘也。八者，十分二之餘也。七者，十分三之餘也。六者，十分四之餘也。周子所謂水、火、木、金，邵子所謂二分爲四者，皆謂此也。四象之上，各生一奇一耦，而爲三畫者八，於是三才略具，而有八卦之名矣。其位則乾一、兌二、離三、震四、巽五、坎

六、艮、七、坤、八。在河圖則乾、坤、離、坎，分居四寶；兌、震、巽、艮，分居四虛。在洛書則乾、坤、離、坎，分居四方；兌、震、巽、艮，分居四隅。周禮所謂三易經卦各八，大傳所謂八卦成列，邵子所謂四分爲八者，皆指此而言也。」（以上皆引易學啟蒙。此書實西山所撰也。）蓋將先天、太極，及宋人所謂河圖、洛書者，通合爲一矣。

西山於洪範之數，未及論著，皆以授九峯。九峯著洪範皇極，以九九之數爲推。其言曰：「數始於一，參於三，究於九，成於八十一，備於六千五百六十一。八十一者，數之小成也。六千五百六十一者，數之大成也。天地之變化，人事之始終，古今之因革，莫不於是著焉。」又曰：「一變始之始，二變始之中，三變始之終。四變中之始，五變中之中，六變中之終。七變終之始，八變終之中，九變終之終。數以事立，亦以事終。」蓋欲以數究萬物之變者也。此等說，太覺空漠，無可徵驗，即無從評論其是非。然洪範皇極，頗多微妙之言。今略引數條於下：

洪範皇極曰：「有理斯有氣，氣著而理隱。有氣斯有形，形著而氣隱。人知形之數，而不知氣之數；人知氣之數，而不知理之數。知理之數則幾矣。動靜可求其端，陰陽可求其始。天地可求其初，萬物可求其紀。鬼神知其所幽，禮樂知其所著，生知所來，死知所去。易曰：窮神知化，德之盛也。」形者，已成之局。氣者，形之原因。理又氣之原因。數者，事之必然。知理之數，則形氣自莫能外矣。故以爲窮神知化也。

又曰：「欲知道，不可以不知仁。欲知仁，不可以不知義。欲知義，不可以不知禮。欲知禮，不可以不知數。數

九九積數圖

一	九	八十一	七百二十九
二	十八	百六十二	一千四百五十八
三	二十七	二百四十三	二千一百八十七
四	三十六	三百二十四	二千九百一十六
五	四十五	四百有五	三千六百四十五
六	五十四	四百八十六	四千三百七十四
七	六十三	五百六十七	五千一百有三
八	七十二	六百四十八	五千八百三十二
九	八十一	七百二十九	六千五百六十一

者，禮之序也。知序則幾矣。仁義二者，仁爲空名，義則所以行仁。禮之於義亦然。數者，禮之所以然也。知數，則所行之禮，皆不差忒。於仁義無遺憾，於道亦無不合矣。此說將仁義禮一以貫之，卽所以使道與數合而爲一。

也。

又曰：「數運無形而著有形。智者一之，愚者二焉。數之方生，化育流行。數之已定，物正性命。圓行方止，爲物終始。隨之而無其端也，迎之而無其原也。渾之惟一，析之無極。惟其無極，是以惟一。」此言原因結果之間，所以無豪釐差忒者，以其本是一體。惟本是一體，而分析特人所強爲，故豪釐不得差忒。以其析之無窮，而仍豪釐不得差忒，可見其本是一體，而分析特人之所爲也。

又曰：「數者，動而之乎靜者也。象者，靜而之乎動者也。動者，用之所以行。靜者，體之所以立。用既爲體，體復爲用。體用相仍，此天地萬物所以化生而無窮也。」此所謂靜者，謂人所能認識之現象。動者，現象之所由成也。用既爲體，體復爲用，言現象皆有其所以然之原因，而此現象復爲他現象之原因也。

又曰：「順數則知物之所始，逆數則知物之所終。數與物非二體也，始與終非二致也。大而天地，小而豪末，明而禮樂，幽而鬼神，知數卽知物也，知始卽知終也。」九峯所謂數，卽宇宙定律之謂。明乎宇宙定律，則於一切事物，無不通貫矣。故曰：「物有其則，數者盡天下之物則；事有其理，數者盡天下之物理」也。

以上所引，皆洪範皇極中精語。略舉數條，不能盡也。然亦可見宋代理學家其學雖或偏於術數，而其意復在明理，其途徑雖或借資異學，而多特有所見，不爲成說所囿。後人贊響之辭，實不盡可信也。

篇十二 陽明之學

陽明之學，蓋遠承象山之緒。而其廣大精微，又非象山所及。

一種哲學，必有其特異之宇宙觀及人生觀。此理前已言之。陽明之學，雖不能離乎宋儒，而別爲一學，然以佛教譬之，固卓然立乎程朱之外，而自成一宗者矣。其宇宙觀及人生觀，果有以特異於程朱乎？曰有。

宋學至朱子而集其大成。其異乎朱子者，如陸子，則當陽明時，其說不甚盛行。故朱子之學，在當時，實宋學之代表也。朱子以宇宙之間，有形迹可指目想像者，皆名爲氣。而別假設一所以然者，名之曰理。形迹之已然者，不能盡善。然追溯諸未然之時，固不能謂其必當如是。故以理爲善，凡惡悉委諸氣。本此以論人，則人人可以爲善，而未必人人皆能爲善。其可以爲善者，理使之不能爲善者，氣也。於是分性爲義理氣質兩端。義理之性，惟未生時有之。已墮形氣之中，則無不雜以氣質者。人欲爲善，必須克去其氣質之偏，使不爲天理之累而後可。朱子論理氣及人性之說如此。

陽明之說則不然。陽明以理氣爲一。謂「理者氣之條理，氣者理之運用。無條理固不能運用，無運用亦無所謂條理矣。」然則所謂理與氣者，明明由人之觀念，析之爲二，在彼則實爲一物也。然則理不盡善，氣亦

不盡善乎？曰：不然。理者，氣之流行而不失其則者也。春必繼以夏，秋必繼以冬，此即氣之流行之則，即是理。純粹至善者也。其流行之際，不能無偶然之失，則如冬而燠，夏而寒，是爲愆陽伏陰。愆陽伏陰，卒歸於太和。可見流行雖有偶差，主宰初未嘗失。主宰之不失，即至善也。（陽明門下論理氣合一最明白者，當推羅整庵。整庵之說曰：「通天地，亙古今，無非一氣而已。氣本一也，動靜往來，闔闢升降，循環無已，積微而著，由著復微，爲四時之溫涼寒暑，爲萬物之生長收藏，爲新民之日用彝倫，爲人事之成敗得失，千條萬緒，紛紜轆轤，而卒不克亂，莫知其所以然而然，是即所謂理也。初非別有一物，依於氣而立，附於氣以行。或因易有大極之說，乃疑陰陽之變易，類有一物主宰乎其間，是不然矣。○理者氣之條理之說，雖暢發於陽明，實亦道原於宋儒。張子謂「虛空即氣」，「天地之氣，雖聚散攻取百途，然其爲理也，順而不紊。」程子謂「天地之化，一息不留，疑其速也，然寒暑之變甚漸。」朱子曰：「有個天理，便有個人欲。」蓋緣這天理有個安頓處，才安頓得不恰好，便有個人欲出來。」皆陽明之說之先河也。）

推此以論人，則氣即心，理即性。心與性之不可歧而爲二，猶理與氣之不可歧而爲二也。宇宙全體，無之非氣，即無之非理。人稟氣以生，即稟理以生也。人心千頭萬緒，感應紛紜而不昧，其感應流行也，其不昧，主宰也。感應不能無失，猶氣之流行，不能無愆陽伏陰，其終能覺悟其非，則即其主宰之不昧也。故理善氣亦善，性

善心亦善，（上知下愚，所稟者同是一氣。然一知一愚者，上知所稟之氣清，下愚所稟之氣濁也。同一氣也，而有清濁之分，何也？曰：氣不能無運行，運行則有偏勝雜糅之處。有偏勝雜糅，斯有清濁矣。然論其本，則同是一氣。惡在偏勝雜糅，不在氣也。故氣不可謂之惡。故曰性善。）○宋儒以人之不善，歸咎於氣質。陽明則歸咎於習。所謂習者，非有知識後始有，并非有生後始有，稟氣時即有之。氣之偏勝，即習之所從出也。如仁者易貪，知者易詐，勇者易暴。其仁即聖人之仁，其知即聖人之知，其勇即聖人之勇，以其所稟者，與聖人同是一氣也。其所以流於貪詐暴者，則以其氣有偏勝故。此當學以變化之。惟雖有偏勝，而其本質仍善，故可變化。若其質本惡，則不可變矣。陽明之說如此，實亦自宋儒之說一轉手耳。○失在流行，不在本體，故只有過不及，無惡。）

氣之流行而不失其則者，理也。心之感應而不昧其常者，性也。理與氣非二，則性與心非二。欲知氣之善，觀其流行而不失其則，則知之矣。欲求心之善，於其感應之間，常勿失其主宰，即得之矣。此主宰，即陽明之所謂知也。而致良知之說以立。

夫謂良知即人心之主宰者，何也？陽明以天地萬物爲一體。其言曰：「自其形體而言謂之天，自其主宰而言謂之帝，自其流行而言謂之命，自其賦於人而言謂之性，自其主於身而言謂之心，心之發謂之意，意之體謂之知，其所在謂之物。」蓋宇宙之間，本無二物。我之所稟以生者，即宇宙之一部分；其原質，與天地萬物

無不同。（故曰：人與天地萬物一體，非以天地萬物爲一體也。陽明之言曰：「人的良知，就是草木瓦石的良知。豈惟草木瓦石，天地無人的良知，亦不可爲天地矣。蓋天地萬物，與人原是一體。其發竅之最精處，是人心一點靈明。故五穀禽獸之類，皆可以養人；藥石之類，皆可以療疾。只爲同此一氣，故能相通耳。」錢緒山曰：「天地間只有此知。天只此知之虛明；地只此知之凝聚；鬼神只此知之妙用；日月只此知之流行；人與萬物，只此知之合散；而人只此知之精粹也。此知運行，萬古有定體，故曰太極。無聲臭可卽，故曰無極。」歐陽南野曰：「道塞乎天地之間，所謂陰陽不測之神也。神凝而成形，神發而爲知。知也者，神之所爲也。神無方無體，其在人，爲視聽爲言動爲喜怒哀樂。其在天地萬物，則發育峻極。故人之喜怒哀樂，與天地萬物，周流貫徹，而無彼此之間。」云云。陽明之學，於一元之論，可謂發揮盡致矣。）而此原質，自有其發竅最精之處。此處卽我之心。心也，意也，知也，同物而異名。故用力於知，卽用力於心；而用力於心，卽用力於造成我之物質發竅最精之處也。此致良知之說所由來也。

不曰用力於心，而曰用力於知者，何也？曰：心意知同體不離；舍意則無以見心，舍知則無以見意也。故曰：「心無體，以知爲體。」然知亦非能離所知而獨存也。故曰：「知無體，以感應是非爲體。」「心之本體至善，然發於意則有善有不善。」此猶主宰雖是，而流行之際，不能無差也。意雖有善有不善，「然知是知非之知，

未嘗不知。」則猶流行偶差，而主宰常存也。心之體，既必即意與知而後可見，則欲離意與知而用力於心者，自係邪說詖辭。故曰：「欲正心者，本體上無可用功。必就其發動處著力。知其是而爲之，知其非而不爲，是爲致知。知至則意誠，意誠則心正，心正則身修。故曰：大學之要，在於誠意。誠意之功，在於格物。誠意之極，厥惟止至善」也。陽明之學之綱領如此。

所謂格物者，非謂物在外而以吾心格之也。意之所在謂之物。故曰：「意在於事親，事親便是一物。意在於事君，事君便是一物。意在於仁民愛物，仁民愛物便是一物。意在於視聽言動，視聽言動便是一物。」意之所在謂之物何也？曰：「一念未萌，則萬境俱寂。念之所在，境則隨生。如念不注於目前，則泰山觀面而不睹；苟注於世外，則蓬壺遙隔而成象」矣。（塘南之言。）蓋知者能知，物者所知。所之不能離能，猶能之不能離所也。故曰：「無心外之理，無心外之物。」故理一者，在我之主宰。分殊者，主宰之流行。故曰：「物之無窮，只是此心之生生」而已。故無所謂物之善不善，只有此心之正不正也。（塘南曰：「事之體，強名曰心。心之用，強名曰事。其實只是一件，無內外彼此之分也。故未有有心而無事，有事而無心者。故充塞宇宙，皆心也，皆事也，皆物也。」）又曰：「心常生者也。自其生生而言，卽謂之事。心無一刻不生，卽無一刻無事。事本心，故視聽言動，子臣弟友，辭受取予，皆心也。洒掃應對，便是形而上者。學者終日乾乾，只默識此心之生理而已。時時默識內

不落空，外不逐物，一了百了，無有零碎本領之分也。」又曰：「盈天地間皆物也，何以格之？惟以意之所在爲物，則格物之功，非逐物，亦非離物也。至博而至約矣。」○尤西川格訓通解曰：「陽明格物，其說有二：曰知者，意之體，物者意之用。如意在於事親，卽事親爲一物。只要去其心之不正，以全其本體之正。故曰：格者正也。又曰：致知在格物者，致吾心之良知於事事物物。致吾心之良知於事事物物，則事事物物皆得其理矣。致吾心之良知者，致知也。事事物物皆得其理者，物格也。前說似專舉一念，後說則並舉事物，若相戾者。然性無內外，而心外無物，二說只一說也。」（西川名時熙，字季美，洛陽人。）

流行主宰，卽是一事。主宰卽見於流行之中，非離乎流行，而別有其寂然不動之一時也。故心之動靜，亦非二時。欲正心者，必動靜皆有事焉。陽明曰：「太極生生之理，妙用無息，而常體不易。太極之生生，卽陰陽之生生。就其生生之中，指其妙用無息者，而謂之動，謂之陽之生，非謂動而後生陽也。指其常體不易者，而謂之靜，謂之陰之生，非謂靜而後生陰也。若靜而後生陰，動而後生陽，則是陰靜陽動，截然各自爲一物矣。」此就宇宙言也。推諸吾心亦如此。故曰：「心無動靜者也。其靜也者，以言其體也。其動也者，以言其用也。故君子之學，無間於動靜。其靜也，常覺而未嘗無也，故常應。其動也，常定而未嘗有也，故常寂。常應常寂，動靜皆有事焉，是之謂集義。所謂動亦定，靜亦定者也。心一而已。靜其體也，而復求靜根焉，是撓其體也。動其用也，而懼其易

動焉，是廢其用也。故求靜之心即動也。惡動之心非靜也。是之謂動亦動，靜亦動。故循理之謂靜，從欲之謂動。『陽明正心之說，皆自其宇宙觀來。故曰：必有新宇宙觀。而後有新人生觀。人生觀與宇宙觀，實不容分析爲二也。』陽明曰：『告子只在不動心上著功。孟子便真從此心原不動處分曉。心之本體，原是不動的。只爲所行有不合義，便動了。孟子不論心之動不動，只是集義。所行無不是義，此心自然無可動處。』傳習錄：『無善無惡者理之靜，有善有惡者氣之動。不動於氣，即無善無惡，是爲至善。曰：佛氏亦無善無惡，何以異？曰：佛氏著在無上，便一切不管。聖人無善無惡，只是無有作好，無有作惡，不作好惡，非是全無好惡。只是好惡一循於理，不去著一分意思，即是不曾好惡一般。曰：然則好惡全不在物？曰：只在汝心。循理便是善，動氣便是惡。世儒惟不知此，舍心逐物，將格物之學錯看了。』

陽明之學，雖極博大精微，然溯其原，則自「心即理」一語來而已。故曰：陽明之學，遠承象山之緒也。然其廣大精微，則實非象山所及，此亦創始者難爲功，繼起者易爲力也。

人心不能無妄動。然真妄原非二心，故苟知其妄，則妄念立除，而真心此即立現。故曰：「照心非動者，以其發於本體明覺之自然，而未嘗有所動也。妄心亦照者，以其本體明覺之自然者，未嘗不存於其中，但有所動耳。無所動即照矣。」夫妄心之所以能覺者，以良知無時而不在也。故曰：「七情順其自然之流行，皆是良

知之用。但不可有所著。七情有著，俱謂之欲。（有著卽所謂動也。陽明又曰：「理無動者也，動卽爲欲。」然才有著時，良知亦自會覺，覺卽蔽去，復其本體矣。此處能看得破，方是簡易透測工夫。」又曰：「雖妄念之發，而良知未嘗不在。但人不知存，則有時而或放耳。雖昏塞之極，而良知未嘗不明。但人不知察，則有時而或蔽耳。」又曰：「良知無過不及，知過不及的是良知。」夫如是，則爲善去惡之功，實惟良知是恃。故曰：「一點良知，是爾自家的準則。是便知是，非便知非，更瞞他一些不得。爾只不要欺他，實實落落，依他做去，善便存，惡便去。何等穩當？此便是致知的實功。」

人心雖動於妄，而良知未嘗不知，故致知之功，實大可恃。良知雖無時不存，而不能不爲物欲所蔽，故致知之功，必不容緩。以良知爲是恃，而遂忘致知之功，則所謂良知，亦終爲物欲所蔽耳。故曰：「良知之發，更無私意障礙，卽所謂充其惻隱之心，而仁不可勝用。常人不能無私意，所以須用致知格物之功。」又曰：「知得善，卻不依這個良知便做去，知得不善，卻不依這個良知，便不去做。這個良知，便遮蔽了。」又曰：「天理卽是良知。良知愈思愈精明。若不精思，漫然隨事應去，良知便粗了。」然「學以去其昏蔽，於良知之本體，初不能有加於毫末。」此義亦不可不知。

知是知非之良知，不能致卽將昏蔽，於何驗之？曰：觀於人之知而不行，卽知之矣。蓋良知之本體，原是卽

知即行。苟知之而不能行，則其知已非真知，即可知其爲物欲所蔽矣。『徐愛問：今人儘有知父當孝，兄當弟，卻不能孝，不能弟，知行分明是兩件。』曰：此已被人欲間斷，不是知行本體。未有知而不行者。知而不行，只是未知。聖賢教人知行，正是要復那本體。故大學指個真知行與人看，說如好好色，如惡惡臭。見好色屬知，好好色屬行。只見好色時，已自好了；不是見後又立個心去好。聞惡臭屬知，惡惡臭屬行。只聞惡臭時，已自惡了；不是聞後別立個心去惡。『龍溪曰：』孟子說孩提之童，無不知愛其親，及其長也，無不知敬其兄。止曰知而已；知便能了，更不消說能愛能敬。』知是行的主意，行是知的工夫。知是行之始，行是知之成。若會得時，只說一個知，已自有行在。只說一個行，已自有知在。『故曰：』一知之真切篤實處便是行，行之明覺精察處便是知。』

○龍溪曰：「知非見解之謂，行非履蹈之謂，只從一念上取證。」古人所以既說知，又說行者，只爲世間有一種人，懵懵懂懂，任意去做，全不解思維省察；只是個冥行妄作，所以必說個知，方才行得是。又有一種人，茫茫蕩蕩，懸空去思索，全不肯著實躬行，只是個揣摩影響；所以必說一個行，方才知得真。此是古人不得已補偏救弊的話。」「此已被私欲間斷，不是知行本體。」一語最精。好好色，惡惡臭之喻尤妙。『見好色時，已是好了，不是見後又立個心去好；聞惡臭時，已自惡了，不是聞後別立個心去惡。』人之所知，一切如此，豈有知而不行之理？見好色而強抑其好之之心，聞惡臭而故絕其惡之念，非有他念不能然。此即所謂間斷也。良

知之有待於致，即欲去此等間斷之念而已矣。

真知未有不行者；知而不行，只是未知，故欲求真知，亦必須致力於行。此即所謂致也。故曰：「人若真切用功，則於此心天理之精微，日見一日；私欲之細微，亦日見一日。若不用克己功夫，天理私欲，終不自見。如走路一般，走得一段，方認得一段；走到歧路，有疑便問問了又走，方才能到。今於已知之天理不肯存，已知之人欲不肯去，只管愁不能盡知，閒講何益？」

知行既係一事，則不知自無以善其行。陽明曰：「今人學問，只因知行分作兩件，故有一念發動，雖是不善，卻未曾行，便不去禁止。我今說個知行合一，正要人曉得一念發動處，便即是行；就將這不善的念克倒，不使那一念不善潛伏在胸中。」人之爲如何人，見於著而實積於微。知者行之微，行者知之著者耳。若於念慮之微，不加禁止，則惡念日積，雖欲矯強於臨時，必不可得矣。大學曰：「小人閒居爲不善，見君子而後厭然，揜其不善而著其善。人之視己，如見其肺肝然，則何益矣？此謂誠於中，形於外，故君子必慎其獨也。」正是此理。凡事欲倉卒取辦，未有能成者，非其事之不可成，乃其敗壞之者已久也。然則凡能成事者，皆非取辦於臨時，乃其豫之者已久也。欲求豫，則必謹之於細微；欲謹之於細微，則行之微（即知）有不容不措意者矣。故非知無以善其行也。故曰：知行是一也。

知行合一之理，固確不可易。然常人習於二之之既久，驟聞是說，不能無疑。陽明則一一釋之。其說皆極精當。今錄其要者如下：

「徐愛問：至善只求諸心，恐於天下事理，有不能盡。曰：心即理也。此心無私欲之蔽，即是天理。不須外面添一分。以此純乎天理之心，發之事父便是孝；發之事君便是忠；發之交友治民，便是信與仁。愛曰：如事父一事，其間溫清定省之類，有許多節目，亦須講求否？曰：如何不講求？只是有個頭腦，只就此心去人欲存天理上講求。此心若無人欲，純是天理，是個誠於孝親之心；冬時自然思量父母寒，自去求溫的道理；夏時自然思量父母熱，自去求清的道理。譬之樹木，這誠孝的心便是根；許多條件，便是枝葉。須先有根，然後有枝葉。不是先尋了枝葉，然後去種根。」陽明此說，即陸子所謂先立乎其大者也。「溫清定省之類，有許多節目，」最爲恆人所致疑。得此說而存之，而其疑可以豁然矣。（陽明曰：「聖人無所不知，只是知個天理。無所不能，只是能個天理。天下事物，如名物度數，草木鳥獸之類，不勝其煩。雖是本體明了，亦何緣能盡知。但不必知的，聖人自不消求知。其所當知者，聖人自能問人。知得一個天理，便自有許多節文度數出來。」此說與朱子「生而知之者義理，禮樂名物，必待學而後知」之說，似亦無以異。然朱子謂人心之知，必待理無不窮而後盡。陽明則雖名物度數之類，有所不知，而仍不害其爲聖人。此其所以爲異也。

校業條件，不但未必豫行講求也，亦有無從豫行講求者。陽明曰：「良知之於節目事變，猶規矩尺度之於方圓長短也。節目事變之不可豫定，猶方圓長短之不可勝窮也。舜之不告而取，豈舜之前已有不告而取者，爲之準則邪？抑亦求諸一念之良知，權輕重之宜，不得已而爲此邪？武之不葬而興師，豈武之前已有不葬而興師者，爲之準則邪？抑亦求諸一念之良知，權輕重之宜，不得已而爲此邪？後之人不務致其良知，以精察義理於此心感應酬酢之間，顧欲懸空討論此等變常之事，執之以爲制事之本，其亦遠矣。」懸空討論變常之事愈詳，則致其良知之功愈荒，致其良知之功愈荒，則感應酬酢之間，愈不能精察義理。以此而求措施之悉當，是卻行而求及前人也。故曰：「在物爲理，處物爲義，在性爲善，因所指而異其名，其實皆吾之心也。吾心之處事物，純乎天理，而無人欲之雜，謂之善，非在事物上有定則可求也。」又曰：「良知自然的條理，便謂之義。順這個條理，便謂之禮。知這個條理，便謂之智。終始這個條理，便謂之信。」

學所以求是也。以良知爲準則，以其知是知非也。今有二人於此，各準其良知，以斷一事之是非，不能同也。而況於多人乎？抑且不必異人，即吾一人之身，昨非今是之事，亦不少也。良知之知是知非，果足恃乎？陽明曰：「凡處得有善有未善，及有困頓失次之患，皆是牽於毀譽得喪，不能實致其良知耳。實致其良知，然後知平日所謂善者，未必是善。」或謂心所安處是良知。陽明曰：「固然。但要省察，恐有非所安而安者。」又謂「人

或意見不同，還是良知有纖翳潛伏。」此說與伊川「公則一，私則萬殊。人心不同如面，只是私心」之說，若合符節。蓋良知雖能知是知非，然恆人之良知，爲私欲蒙蔽已久，非大加省察，固未易灼見是非之真也。

然則現在之良知，遂不足爲準則乎？是又不然。恆人之良知，固未能造於其極，然亦皆足爲隨時之用。如行路然。登峯造極之境，固必登峯造極而後知。然隨時所見，固亦足以定隨時之程途也。故曰：「我輩致知，只是各隨分量所及。今日良知見在如此，便隨今日所知，擴充到底。明日良知又有開悟，便隨明日所知，擴充到底。」故曰：「昨以爲是，今以爲非；已以爲是，因人而覺其非，皆良知自然如此。」有言童子不能格物，只教以洒掃應對。曰：「洒掃應對就是物。童子良知，只到這裏，教去洒掃應對，便是致他這一點良知。我這裏格物，自童子以至聖人，皆是此等工夫。」真可謂簡易直截矣。

致知既以心爲主，則必使此心無纖毫障礙而後可。隨時知是知非，隨時爲善去惡，皆是零碎工夫，如何合得上本體？此則賢知者之所疑也。陽明亦有以釋之。傳習錄：「問：先生格致之說，隨時格物以致其知，則知是一節之知，非全體之知也，何以到得溥博如天，淵泉如淵地位？曰：心之本體，無所不該，原是一個天。只爲私欲障蔽，則天之本體失了。心之理無窮盡，原是一個淵。只爲私欲窒塞，則淵之本體失了。如念念致良知，將此障蔽窒塞，一齊去盡，則本體已復，便是天淵了。因指天以示之曰：如面前所見，是昭昭之天。四外所見，亦只是

昭昭之天。只爲許多牆壁遮蔽，不見天之全體。若撤去牆壁，總是一個天矣。於此便見一節之知，卽全體之知；全體之知，只一節之知；總是一個本體。『蓋零碎工夫，皆係用在本體上。零碎工夫，多用得一分，卽本體之障礙，多去得一分。及其去之淨盡，卽達到如天如淵地位矣。此致良知之工夫，所以可在事上磨練也。』

以上皆陽明所以釋致良知之疑者。統觀其說，精微簡捷，可謂兼而有之矣。梨洲曰：『先生閱宋儒之後，學者以知識爲知。謂人心之所有者，不過明覺，而理爲天地萬物之所公共，必窮盡天地萬物之理，然後吾心之明覺，與之渾合而無間。說是無內外，其實全靠外來聞見，以填補其靈明。先生以聖人之學，心學也；心卽理也。故於格物致知之訓，不得不言致吾心之良知於事事物物，則事事物物，皆得其理。以知識爲知，則輕浮而不實，故必以力行爲工夫。良知感應神速，無有等待，本心之明卽知，不欺本心之明卽行，也不得不言知行合一。』龍溪曰：『文公分致知格物爲先知，誠意正心爲後行，故有游騎無歸之慮。必須敬以成始，涵養本原，始於身心有所關涉。若知物生於意，格物正是誠意工夫，誠卽是敬，一了百了，不待合之於敬，而後爲全經也。』
蕺山曰：『朱子謂必於天下事物之理，件件格過，以幾一旦豁然貫通。故一面有存心，一面有致知之說。非存心無以致知，而存心又不可以不致知，兩事遞相君臣，迄無把柄，既已失之支離矣。至於存心之中，分爲兩條：曰靜而存養，動而省察。致知之中，又復分爲兩途：曰生而知之者，義理禮樂名物，皆生而知之，而後有以驗其是非。』

之實。安往而不支離也？」此朱學與王學之異也。

良知之說，以一念之靈明爲主。凡人種種皆可掩飾，惟此一念之靈明，決難自欺。故陽明之學，進德極其勇猛，勘察極其深切。陽明嘗謂「志立而學半」。又謂「良知上留得些子別念卦帶，便非必爲聖人之志」。又曰：「凡一豪私欲之萌，只責此志不立，則私欲即退聽。一豪客氣之動，只責此志不立，則客氣便消除。責志之功，其於去人欲，有如烈火之燎毛，太陽一出，而罔兩潛消也。」此等勇猛精進之說，前此儒者，亦非無之。然無致良知之說，以會其歸，則其勘察，終不如陽明之真湊單微，鞭辟入裏，而其克治，亦終不如陽明之單刀直入，陵厲無前也。陽明之自道曰：「賴天之靈，偶有悟於良知之學，然後悔其向之所爲者，固包藏禍機，作偽於外，而心勞日拙者也。十餘年來，雖痛自洗剔創艾，而病根深痼，萌蘖時生。所幸良知在我，操得其要，譬猶舟之得舵，雖驚風巨浪，顛沛不已，猶得免於傾覆者也。」（寄鄭謙之書）包藏禍機，誰則能免？苟非以良知爲舵，亦何以自支於驚風巨浪之中乎？良知誠立身之大柄哉？

「心即理」一語，實爲王學鑰珠。惟其謂心即理，故節文度數，皆出於心，不待外求，心體明即知無不盡。亦惟其謂心即理，故是非善惡，皆驗諸心，隱微之地有虧，雖有驚天動地之功，猶不免於不仁之歸也。陽明曰：「世人分心與理爲二，便有許多病痛。如懷夷狄，尊周室，都是一個私心，便不當理。人卻說他做得當理，只心

有未純。往往慕悅其所爲，要來外面做得好看，卻與心全不相干。分心與理爲二，其流至於霸道之僞而不自知。故我說個心卽理。要使知心理是一個，便來心上做工夫，不去襲取於義，便是王道之真。」陽明此說，卽董子「正其義不謀其利，明其道不計其功」之真詮。持功利之說者，往往謂無功無利，要道義何用？又安得謂之道義？殊不知功利當合多方面觀之，亦當歷長時間而後定。持功利之說者之所謂功利，皆一時之功利，適足貽將來以禍患。自持道義之說者觀之，將來之禍患，皆其所自招；若早以道義爲念，則此等禍害，皆消弭於無形矣。佛所以喻世俗之善爲「如以少水，而沃冰山，暫得融解，還增其厚」也。功利之說，與良知之說，最不相容。故陽明闢之甚力。陽明之言曰：「聖人之學，日遠日晦；功利之習，愈趨愈下。其間雖嘗警惑於佛老，卒未有以勝其功利之心。又嘗折衷於羣儒，亦未有以破其功利之見。」可謂深中世人隱微深痼之病矣。今之世界，孰不知其罪惡之深？亦孰不知其禍害之烈？試問此罪惡禍害，何自來邪？從天降邪？從地出邪？非也。果不離因，仍不得不謂爲人所自爲。人何以造此罪惡？成此禍害？則皆計一時之功，而不計久遠之功；圖小己之利，而不顧大我之利爲之也。此卽所謂功利之見也。惟舉世滔滔，皆惑於功利之徒，故隨功利而來之禍害，日積月累而不可振救。陽明之言，可謂深得世病之癥結矣。

「學不至於聖人，終是自棄。」爲學者誠皆當有此志。然人之才力，天實限之。謂人人可以爲聖人，驗諸

事實，終是欺人之語。此所以雖有困勉行，及其成功一也之說，仍不能使人自奮也。陽明謂聖人之所以爲聖，在其性質而不在其分量。此說出，而後聖人真可學而至。實前古未發之論也。陽明之言曰：「聖人之所以爲聖，只是其心純乎天理，而無人欲之雜，猶精金之所以爲金，但以其成色足而無銅鉛之雜也。聖人之才力，亦有大小不同，猶金之分兩有輕重。所以爲精金者，在足色而不在分兩。故凡人而肯爲學，使此心純乎天理，則亦可以爲聖人。後世不知作聖之本，卻專在知識才能上求聖人，以爲聖人無所不知，無所不能，我須是將聖人許多知識才能，逐一理會始得。不務去天理上著工夫，徒弊精竭力，從冊子上鑽研，名物上考索，形迹上比擬。知識愈廣，而人欲愈滋；才力愈多，而天理愈蔽。正如見人有萬鎰精金，不作鍛鍊成色，無愧彼之精純，而乃妄希分兩，務同彼之萬鎰。錫鉛銅鐵，雜然而投，分量愈增，成色愈下。及其梢末，無復有金矣。」又曰：「後儒只在分兩上較量，所以流入功利。若除去了比較分兩的心，各自儘著自己力量精神，只在此心純乎天理上用功，即人人自有，個個圓成，便能大以成大，小以成小，不假外慕，無不具足。此便是實實落落，明善誠身的事了。」陽明此說，亦從心即理上來。蓋惟其謂心即理，故全乎其心，即更無欠缺。非如謂理在心外者，心僅有其靈明，必格盡天下之物，乃於理無不盡，而克當聖之目也。陽明又曰：「良知人人皆有，聖人只是保全，無些子障礙，兢兢業業，戰戰兢兢，自然不息，使也是學，只是生的分數多，所以謂之生知安行。衆人自孩提之童，莫

不完具此知。只是障蔽多。然本體之知，自難泯息。雖問學克治，也只憑他。只是學的分數多，所以謂之學知，利行。」

陽明與程朱之異，乃時會爲之，不必存入主出奴之見也。蓋自周子發明「以主靜立人極」而人生之趨向始定。程子繼之，發明「涵養須用敬，進學在致知」而求靜之方始明。夫所謂靜者，卽今所謂合理而已。人如何而能合理？第一當求理無不明。第二當求既明理，又不至與之相違。由前之說，所謂進學在致知；由後之說，則所謂涵養須用敬也。求合理之初步，自只說得到如此。逮其行之既久，然後知事物當然之理，雖若在於外物，實則具於吾心。理有不明，實由心之受蔽。欲求明理，亦當於心上用功，正不必將進學涵養，分爲兩事也。此非程朱之說，行之者衆，體驗益深，不能見到。故使陽明而生程朱之時，未必不持程朱之說，使程朱而生陽明之世，亦未必不持陽明之說。爲學如行修途，後人之所行，固皆繼前人而進也。此理非陽明所不知。顧乃自撰朱子晚年定論，以詒人口實。則以是時朱子之學方盛行，說與朱子相遠，不易爲人所信，故借此以警覺世人。且陽明理學家，非考據家，歲月先後，考核未精，固亦不足爲陽明病也。（朱子晚年定論者，陽明龍場悟後之作。輯朱子文三十四篇，皆與己說相合者。謂朱子晚年之論如此；四書集注，或問等，其中年未定之論也。當時羅整庵卽詒書辯之。謂所取朱子與何叔京書四通，何實卒於淳熙乙未，後二年丁酉，而論孟集注始成。

後陳建撰學節通辨，取朱子之說，一一考核其歲月，而陽明之誤益見矣。然陽明答整庵書，亦已自承歲月先後考之未精，謂意在委曲調停，不得已而爲此也。○羅整庵，名欽順，字允升，泰和人。陳建，字廷肇，號清瀾，東莞人。

篇十三 王門諸子

黃梨洲曰：「陽明之學，始汎濫於詞章，繼而徧讀考亭之書，循序格物，顧物理吾心，終判爲二，無所得入。於是出入於佛老者久之。及至居夷處困，動心忍性，因念聖人處此，更有何道？忽悟格物致知之旨，聖人之道，吾性自足，不假外求。其學凡三變而始得其門。自此以後，盡去枝葉，一意本原，以默坐澄心爲學的。有未發之中，始能有發而中節之和。視聽言動，大率以收斂爲主，發散是不得已。」江右以後，專提致良知三字。默不假坐，心不待澄，不習不慮，出之自有天則。蓋良知卽是未發之中，此知之前，更無未發。良知卽是中節之和，此知之後，更無已發。此知自能收斂，不須更主於收斂。此知自能發散，不須更期於發散。收斂者，感之體，靜而動也。發散者，寂之用，動而靜也。知之真切篤實處卽是行，行之明覺精察處卽是知，無有二也。居越以後，所操益熟，所得益化。時時知是知非，時時無是無非。開口便得本心，更無假借湊泊。如赤日當空，而萬象畢照。是學成之後，

又有此三變也。」陽明江右以後境界，乃佛家所謂中道，非學者所可驟幾。其自言教人之法則曰：「吾昔居濠時，見諸生多務知解，無益於得，姑教之靜坐。一時窺見光景，頗收近效。久之，漸有喜靜厭動，流入枯槁之病。故邇來只說致良知。良知明白，隨你去靜處體悟也好，隨你去事上磨鍊也好。良知本體，原是無動無靜的。」良知本體，既無動無靜，即不當更有動靜之分。動靜之分且無，更何有於偏主？然後來學者，似皆不能無所偏。則以中道非夫人所能，各因其性之所近，而其用力之方有不同，其所得遂有不同也。

陽明之學，首傳於浙中。浙中王門，以緒山、龍溪爲眉目。而二子之學，即有異同。具見於傳習錄及龍溪之天泉證道記。此事爲王門一重公案。爲陽明之學者，議論頗多。今略述其事如下：

嘉靖六年九月，陽明起征思田，將行，緒山與龍溪論學。緒山舉陽明教言曰：「無善無惡心之體。有善有惡意之動。知善知惡是良知。爲善去惡是格物。」龍溪曰：「此恐未是究竟話頭。若說心體是無善無惡，意亦是無善無惡，知亦是無善無惡，物亦是無善無惡矣。若說意有善惡，畢竟心體還有個善惡在。」緒山曰：「心體是天命之性，原無善惡。但人有習心，意念上見有善惡在。格致誠正脩，此是復性體工夫。若原無善惡，工夫亦不消說矣。是夕，坐天泉橋，請正於陽明。陽明謂：「二君之見，正好相資，不可各執一邊。我這裏接人，原有二種：利根之人，直從本源上悟入。人心本體，原是明瑩無滯，原是個未發之中。利根之人，一悟本體，即是工夫。人已內

外，一齊俱透。其次不免有習心在，本體受蔽。故且教在意念上實落爲善去惡。工夫熟後，渣滓去盡，本體亦明淨了。汝中之見，是我接利根人的。德洪之見，是我爲其次立法的。相取爲用，則中人上下，皆可引入於道。若執一邊，眼前便有失人，便於道有未盡。」既而曰：「利根之人，世亦難遇。人有習心，不教他在良知上實用爲善去惡工夫，只去懸空想個本體，一切事爲，俱不著實，不是小小病痛，不可不早說破。」

以上略據傳習錄。龍溪所記，無甚異同。而鄒東廓記其事，則云：「緒山曰：至善無惡者心。有善有惡者意。知善知惡是良知。爲善去惡是格物。龍溪云：心無善而無惡。意無善而無惡。知無善而無惡。物無善而無惡。」至善無惡，與無善無惡，頗相逕庭。劉蕺山謂：「陽明天泉之言，與平時不同。平時常言至善是心之本體。又言至善只是盡乎天理之極，而無一毫人欲之私。又言良知即天理。有時說無善無惡者理之靜，亦未嘗徑說無善無惡是心體。」黃梨洲謂：「考之傳習錄，因薛中離（薛侃，字尚謙，號中離，廣東揭陽人。）去花間草，陽明言無善無惡者理之靜，有善有惡者氣之動。蓋言靜爲無善無惡，不言理爲無善無惡，理即是善也。獨天泉證道記，有無善無惡者心之體，有善有惡者意之動之語。夫心之體即理也。心體無間於動靜。若心體無善無惡，則理是無善無惡，陽明不當但指其靜時言之矣。釋氏言無善無惡，正言無理也。善惡之名，從理而立，既已有理，安得言無善無惡？」心體果是無善無惡，則有善有惡之意，從何處來？知善知惡之知，又從何處來？爲善

去惡之功，從何處起？無乃語語斷流絕港乎？一因謂四句教法，陽明集中不經見，疑其出於龍溪。又謂緒山所舉四語，首句當依東廓作至善無惡，亦緒山之言，非陽明立以爲教法。何善山（何廷仁，字性之，號善山，江西零縣人）云：「無善無惡者，指心之感應無迹，過而不留，天然至善之體也。有善有惡者，心之感應謂之意，物而不化，著於有矣。故曰：意之動，若以心爲無，以意爲有，是分心意爲二，非合內外之道也。」案此所爭，皆失緒山之意。緒山釋無善無惡者，心之體曰：「至善之體，惡固非其所有，善亦不得而有也。至善之體，虛靈也。虛靈之體，不可先有乎善，猶明之不可先有乎色，聰之不可先有乎聲也。目無一色，故能盡萬物之色。耳無一聲，故能盡萬物之聲。心無一善，故能盡天下萬事之善。今之論至善者，乃索之於事事物物之中，先求其所謂定理者，以爲應事宰物之則，是虛靈之內，先有乎善也。虛靈之內，先有乎善，是耳未聰而先有乎聲，目未視而先有乎色也。塞其聰明之用，而窒其虛靈之體，非至善之謂矣。今人乍見孺子入井，皆有怵惕惻隱之心。聖人不能加，而塗人未嘗減也。但塗人擬議於乍見之後，滯入納交要譽之私耳。然則塗人之學聖人，果憂怵惕惻隱之不足邪？抑去其蔽，以還其乍見之初心也？虛靈之蔽，不但邪思惡念，雖至美之念，先橫於中，積而不化，已落將迎，意必之私，而非時止時行之用矣。故先師曰：無善無惡者，心之體。是對後世格物窮理之學，先有乎善者言之也。」然則緒山所謂無善無惡，卽其所謂至善者也。（龍溪東廓所記，辭異意同。）緒山又曰：「善惡之機，

縱其生滅相尋於無窮，是藏其根而惡其萌蘖之生，濁其源而辨其末流之清也。是以知善知惡爲知之極，而不知良知之體，本無善惡也。知有爲有去之爲功，而不知究極本體，施功於無爲，乃真功也。正念無念。正念之念，本體常寂。」或問：「胸中擾擾，必猛加澄定，方得漸清。」曰：「此是見上轉。有事時，此知著在事上。事過，此知又著在虛上。動靜二見，不得成片。若透得此心澈底無欲，雖終日應酬百務，本體上何曾加得一毫事？了即休，一過無迹，本體上何曾減得一毫？」可與前所引之言參看。○周海門謂：「發明心性處，善不與惡對。如中心安仁之仁，不與忍對。主靜立極之靜，不與動對。大學善上加一至字，實絕名言，無對待之辭。天地貞觀，不可以貞觀爲天地之善。日月貞明，不可以貞明爲日月之善。星辰有常度，不可以有常度爲星辰之善。嶽不可以峙爲善。川不可以流爲善。有不孝而後有孝子之名。有不忠而後有忠臣之名。孝子無孝，若有孝，便非孝矣。忠臣無忠，若有忠，便非忠矣。」亦與緒山之說相發明。○海門，名汝登，字繼元，嵯縣人。○蕺山、梨洲所疑，可以釋矣。至善山所疑，亦在字句之間。彼所謂「感應無迹，過而不留」者，即陽明所謂「理之靜」，亦即其所謂「盡乎天理之極，而無一毫人欲之私」。其所謂「物而不化著於有」者，即其所謂「氣之動」，亦即其所謂「人欲」。二者自然皆出於心。特龍溪東廓所記，皆辭取對偶，徑以心與意爲相對之詞，未嘗詳言之曰：「無善無惡心之體，有善有惡，乃心之動而離乎體者，亦謂之意。」又未嘗於意字之下，加一注語曰：「即心之動而失

其體者，「遂致有此誤會耳。」（梨洲曰：「如善山之言，則心體非無善無惡，而有善有惡者，意之病也。心既至善，意本澄然無動。意之靈卽是知，意之明卽是物。」案此亦立名之異。梨洲名澄然無動者爲意，動而不善者爲意之病。緒山則名澄然無動者爲心，其動而不善者，則但名之爲意耳。）

羅念菴曰：「緒山之學數變，其始也，有見於爲善去惡者，以爲致良知也。已而曰：良知者，無善無惡者也。吾安得執以爲有而爲之，而又去之？已又曰：吾惡夫言之者，淆也。無善無惡者，見也，非良知也。吾惟卽吾所知以爲善者而行之，以爲惡者而去之，此吾所能爲者也。其不出於此者，非吾所得爲也。又曰：向吾之言，猶二也，非一也。夫子嘗有言矣，曰：至善者心之本體，動而後有不善也。吾不能必其無不善，吾無動焉而已。彼所謂意者，動也，非是之謂動也。吾所謂動，動於動焉者也。吾惟無動，則在吾者常一矣。」所謂「動於動」者，卽陽明所謂「氣之動」之至微者也。故知緒山之言，與陽明實不相背也。

至龍溪所謂「心體是無善無惡，則意亦是無善無惡，物亦是無善無惡，若說意有善惡，畢竟心體還有個善惡在」者，證道記自申其說曰：「顯微體用，只是一機；心意知物，只是一事。天命之性，粹然至善，神感神應，其機自不容已。惡固本無，善亦不可得而有也。若有善有惡，則意動於物，非自然之流行著於有矣。自然流行者，動而無動；著於有者，動而動也。」此原卽緒山「虛靈之體，不可先有乎善」善山「至

善之體，感應無迹，過而不留，物而不化，則爲動。『陽明』「理之靜，氣之動」之說，其所爭者，乃謂當在心體上用功，不當在意念上用功。故曰：「意是心之所發。若是有善有惡之意，則知與物一齊皆有，心亦不可謂之無矣。」龍溪之意，蓋謂意念之生，皆由心體流行之不得其當。吾人用功，當真徹根源，正其流行之體，不當沿流逐末，以致勞而少功也。職是故，其教人，乃以正心爲先天之學，誠意爲後天之學。其言曰：「吾人一切世情嗜欲，皆從意生。心本至善，動於意始有不善。能在先天心體上立根，則意所動自無不善；世情嗜欲，自無所容。致知工夫，自然易簡省力。若在後天動意上立根，不免有世情嗜欲之難。致知工夫，轉覺煩難。」其言誠極超妙。然其所謂先天心體者，實使人無從捉摸。所謂致知工夫，遂使人無從下手。此則陽明所以有利根人難遇，苟非其人，懸空想象一個本體，一切事爲，俱不着實，病痛非小之戒也。龍溪曰：「良知卽是獨知。」又曰：「獨知便是本體，慎獨便是工夫。」其說獨知曰：「非念動後知，乃先天靈竅，不因念生，不隨念遷，不與萬物作對。」其說慎獨之工則曰：「慎非強制之謂。兢業保護此靈竅，還他本來清淨」而已。又曰：「渾然一體，無分於已發未發，亦無先後內外。才認定些子，便有認定之病。隨物流轉，固是失卻主宰。卽曰：我於此收斂握固，便有樞可執，以爲致知之實，未免猶落內外二見。才有執著，終成管帶。卽此管帶，便是放失之因。」其言之超妙如此，誠令學者體悟不及，功力難施。故梨洲謂其「一著工夫，未免有礙虛無之體，則不得不近於禪。流行卽是主

宰懸崖撒手，茫無把握，以心息相依爲權法，則不得不近於老。」蓋幾於靜處體悟，事上磨鍊，兩無依據矣。唐荆川（名順之，字應德，武進人。）最服膺龍溪。自言於龍溪只少一拜，然其言曰：「近來談學，謂認得本體，一超直入，不假階級。竊恐雖中人以上，有所不能。竟成一番議論，一番意見而已。」又曰：「近來學者病痛，本不刻苦搜剔，洗空欲障。以玄妙之語，文夾帶之心。直如空花，竟成自誤。」過高之流弊，亦可見矣。

錢緒山曰：「昔者吾師之立教也，揭誠意爲大學之要旨，致知格物爲誠意之功。門弟子聞言，皆得入門用力之地。用力勤者，究極此知之體；使天則流行，纖翳無作；千戚萬應，而真體常寂，此誠意之極也。故誠意之功，自初學用之，即得入手；自聖人用之，精詣無盡。吾師既歿，吾黨病學者，善惡之機，生滅不已，乃於本體提揭過重。聞者遂謂誠意不足以盡道，必先有悟而意自不生；格物非所以言功，必先歸寂而物自化。遂相與虛僞以求悟，而不切乎民彝物則之常；執體以求寂，而無有乎圓神活潑之機。師云：誠意之極，止至善而已矣。是止至善者，未嘗離誠意而得也。言止則不必言寂，而寂在其中；言至善則不必言悟，而悟在其中；然皆必本於誠意焉。何也？蓋心無體，心之上，不可以言功也。應感起物，而好惡形焉，於是乎有精察克治之功。誠意之功極，則體自寂而應自順。初學以至成德，徹始徹終，無二功也。」案此所謂「誠意不足以盡道，必先有悟而意自不生」者，即龍溪之說也。緒山謂「心之上不可以言功」，必於應感起物之時，致其精察克治，即爲善去惡是

格物之說。二家宗旨之不同如此。至所評歸寂之說，則出於雙江。

陽明之致良知，原兼靜處體悟，事上磨鍊兩義。其後浙中之學，偏於事上磨鍊，遂有義襲助長之病。其主於凝聚者，則江右諸家也。江右王門，東廓、雙江、念菴、兩峯，皆有特見。今略述其說。

東廓主戒懼。其言曰：「敬也者，良知之精明而不雜以私欲者也。性體流行，合宜處謂之善，障礙而壅塞處，謂之不善。忘戒懼，則障礙而壅塞。無往非戒懼之流行，即無往非性體之流行矣。戒懼，禹之治水也。堤而遏之，與不決不排，其失維鈞。」東廓嘗曰：「諸君試驗心體，是放縱的？不放縱的？若是放縱的，添個戒懼，卻是加了一物。若是不放縱的，則戒懼是復還本體。此即所謂「一念不發，兢業中存」，蓋以此保其循理之靜也。」

雙江主歸寂。雙江常爲陝西按察副使，爲輔臣夏言所惡，罷歸，逮繫。閒久靜極，忽見此心真體，光明瑩澈，萬物皆備。出獄後，遂與來學者立靜坐法，使之歸寂以通感，執體以應用。謂獨知是良知萌芽處，與良知似隔一塵。此處著力，雖與半路脩行不同，要亦是半路話頭。致虛守寂，方是不睹不聞之學，歸根復命之要。故夫子於咸卦，特地提出虛寂二字，以立感應之本。其言曰：「心無定體之說，謂心不在內也；百體皆心也，萬感皆心也。亦嘗以是求之，譬之追風逐電，瞬息萬變，茫然無所措手，徒以亂吾之衷也。」又曰：「無時不寂，無時不感者，心之體也。感惟其時，而主之以寂者，學問之功也。故謂寂感有二時者非也。謂功夫無分於寂感，而不知歸寂」

以主夫感者，又豈得爲是哉？不識不知，順帝之則，惟養之豫者能之。臨事而擇，不勝憧憧，中亦襲也，況未必中乎？（雙江謂「感物之際，加格物之功，是迷其體以索用。」）雙江之學，同門多相駁難。惟念菴深相契。兩峯晚乃是之。梨洲謂「陽明之學，本以靜坐澄心爲的。慎獨便是致中，中立而和生焉。先生之學，實傳習錄中之正法眼藏也。」（雙江之學，主於致中而和應。其餘諸家，則大抵謂已發未發，非有二候，致和卽所以致中。其說曰：「以流動爲感，則寂感異象，微波卽蕩，感皆爲寂累，固不待牯之反覆，而後失其虛明之體。若以鑑物爲感，則終日鑑，固無傷於止也。若患體之不正，故鑑之不明，亦當卽鑑時言之，不當離鑑以求止。何則？其本體常鑑，不可得而離也。若欲涵養本原停當，而後待其發而中節，此延平以來相沿之學，非孔門宗旨矣。」雙江則謂「未發寂然之體，未嘗離家國天下而別有其物，卽感而寂然者在焉耳。格致之功，通於寂感體用。」）念菴之學，主於收攝保聚。是時陽明門下之談學者，皆曰：知善知惡，卽是良知。依此行之，卽是致知。其弊也，取足於知，而不原其所以良；且易致字爲依字。失養其端，而任其所發。遂至以見存之知，爲事物之則；以外交之物，爲知覺之體；而不知物我之倒置矣。念菴謂善惡交雜，豈卽爲主於中者乎？中無所主，而謂知本常明，不可也。知有未明，依此行之，而謂無乖戾於既發之後，能順應於事物之來，不可也。故知善知惡之知，隨出隨泯，特一時之發見焉耳。一時之發見，未可盡指爲本體；則自然之明覺，固當反求其根原。故必有收攝保聚之

功，以爲充達長養之地；而後定靜安慮，由此以出。故致知者，致其靜無動有焉者也。非經枯槁寂冥之後，一切退聽，天理炯然，未易及此。其言曰：「不觀不聞，即吾心之常知處。自其常知不可以形求者，謂之不觀；不可以言顯者，謂之不聞；非杳冥之狀也。諸念皆泯，炯然中存，亦即吾之一事。此處不令他意攪雜，即是必有事焉。」又曰：「良知該動靜，合內外，其統體也。吾之主靜，所以致之，蓋言學也。蓋動而後有不善，有欲而後有動，動於欲而後有學。學者，學其未動焉者也。學其未動，而動斯善矣，動無動矣。」故自良知言之，無分於已發未發也。自知之所以能良者言之，則固有未發者以主之於中。夫至動莫如心，聖人猶且危之。苟無所主，隨感而發，譬之馭馬，衝勒去手，求斯須馳驟之中度，豈可得哉？一念毫之說如此，實足救一時之流弊也。

然念毫後來，又有進於此者。其告龍溪曰：「一二年來，與前又別。當時之爲收攝保聚，偏矣。蓋識吾心之本然者，猶未盡也。以爲寂在感先，不免於指感有時。以爲感由寂發，不免於指寂有處。其流之弊，必至重於爲我，疏於應物。蓋久而後疑之。夫心一而已。自其不出位而言，謂之寂，非守內之謂也。自其常通徹言之，謂之感，非逐外之謂也。寂非守內，故未可言處。（以其能感故也。）感非逐外，故未可言時。（以其本寂故也。）絕感之寂，非真寂矣。離寂之感，非真感矣。此乃同出而異名。吾心之本然，酬酢萬變，而於寂者未嘗有礙，非不礙也。吾有所主故也。苟無所主，則亦馳逐而不反矣。聲臭俱泯，而於感者未嘗有息，非不息也。吾無所倚故也。苟有

所倚，則亦膠固而不通矣。此所謂收攝保聚之功，君子知幾之學也。學者自信，於此灼然不移，即謂之守寂可也。謂之妙感亦可也；謂之主靜可也；謂之慎動亦可也。使於冥寂端倪，果能察識，隨動隨靜，無有出入，不與世界事物相對待，不倚自己知見作主宰，不著道理名目生證解，不藉言語發揮添精神，則收攝保聚之功，自有準則矣。」案此論，誠有契於心體之妙，宜龍溪之聞其說而無閒然也。

兩峯之學，以涵養本原爲主。梨洲曰：「雙江主於歸寂，同門辨說，動盈卷軸。先生言：發與未發，本無二致。戒懼慎獨，本無二事。若云：未發不足以兼已發，致中之外，別有一段致和之功，是不知順其自然之體，而加損焉，以學而能，以虛而知者也。又言：事上用功，雖愈於事上講求道理，均之無益於得也。涵養本原，愈精愈一，愈一愈精，始是心事合一。又言：吾心之體，本止本寂。參之以意念，飾之以道理，侑之以聞見，遂以感通爲心之體，而不知吾心雖千酬萬應，紛紜變化之無已，而其體本常止常寂。彼以靜病之者，似涉靜景，非爲物不貳，生物不測之體之靜也。凡此所言，與雙江相視莫逆，故人謂雙江得先生而不孤云。」

塘南思默，皆王門再傳弟子。然其所言，實有視前輩爲進者。陽明歿後，致良知一語，學者不深究其旨，多以情識承當。雙江念菴，舉未發以救其弊，終不免頭上安頭。塘南謂：「生生之機，無有停息，不從念慮起滅。今人將發字看粗，以澄然無念爲未發。澄然無念，是謂一念，乃念之至微者，非無念也。生生之機，無一息之停，正

所謂發。譬之澄潭之水，乃流之至平至細者，非不流也。未發水之性，離水而求性曰支。卽水以爲性曰泥。以水與性爲二物曰岐。惟時時冥念，研精入神，乃爲道之所存。」又曰：「一意非念慮起滅之謂，乃生幾之動而未形者。知者，意之體。物者，意之用。但舉一意字，則寂感體用悉具。有性則常發而爲意，有意則漸著而爲念。意不可以動靜言，動靜者念也。意本生生，造化之幾不充，則不能生。故學貴從收斂入。收斂卽慎獨，此凝道之樞要也。欲悟未有天地之先，言語道斷，心行處滅，乃爲不學不慮之體，此正邪說淫辭。以念頭轉動爲生幾，則落第二義矣。」其分別生生之機與意念，實絕精之論也。（塘南曰：「性之一字，本不容言，無可致力。知覺意念，總是性之呈露，皆命也。性者，先天之理。知屬發竅，是先天之子，後天之母也。此知在體用之間。若知前求體則苦空，知後求用則逐物。知前更無未發，知後更無已發；合下一齊俱了，更無二功。故曰獨。獨者，無對也。無對則一，故曰不貳。意者，知之默運，非與之對立而爲二也。是故性不假修，只可云悟。命則性之呈露，不無習氣隱伏其中，此則有可修矣。修命者，盡性之功。」又曰：「性廓然無際。生幾者，性之呈露處也。性無可致力，善學者惟研幾。研幾者，非於念頭萌動，辨別邪正之謂也。此幾生而無生，至微至密，非有非無。惟縣縣若存，退藏於密，庶其近之矣。」）

思默亦主研幾。其說曰：「所知因感而有，用之發也。能知不因感有，常知而常無知，體之微也。此體是古

今天地人物之靈根，於稷中一點必不能自己之命脈。聖門學者，惟顏子能在知上用功，其餘多在所知上用功。又曰：「誠無爲，幾則有善惡。何者？凡動便涉於爲，爲便易逐於有，逐於有，則雖善亦粗，多流於惡。故學問全要研幾。研者，研磨之謂。研磨其逐有而粗者，務到極深極微處，常還他動而未形，有無之間的本色，則無動非神矣。」其說亦極入微也。

傳姚江之學者，當以泰州爲最雄偉。而其流弊亦最甚。泰州之學，始自心齋。其行本怪，其學又純是蒲輪轡環意見。（王良，字汝止，號心齋，泰州安豐場人。七歲，受書鄉塾。貧不能竟學。從父商於山東，常袖孝經、論語、大學，逢人質難。久而信口談解，如或啓之。雖不得專功於學，然默默參究，以經證悟，以悟釋經，歷有年所，人莫能窺其際也。一夕，夢天墮壓身，萬人奔號求救。先生舉臂起之，視其日月星辰失次，復手整之。覺而汗溢如雨，心體洞徹。自此行住語默，皆在覺中。乃按禮經，製五常冠，深衣，大帶，笏板服之。曰：「言堯之言，行堯之行，而不服堯之服，可乎？」時陽明巡撫江西，講良知之學。大江之南，學者翕然信從。顧先生僻處，未之聞也。有黃文剛者，吉安人也，而寓泰州。聞先生論，詫曰：此絕類王巡撫之談學也。先生喜曰：有是哉！王公論良知，良談格物，如其同也。是天以王公與天下後世也。如其異也，是天以良與王公也。即日啓行，以古服進見。至中門，舉笏而立。陽明出迎於門外，始入。先生據上坐，辯難久之，稍心折，移其坐於側。論畢，乃歎曰：「簡易直截，良不及也。」下拜。

稱弟子。退繹所聞，間有不合。悔曰：「吾輕矣。」明日入見，告之。陽明曰：「善哉！子之不輕信從也。」先生復上坐辯難。久之，始大服。遂爲弟子如初。陽明謂門人曰：「向者吾禽宸濠，一無所動，今卻爲斯人動矣。陽明歸越，先生從之。來學者多從先生指授。已而歎曰：「千載絕學，天啓吾師，可使天下有不及聞者乎？」因問陽明以孔子轍環車制。陽明笑而不答。歸，自創蒲輪，招搖道路。將至郡，有老叟夢黃龍無首，行雨至崇文門，變爲人立晨起往候，而先生適至。時陽明之學，謗議遽起，而先生冠服言動，不與人同，都人以怪魁目之。同門在京者勸之歸。陽明亦移書責之。先生始還會稽。陽明以先生意氣太高，行事太怪，痛裁抑之。及門三日不得見。陽明送客出門，先生長跪道旁，曰：「良知過矣。」陽明不顧而入。先生隨之，至庭下，厲聲曰：「仲尼不爲己甚。」陽明乃揖之起。陽明卒於師，先生迎哭，至桐廬，經紀其家而後返。開門授徒，遠近皆至。同門會講者，必請先生主席。陽明而下，辯才推龍溪，然有信有不信。惟先生於眉睫之間，省覺人最多。先生以九二見龍爲正位。孔子修身講學，以見於世，未嘗一日隱也。有以伊、傅稱先生者。先生曰：「伊、傅之事我不能，伊、傅之學我不由。伊、傅得君，可謂奇遇。如其不遇，終身獨善而已。孔子則不然也。」黃梨洲曰：「此終是蒲輪轍環意見。於遯世不見知而不悔之學，終隔一座也。」故其後多豪傑之士，而其決裂亦最甚焉。心齋格物之說，以身與天下國家爲物，身爲本，天下國家爲末。行有不得，皆反求諸己，是爲格物工夫。故齊治平在於安身。知安身者必愛身，敬身愛

身敬身者，必不敢不愛人，不敬人。愛人者人恒愛之，敬人者人恒敬之，而身安矣。一家愛我，敬我則家齊。一國愛我，敬我則國治。天下愛我，敬我則天下平。亦仍是蒲輪轅環意見也。心齋弟子著者爲王一菴（名棟，字隆吉，泰州人）。徐波石（名樾，字子直，貴溪人）。一菴謂誠意卽慎獨，其說頗精。（其說曰：「身之主宰謂之心，心之主宰謂之意。心者，虛靈善應，而其中自有寂然不動者，爲之主宰，是之爲意。人心所以應萬變而不失者，只緣有此靈體，不慮而知，爲之主宰耳。聖狂之分，卽在此主宰之誠不誠。故誠意工夫，卽是慎獨。獨者，意之別名。慎者，誠之用力者耳。以此靈體，不慮而知，自作主張，自裁生化，故謂之獨。少間，捷以見聞才識之能，情感利害之使，則不可謂之獨矣。若謂意爲心之發動，而欲審機於動念之初，則情念一動，便屬流行，於此用功，恐倉卒之際，物化神馳，雖有敏者，莫措其手。非聖門誠意之功，先天易簡之學矣。」）波石之學，則以不犯手爲妙。謂人心自然明覺，起居食息，無非天者。又從而知覺之，是二知覺也。所謂「見成良知」也。波石之學，傳諸顏山農（名鈞，吉安人）。及趙大洲（名貞吉，字孟靜，內江人）。山農好俠，學主率性而行。大洲亦謂禪不害人。山農之學，傳諸何心隱（本姓梁，名汝元，字夫山，後自改姓名。吉州永豐人）。及羅近溪（名汝芳，字維德，江西南城人）。心隱亦豪傑之士。嘗授計亂者，以去嚴嵩。近溪之學，以赤子良心，不學不慮爲的，以天地萬物同體，徹形骸，忘物我爲大。謂「此理生生不息，不須把持，不須接續，當下渾淪順適。工夫難得湊泊，卽以不屑湊

泊爲工夫。胸次茫無畔岸，便以不依畔岸爲胸次。解纜放船，順風張棹，無之非是。學人不省，妄以澄然湛然爲心之本體，沈滯胸臆，留戀景光，是爲鬼窟活計。實禪語之精者也。近溪之傳，爲焦澹園（名竑，字弱侯，南京旗手衛人）及周海門（見前）澹園嘗駁明道隨佛之說。海門教人，亦以直下承當爲貴。嘗問門人劉瑋曰：「信得當下否？」曰：「信得。」「然則汝是聖人否？」曰：「也是聖人。」曰：「又多一也字。」洪舒民間：「認得心時，聖人與我一般。今人終身講學，到底只做得鄉人，何也？」曰：「只是信不及耳。汝且道，今日滿堂問答詠歌，一種平心實意，與杏壇時有二乎？」曰：「無二也。」曰：「如此何有鄉人之疑？」曰：「只爲他時便不能如此。」曰：「遠則便覺，依猶不遠。」曰：「常常提起方可。」曰：「遠則提起，不遠提個甚麼？」普禪機也。海門之學，傳諸陶石簣（名望齡，字周望，會稽人）亦汎濫方外，與澄然、澄密、雲悟諸僧交。大洲之學，傳諸鄧太湖（名謬渠，初名鶴，內江人）太湖嘗爲僧。其學只主見性，不主戒律。身之與性，截然分爲兩事。又有方藩一者（名與時，黃陂人）曾入太和山，習攝心術。又得黃白術於方外。尙玄虛，侈談說。龍溪念菴，皆目爲奇士。耿楚侗（名定理，字子庸，黃安人）初出其門。後知其僞，去之。事鄧謩渠，何心隱皆有得。不煩言說，當機指點，機鋒迅利。其兄天臺（名定向，字在倫）則排斥狂禪，力主實地。然其弟子管東溟（名志道，字登之，婁江人）著書數十萬言，仍多鳩合儒釋。蓋其末流之勢，業已不可遏止也。

王學流傳，梨洲明儒學案，分爲七派（浙中，江右，南中，楚中，北方，粵閩，泰州。）其嶄然見頭角者，實惟浙中、江右、泰州。江右最純謹。浙中之龍溪，泰州之心齋，天分皆極高。然其後流弊皆甚。論者謂陽明之學，得龍溪心齋而風行天下，亦以龍溪心齋故，決裂不可收拾焉。蓋浙中之弊，純在應迹上安排湊泊，則失之淺俗。玩弄本體，以爲別有一物，可以把持，則墮入魔障。而純任流行，尤易致解纜放船，絕無收束。更益以泰州之猖狂機變，遂無所不至矣。清張武承（名烈，大興人）撰王學質疑，攻王學流弊曰：「高者脫略職業，耽睡名庵。卑者日沈迷於酒色名利。案有榜嚴，南華者爲名士。挾妓呼盧，裸而夜飲者爲高致。抗官犯上，羣噪而不遜者爲氣節。矯詐嗜殺，僥倖苟利者爲真經濟。謹綱常，重廉隅者爲宋頭巾。舉天下庠序之士，如沸如狂，入則詬於家，出則譁於朝，闕獻之形，日積於學士大夫之心術，而天下不可爲。」流弊如此，宜其爲一世所疾惡也。然如張氏所述之情形，何代無之？則亦不必盡歸咎於王學耳。

篇十四 有明諸儒

明代理學，當以陽明爲中心。前乎陽明者，如白沙，則陽明之先河。與陽明並時者，如甘泉，則與陽明相出入。後乎陽明者，如畿山，如見羅，則與陽明小異其趣者也。故陽明之學，是非然否且弗論，其爲明代理學之中

心，則好之者，惡之者，皆不能有異辭也。

白沙之學，主靜中養出端倪。其初求之簡冊，累年無所得。一朝以靜坐得之。然後見此心之體，廣大高明，不離日用。一真萬事，本自圓成。不假人力，無內外，大小，精粗，一以貫之。其言曰：「人爭一個覺才覺，使我大而物小，物有盡而我無盡。」又曰：「終日乾乾，只是收拾此理而已。此理干涉至大，無內外，無終始，無一處不到，無一息不運。有此，則天地我立，萬化我出，而宇宙在我矣。得此把柄入手，更有何事？往古來今，四方上下，一齊穿紐，一齊收拾。隨時隨處，無不是這個充塞。色色任他本來，何用腳旁手攘？」

白沙之學，吃緊工夫，全在涵養。以虛爲本，以靜爲門戶，以勿忘勿助之間，爲體認之則。或嘗其近禪。或謂有明之學，至白沙而後精，至陽明而後大云。或問龍溪：「白沙與陽明同異？」龍溪曰：「白沙緣世人精神撒撥，向外馳求，欲返其性情而無從入，只得假靜中一段行持，窺見本來面目，以爲安身立命根基，所謂權法也。若致知宗旨，不論語默動靜，從人情事變，徹底鍊習，以歸於元。譬之真金爲銅鉛所雜，不遇烈火烹熬，則不可得而精。師門有三種教法：從知解而得者，謂之解悟。未離言詮。從靜中而得者，謂之證悟。猶有待於境。從人事鍊習而得者，忘言忘境，觸處逢源，愈搖動，愈凝寂，始爲徹悟。」龍溪教人，向偏於事上磨鍊。此說亦不離此旨。然白沙與姚江之大小，則於此可見矣。

與陽明同時並稱者，厥惟甘泉。（湛若水，字元照，號甘泉，廣東增城人。）甘泉爲白沙弟子。陽明嘗溺於二氏，與甘泉交，乃一意聖學。陽明主致良知，而甘泉標「隨處體認天理」爲宗旨。兩家各立門戶。湛氏門人，不如王氏之盛。然當時學於湛者，或卒業於王，學於王者，或卒業於湛。其後名湛氏之學者亦多，湛氏亦有明一大師也。

甘泉之說，有與陽明極相似者。其說天理曰：「天理二字，人人固有，非由外鑠。不爲堯存，不爲桀亡。故人皆可以爲堯舜，初學與聖人同此心，同此一個天理。雖欲強無之不得。見孺子入井，見餓殍，過宗廟，到墟墓，見君子，不知不覺，萌動出來，遏他又遏不得。有時志不立，習心蔽障，忽不見了，蓋心不存故也。心若存時，自然見前。」此猶陽明之言良知也。又曰：「心存得中正時，便見天理。」又曰：「心中無事，天理自見。」亦以天理爲在心。又曰：「後世儒者，認行字別了。皆以施爲班布者爲行。殊不知行在一念之間耳。自一念之存，以至於事爲之施布，皆行也。且事爲施布，豈非一念爲之乎？所謂存心，卽行也。」此亦陽明知行合一之說也。所異者，陽明以爲心卽理，甘泉則雖謂理在吾心，終不免體認於外以足之耳。

甘泉之說曰：「格，至也。物，天理也。卽道。格卽造詣之義。格物，卽造道也。知行並進，學問、思辨、行，所以造道也。故讀書，親師友，酬應，隨時隨處，皆求體認天理而涵養之，無非造道之功。」此純似程子「窮理亦多端」

之說。然甘泉又不甘居於務外，乃曰：「以隨處體認爲求之於外者，非也。心與事應，然後天理見焉。天理非在外也。特因事之來，隨感而應耳。」又曰：「堯舜允執厥中，非獨以事言，乃心事合一。允執之者，脗合於心，與心爲一，非執之於外也。若能於事物上察見天理，平時涵養，由中正出，卻由仁義行之學。平時無存養工夫，事到面前，才尋討道理，卽是行仁義，卽是義外，卽是義襲而取之者也。」既曰天理爲人人所固有，初學與聖人無異，又必待事物上察見，未免自相矛盾。若曰心與事應，而後天理見，則心豈有不感時邪？甘泉蓋恐人墮入見成良知一路，故欲加之以學問思辨之功。（或問：「先生嘗言是非之心，人皆有之，此便是良知，亦便是天理。依著自己是非之心，存養擴充將去，便是致良知，亦便是隨處體認天理也。然而外人多言先生不欲學者，言良知，豈慮其體察未到，將誤認於理欲之間，遂以爲真知也邪？」曰：「如此看得好。良知二字，自孟子發之，豈不欲學者言之？但學者往往徒以爲言。皆說心知是非皆良知，知得是便行到底，知得非便去到底，如是是致。恐師心自用，還須學問思辨行，乃爲善致。」）而不知言精察於吾心之理，以爲規矩準繩，而施之於事爲，與體認於事物之上，以求吾心天理之著見，然後持之以爲應事之具，其簡直迂曲，則大有別矣。若謂離事物無從精吾心之理，則又有說。甘泉之言曰：「陽明與吾看心不同。吾所謂心，體萬物而不遺者也，故無內外。陽明所謂心，指腔子裏而爲言者也，故以吾之說爲外。」（陽明謂「隨處體認天理，是求之於外。」）梨洲評

之曰：「天地萬物之理，不外於腔子裏，故見心之廣大。若以天地萬物之理，即吾心之理，求之天地萬物，以爲廣大，則先生仍爲成說所拘也。天理無處而心其處，心無處而寂然未發者，其處體認者亦惟體認之於寂而已。今曰隨處體認，毋乃體認於成？其言終有病也。」

或問聶雙江：「隨處體認天理何如？」曰：「此甘泉揭以教人之學，甘泉得之羅豫章。豫章曰：爲學不在多言，但默坐澄心，體認天理。若見天理，則人欲自退聽。由此持守，庶幾有功。」案雙江之說，殊能得其來歷。甘泉之說，實與豫章之說，息息相通。但豫章之說，少偏於靜。甘泉不以爲然，乃改「默坐澄心」爲「隨處體認」，欲合「靜而存養，動而省察」爲一耳。然欲合此二語爲一，隨處體認天理，實遠不如致良知之簡捷而深入也。（陽明與毛古庵書：「致良知之說，與體認天理之說，本亦無大相遠，但微有直截迂曲之差耳。譬之種植，致良知者，培其根本之生意，而達之枝葉者也。體認天理者，茂其枝葉之生意，而求復之根本者也。」）

隨處體認天理之說，雖曰理在吾心，實仍即物求理之變相。其失易墮於支離。故其後學，咸欲以直截救之。湛門如呂巾石（名懷，字汝德，廣信永豐人）則以爲天理良知，本同宗旨。如洪覺山（名垣，字峻之，徽州婺源人）則謂體認天理，是不離根之體認。工夫全在幾上用。如唐一庵（名樞，字惟中，歸安人）則標討真心三字爲的。爾隨處體認，或失於反身尋討。致良知，或失於誤認靈明。如許敬庵（名孚遠，字孟仲，德清人）學

於唐一庵。則謂學以克己爲要。謂人有血氣心知。便有種種交害。雖未至目前。而病根常在。必在根上看到方寸地。不掛一塵。方是格物。皆鞭辟入裏。浸浸近於王學矣。其初學於許敬庵。後傾向王學。而又能救正王學之失者。厥惟劉蕺山。

蕺山標慎獨爲宗旨。其說曰：「知善知惡之知。卽好善惡惡之意。亦卽無善無惡之體。意者。心之所存。心之主宰。」非所發也。心之體。非心之用也。（流行爲用。）與起念之好惡不同。（念有起滅。意則常存常發。）人心無思無不思。無思慮未起時。必物感相乘。思爲物化。乃憧憧往來耳。陽明以誠意爲主意。致良知爲工夫。謂誠意無工夫。工夫皆在致知。殊不知好善惡惡。卽知善知惡。非知善後好。知惡後惡。故更無知善知惡之可言。然則知卽意也。好必善。惡必惡。放心善。意者。心之所存。好善惡惡之心。卽好善惡惡之意。故意有善而無惡。（惡惡卽惡不善。惡不善卽好善。）此所謂獨知也。良知不慮而知。誠者不思而得。故誠卽知。致也者。誠之者也。離卻意根一步。卽無致知可言。故誠意慎獨非二事。宋儒不從慎獨認取。故不得不提敬於格物之前。陽明云：有善有惡者。意之動。是以念爲意。善惡難糅。何處得覺歸宿。專提致良知三字。遂致以流行心體承當。今知誠意卽慎獨。離意根一步。卽妄而不誠。則愈收斂。是愈推致。而動而省察可廢。何也。存養不專。閑靜省察正存養之得力處也。」案蕺山之說。蓋宗江右。而尤於塘南爲近。

初爲陽明之學，而後變焉者，又有李見羅。（名材，字孟域，豐城人。學於鄒東廓。）見羅提止修二字，以止爲主意，修爲工夫。謂「人生而靜，以上是至善。發爲惻隱、羞惡、辭讓，是非四端，有善便有不善。知是流動之物，都已向發邊去。以此爲致，遠於人生而靜以上之體。」故主「攝知歸止」。「刻刻能止，則視聽言動，各當其則，不言修而修在其中。稍有出入，不過點檢提撕修之工夫，使常歸於止而已。」見羅開陽明之說曰：「釋氏以知覺運動爲性。吾儒本天，故於性上，只道得一個善字。就於發用之際，見其善之條理。惻隱名仁，羞惡名義，辭讓名禮，是非名智。未嘗云有善無不善也。後儒曰：無善無惡者心之體。以其就知上看體，知固有良有不良故也。玉本無瑕，只合道個白，不可云有白無黑。水本無汙，只合道個清，不可云有清無濁。無善無惡既均，作善作惡亦等，何也？總之非吾性所有也。見性一差，弊至於此。則知知覺運動，不可言性；儒者之學，斷須本天。程朱之論，固自有其獨到之處也。」案見羅此辯，殊失陽明本意。參觀前兩篇自明。見羅又謂「致知二字，並列於八目之中。知本知止，特揭於八目之外。略知本而揭致知，五尺之童，知其不可。自古之欲明明德，至至是皆以修身爲本，詳數事物，而歸本於修身。本在此，止在此。知本者，知修身爲本而本之。知止者，知修身爲本而止之。知修身爲本而止之，即止於至善也。」合「此謂知本」之本，與「至是皆以修身爲本之本」爲一，亦未必其遂安耳。

東林之學，與陽明有異同者，爲顧涇陽（名憲成，字叔時，無錫人）及高景逸（名肇龍，字存之，無錫人）。涇陽提出性字，謂「性是心之根柢。舍性言心，必墮情識。」「善卽心之本色，說德著不著，明目之本色，聽耳之本色，說得個不著否？何云無善乃不著於善耶？」景逸主格物，謂「不窮其理，物是外物。窮其理，物卽吾心。」「學者無窮工夫，心之一字，是大總括。心有無窮工夫，敬之一字，是大總括。心無一事爲敬。主一之謂敬。無適之謂敬。人心如何能無適？須先窮理，識其本體。」「聖人只從矩，不從心所欲。徒知昭昭靈靈者爲心，而外天下之物，是爲無矩之心。以應天下之物，師心自用而已。」「陽明曰：致知在格物者，致吾心之良知於事物，致吾心之良知於事物，則事事物物，各得其理。是格物在致知。又曰：格，正也。格去心之不正，以歸於正。是格物在正心誠意。」「吾人日用，何嘗離格物。開口便是，動念便是。善格物者，時時知本。善知本者，時時格物。格透一分，則本地透一分。知地透一分，誠良知者，致知不在格物，故虛靈之用，多爲情識，而非天則之自然，去知遠矣。」案高顧所關，皆王學末流之弊。若陽明本說，則實不如是也。（景逸又曰：「陽明曰：有善有惡意之動。善謂善念，無善則無念。吾以善爲性，彼以善爲念也。」此說亦非。參看上篇錢緒山之說自明。）

篇十五 總論

以上各篇，舉理學中之重要家數，一一加以論列。理學之爲理學，亦略可見矣。今再統其舉而略論之。理學之特色，在其精微徹底。一事之是非，必窮至無可復窮之處，而始可謂定。否則畫一境以自足，而曰：吾之所論者，姑止於是而已。則安知所研究者出此以外，而其是非不翻然大變乎？理學家則不然。或問伊川：「人有言：盡人道謂之仁，盡天道謂之聖。此語何如？」曰：「安有知人道而不知天道者？道一也，豈人道自是一道，天道自是一道？」楊子曰：「通天地人曰儒，通天地而不通人曰技。此亦不知道之言。豈有通天地而不通於人者哉？天地人只一道也。才通其一，則餘皆通。如後人解易，言乾天道也，坤地道也，便是亂道。語其體，則天尊地卑，論其道，豈有異哉？」橫渠答范巽之云：「所訪物怪神姦，此非難語，顧語未必信耳。」孟子所論，知性知天，學至於知天，則物所從出，當源源自見。知所從出，則物之當有當無，莫不心喻，亦不待語而後知。諸公所論，但守之不失，不爲異端所劫，則進進不已，物怪不須辨，異端不必攻，不逾期年，吾道勝矣。若欲委之無窮，付之不可知，則學爲疑難，智爲物昏，交來無間，卒無以自存，而溺於怪妄必矣。」宋儒所謂理者，果能貫天地人幽明常變而無間否？自難斷言。然其所求，則固如此。其說自成一系統，其精粹處，確有不可磨滅者，則固不容誣也。

以其所求之徹底，故其所爲，必衷諸究極之是非，而尋常人就事論事之言，悉在所不取。或問伊川：「前世隱者，或守一節，或悖一行，不知有知道者否？」曰：「若知道，則不肯守一節一行也。此等人鮮明理，多取古人一節事專行之。古人有殺一不義，雖得天下不爲，則我亦殺一不義，雖得天下不爲。古人有高尙隱逸，不肯就仕，則我亦高尙隱逸不仕。如此，則放效前人所爲耳。於道鮮有得也。是以東漢尙名節，有雖殺身不悔者，只是不知道也。」陽明亦曰：「聖賢非無功業氣節，但其循著天理，則便是道，不可以事功氣節名矣。」蓋天下有真知其故而爲之者，亦有並不真知，但慕悅他人之所爲，而從而效之者。不真知而爲之，必有豪釐千里之差；浸至冬葛夏裘之謬。此宋儒之所以重明理也。理學家之所謂理，果至當不易與否，自難斷言。然其心，則固求明乎究極之理，而後據之以行事也。

以此推之政治，則不肯作一苟且之事。宋儒有一習道之語，曰：「治非私智之所出。」所惡於私智者，以其欲強自然之事實，以從我之欲，不合乎天然之理，不足致治，而轉益糾紛也。伊川曰：「孔明有王佐之才，道則未盡。王者如天地之無私心焉，行一不義，而得天下不爲。孔明必求有成，而取劉璋，聖人事無成耳。」一時一事之成功，就一時一事言之固有利，統全局言之實有害，故有所不爲也。呂與叔明道哀辭謂其「事學聖人而未至，不欲以一善成名。寧以一物不被澤爲己病，不欲以一時之利爲己功。」眞理學家，都有此意。

其行諸己者，尤爲卓絕。橫渠曰：「學必如聖人而後已。知人而不知天，求爲賢而不求爲聖，此秦漢以來學者之大蔽。」伊川曰：「且莫說將第一等讓與別人，且做第二等。纔如此說，便是自棄。雖與不能居仁由義者，差等不同，其自小則一也。言學便以道爲志，言人便以聖人爲志。自謂不能者，自賊者也。謂其君不能者，賊其君者也。」所以必希聖，必以第一等人自期者，以天下惟有一真是，舍此皆不免豪釐千里之差也。

如此徹底之道，並不恃天賦之資。其功皆在於學。伊川曰：「別事都強得，惟識量不可強。今人有斗筲之量，有釜斛之量，有鍾鼎之量，有江河之量。江河之量亦大矣，然有涯，有涯亦有時而滿。惟天地之量則無滿。聖人，天地之量也。聖人之量，道也。常人之有量者，天資也。天資之量須有限。大抵六尺之軀，力量只如此，雖欲不滿，不可得也。」讀「六尺之軀」力量只如此」九字，真是使困知勉行者，氣爲之一壯矣。

理學家之學，於理求其至明，於行求其無歉。然二者又非二事。明理者，所以定立身之趨向；立身者，所以完明理之功用也。抑此非徒淑身，施之當世，亦無虧憾。以天下惟有一理，治身之理，卽治世之理也。理學家最服膺之語曰：「體用一源，顯微無間。」（語出伊川易傳序。）其斥理學以外之學，則曰：「言天理而不用諸人事，是爲虛無，是爲異學。言人事而不本諸天理，是爲粗淺，是爲俗學。」二者之爲失雖異，而其失惟鈞。皆以不明乎獨一無二之理，故其所行遂至差謬也。

理學家視修己治人，非有二道。故曰：「志伊尹之所志，學顏子之所學。」雖然，物莫能兩大，有所重於此，勢必有所輕於彼。理學家論治，每謂己不立則無以正物，其說固然。（橫渠曰：「德未成而先以功業爲事，是代大匠斲，希不傷手也。」明道曰：「不立己後，雖向好事，猶爲化物。己立後，自能了當得天下萬物。」朱子曰：「古人只是日夜皇皇汲汲，去理會這個身心。到得做事業時，只隨自家分量以應之。」又曰：「多只要求濟事，而不知自身不立，事決不能成。人自心若一毫私意未盡，皆足敗事。」或問：「學者講明義理之外，亦須理會時政，庶他日臨事不至牆面。」曰：「學者若得義理明，從此去量度事物，自然泛應曲當。今世文人才士，開口便說國家利害，把筆便述時政得失，濟得甚事？只是講明義理，以淑人心，使世間識義理之人多，何患政治不舉？」然因此全副精神，皆貫注於內，而於外事遂有所不暇及，亦其勢也。後來顏習齋所攻擊，專在於此。凡事皆欲從源頭上做起，皆欲做到極徹底，而所言遂不免於迂闊，此亦理學之一弊也。爲治如行修途，眼光須看得極遠，腳步須走得極穩。千里之行，始於跬步，意不可不存於千里，足不可不謹於跬步也。徒顧目前之險夷，而遂忘其所欲至，此爲理學家所譏之俗學。目前雖幸免蹉跌，而所欲至之地，卒無可至之時，則其行爲無謂矣。反於此者，又或眼光看得極遠，而於目前之情形，有所不悉，遂不免於蹉跌，此則理學之弊。理學家言治本，則致謹於王霸之辨，言治法，則欲復封建井田。姑勿論所言之是非，然見在之世界，去封建井田亦

遠矣。必如何而後封建井田可復，理學家不能言也。（非不言之，然其言多迂闊，實與未嘗言等。）則其欲復封建井田，亦徒存其願而已。況夫封建井田之未必可復邪？

泥古之足以致弊，宋儒亦非不知之，然其所以自解者，則曰：「必有關雎、麟趾之意，而後可以行周官之法度。」（明道之言。）然則周官法度之不能行，皆由關雎、麟趾之意之不足。關雎、麟趾之意苟足，周官之法度，遂無不可行矣。（宋儒論治，偏重德化，略於事爲，弊亦由此。）然宋儒於古人之法度，實考之未精，故其所主張，自謂參酌古今，實不免墨守古法。（由其誤謂古代成法，皆合於至當不易之天理也。使其真能詳考，自無此弊。）論治則欲復井田封建，善俗則欲行古冠昏喪祭之禮，皆坐此弊。（宋儒於禮，實行者甚多。關學無論矣。朱子所修儀禮經傳通解，自一家以至一國之禮，悉具焉。陸象山之父名質，字道鄉，亦酌先儒冠昏喪祭之禮，行之於家。此等事不勝枚舉。）宋儒於禮，考古之作亦甚多。儀禮經傳通解外，如陳祥道之禮書，敖繼公之儀禮集說等皆是。○宋儒所謂禮，實不可行於世，讀呂氏之藍田鄉約，便可見之。○古代社會，階級較後世爲嚴。宋儒率古禮而行之，實於後世情形有所不合，人心遂覺其不安，人人皆覺其所行爲不近情。後來戴東原所攻擊，專在於此。（陽明言心學，故其所言，較宋儒稍爲活動。陽明之言曰：「天下古今之人，其情一而已矣。先王制禮，皆因人情而爲之節文，是以行之萬世而皆準。其或反之吾心而有所未安者，非傳記之謬缺，則

必風氣習俗之異宜。此雖先王未之有，亦可以義起。三王之所以不相襲禮也。若徒拘泥於古，不得於心，而冥行焉，是乃非禮之禮，行不著而習不察者矣。」其與鄒守益書曰：「今之爲人上而欲道民以禮者，非詳且備之爲難，惟簡切明白，使人易行之爲貴耳。」其言皆較宋儒爲弘通。然必謂先王之法，可行之萬世而準，則仍未免蓬之心。率此行之，必致仍以先王之法爲本，以吾之意見，略加參酌，自謂可行之當世，而仍未必有當於世人之情耳。」

宋儒之尊君權，與其嚴階級同蔽。固由晚唐五代，裂冠毀冕，有以激之；亦其拘守古人成法太過，謂欲求治，必如古人所爲；古代君權本尊，宋人持論，遂不覺其太過也。宋學開山孫明復，作春秋尊王發微，卽大昌尊君之義。且謂春秋有貶無褒。其持論之酷如此。溫公疑孟子，詆其貴戚易位之言。李觀作常語辨，以孟子爲五霸之罪人。謂「五霸率諸侯事天子，苟有人性，必知其逆順矣。」然則孔子稱「湯武革命，應天順人」，孔子亦五霸之罪人乎？此弊理學家入之頗深。至清代曾國藩等，猶有此見。社會之所以能立，其原因自極深遠。此輩則謂非有封建之世，階級森嚴，下之視上，懷乎其不可犯之風氣，不足維持。謂此等名分一壞，卽不免於大亂。實由其於社會現象，研之未深，而徒以古爲郅治之世，致有此繆見也。

宋儒自謂於二氏之學頗深，故能入其室而操其戈。後之議理學家者，則又謂周程張朱等，其初皆與二

氏有交涉，故其說實不免於儒其貌而釋老其心。（葉水心之論即如此。水心習學記言云：「程氏答張氏論定性，動亦定，靜亦定，無將迎，無內外，當在外時，何者在內？天地普萬物而無心，聖人順萬事而無情，擴然而大公，物來而順應；有爲爲應迹，明覺爲自然，內外兩忘，無事則定，定則明，喜怒不繫於心而繫於物，皆老佛語也。程張攻擊老佛，然盡用其學而不自知。」又謂周、張、二程，無極、太極、動靜、形氣、聚散等，爲以佛說與佛辯。○晁以道謂濂溪師事鶴林寺僧壽涯，得「有物先天地，無形本寂寥，能爲萬象主，不逐四時彫」之偈。性學指要謂濂溪初與東林總游，久之，無所入，總教之靜坐，月餘，忽有得，以詩呈曰：「書堂兀坐萬機休，日煖風和草自幽。誰道二千年遠事，而今只在眼睛頭。」總肯，即與結青松社游。則濂溪早年，確與二氏有交涉，無怪其太極圖之取資於彼也。至張子朱子等之出入二氏，則更事實確鑿，無待考證矣。）至於邵子之被斥以道家，陸王之見疑於佛學，則更不俟深論矣。然宋明儒者，於二氏之學，入之實不深，故其所詰難，多不中理。焦澹園謂「伯淳未究佛乘，故其措鑿之言，率揣摩而不得其常，大似聽訟者，兩造未具，而億決其是非，臆證未形，而縣擬其罪案。」斯言得之。「改頭換面」實非理學家所能也。（宗杲教張子韶，謂「既得把柄，開道之際，當改頭換面，隨宜說法。」即使爲陽儒陰釋之論也。子韶名九成，錢塘人，自號橫浦居士，又稱無垢居士，龜山弟子。朱子闢之，以爲洪水猛獸。）

老釋相較，釋氏之說，遠較老氏爲高。理學家雖以二氏並稱，實則其所闢者，十九在釋氏也。儒家闢佛之說，爲宋儒所稱者，爲韓退之之原道。其說實極粗淺。宋初闢佛者，有石介之中國論，歐陽修之本論，亦原道之類耳。稍進而其說乃精。

宋儒闢佛第一要語，爲程子之「吾儒本天，異端本心。」其所謂天者，卽天地萬物之定理。謂宇宙間一切皆有定則，爲人所當遵守而不踰。釋氏惟任其心之所見，則一切無定。故以知識言，則不能明理；以制行論，遂至猖狂妄行也。張子謂釋氏「不能窮理，故不能盡理。」意亦同此。其實天下無不明事理，可成學問者。釋氏之注重一心，乃將人類一切罪惡，加以窮究，謂其根原皆出於心耳。能所二者，不能相離。承認有我，卽不啻承認有物；承認有物，亦不啻承認有我矣。理學家謂「吾儒知有理，故其言心也，從至變之中而得其不變者。」釋氏但見流行之體，未免以禪宗之流失，概佛教之本來也。

又謂「釋氏有敬以直外，無義以方外。」（亦明道之言。）案佛氏有三千威儀，八萬細行。更進而言之，則有六波羅蜜。凡可以饒益有情者，善巧方便，無所不爲。戒律之嚴，尤爲他教所莫比。安得謂無制行之義邪？延平云：「吾儒異於異端者，理一而分殊也。理不患不一，所難者分殊耳。」朱子曰：「理一體也。分殊，用也。」蓋謂釋氏有仁而無義也。然冤親平等，乃以究極之義言之。至於應事，則釋氏亦有種種方便，曲盡其妙。

試讀華嚴之五十三參可知。正不得謂有仁而無義也。況理不患不一，所難者分殊，語亦有病。此則陽明之心學，足以正之矣。

有以善爲吾心所本有，疑釋氏一切空之，遂并善而欲空之者。明道謂其「直欲和這些乘彝，都消鑠得盡」是也。然善者心之本體，正空無一物之謂。（如鑑之明。）若先有世間之所謂善者，雜乎其中，（如鑑中美景。）則眼中金屑矣。心學家謂心體本空，惻隱、羞惡、辭讓，是非，皆自此空體流出，頗得佛意。空者，空其欲障。四端卽心之本體，非本體爲一物，而四端別爲一物，藏於其中也。然則乘彝安可消鑠盡邪？乘彝而消鑠盡，則并明道所謂佛所欲見之心性而無之矣。（明道曰：「彼所謂識心見性也。若存心養性一段事則無矣。」）何也？乘彝卽心性也。

有謂二氏專從生死起念，不離乎貪生畏死之情者。案後世所謂道教，實古之神仙家。神仙家專求長生，冀享世間之快樂，宋儒闢之是也。然此實不直一闢。至於真道家及佛氏，則了無貪生畏死之念。世未有淺至貪生畏死，猶能成爲學，成爲教者。此亦不足辯也。宋儒之說，乃觀世俗信奉二氏者，皆不離乎貪生畏死之念，遂以此咎二氏耳。亦可見其於二氏之學，入之實不深矣。

或謂佛氏專從事於一心，久之，見其昭昭靈靈，如有一物，遂以此爲心之本體，得此則天地萬物雖壞，而

此不壞幻身雖亡，而此不亡。又或靜久，精神光采，其中了無一物，遂以爲真空。此皆禪宗之未失。宋時佛教，諸宗皆衰，惟禪宗獨盛。故宋儒闢佛，多指禪宗言之。後之理學家，不加深察，遂謂佛教僅如此耳。其實禪宗不足概佛教之全，禪宗之流失，卽彼亦以爲魔道也。

張子曰：「若謂虛能生氣，則虛無窮，氣有限，體用殊絕，入老氏有生於無自然之論。」老氏說果如此，張子聞之，誠爲得當。然老子所謂「天地萬物生於有，有生於無」者，卽莊子「有不能以無爲有」之說。謂天下萬物，彼不能爲此之原因，此亦不能爲彼之原因，故不得不歸之於無。無猶言不可知，正認識論之精義也。又有謂我之所謂無爲，乃無私意造作，彼則真入於無爲者。此則道德五千言俱在，其餘道家之言亦俱在，稍一披覽，卽可知其所謂無爲者，果係一事不爲，抑係無私意造作，亦不俟辯也。

理學家之闢二氏，多屬誤會之談。然其說仍有極精者，不能以其於二氏之說，有所誤會，遂概斥爲不足道也。今試引數事如下：

或謂明道：「釋氏地獄之類，皆是爲下根人設，怖會爲善。」曰：「至誠貫天地，人尙有不化，豈有立僞教而人可化乎？」或問陽明：「佛以出離生死，誘人入道，仙以長生久視，誘人入道，究其極致，亦見得聖人上一截，然非入道正路。」陽明曰：「若論聖人大中至正之道，徹上徹下，只是一貫，更有甚上一截，下一截？」明道

論神教不能普行之理甚精。蓋凡神教，雖亦見得究極之理，終不免有許多誘人之說。究極之理真，誘人之說則僞。一時雖借此誘人，久之，其遭人指擊者，即在於此。此亦可見說非真理，終不能立也。陽明之說，尤覺簡易直截，獨標真諦。

陽明曰：「仙釋說到虛，聖人豈能虛上加得一豪實？佛氏說道無，聖人豈能無上加得一豪有？但仙家說虛，從善生上來；佛氏說無，從出離生死苦海上來；卻於本體加這一些子意思，便不是虛無的本色；便於本體有障礙。聖人只是還他良知的本色，更不著些子意思。良知之虛，便是天之太虛。良知之無，便是太虛無形。日月風雷山川民物，凡有貌象形色，皆在太虛無形中，發用流行，未嘗作得天的障礙。聖人只是順其良知之發用。天地萬物，俱在我良知發用流行中，又何嘗有一物超於良知之外，能作障礙？」案神仙家不足論。陽明謂佛氏亦有所著，亦非真知佛說之談。然所說之理則甚精。真空妙有，原係一事。必知此義，乃不致以空爲障也。

梨洲曰：「佛氏從生死起念，只是一個自爲。其發願度衆生，亦即一個爲人。何曾離得楊墨科曰：豈惟佛氏自科舉之學與儒門那一件不是自爲爲人？自古至今，只有楊墨之害更無他害。」案謂佛氏從生死起念，前已辨之。其發願度人，則正所謂乘藉之不容已。儒家力爭性爲善而非空，正是此意。不得轉以此病釋氏也。然梨洲謂佛雖非是，而其將一切惡悉歸到爲人爲己上，見得至善惟有一點，更移動分寸不得，則其說甚精。

凡教總不能無迷信之談，此乃借以厲世，本非教中精義。得其義，棄作筌蹄可矣。佛說來自天竺，彼土之人，好驚遐想，說尤恢詭。此亦非佛說精義所在也。而此土之人，或竟信以爲真，則墮入迷信矣。溫公不信佛，曰：「其微言不能出吾書，其誕者吾不信也。」佛說之誕，乃其興於天竺使然，不足爲佛病。然論佛說而能及此，卻可掃除許多障礙也。

朱子釋氏論曰：「佛之所生，去中國絕遠。其書來者，文字音讀，皆累數譯而後通。而其所謂禪者，則又出於口耳之傳，而無文字之可據。以故人人得窺其說，以附益之，而不復有所考驗。今其所以或可見者，獨賴其割裂鑿鑿之迹，猶有隱然於文字之間，而不可揜者耳。蓋凡佛之書，其始來者，如四十二章、遺教、法華、金剛、光明之類。其所言者，不過清虛綠業之論，神通變見之術而已。及其中間爲其學者，如惠遠、僧肇之流，乃始稍竊列莊之言，以相之。然尙未敢以爲出於佛之口也。及其久而恥於假借，則遂顯然竊取其意，而文以浮屠之言。如楞嚴所謂自聞，卽莊子之意；而圓覺所謂四大各離，今者安身當在何處，卽列子所謂精神入其門，骨髓及其根，我尙何存者也。凡若此類，不勝枚舉。然其說皆萃於書首，其玄妙無以繼之，然後佛之本真乃見。如結壇、圓呪、二十五輪之類，以至於大力金剛，吉盤、茶鬼之屬，則其處鄙俗惡之狀，較之首章重玄極妙之旨，蓋水火之不相入矣。至於禪者之言，則其始也，蓋亦出於晉宋清談論議之餘習，而稍務反求靜養以默證之。或能頗

出神怪，以街流俗而已，如一葉五花之讖，隻履西歸之說，雖未必實有其事，然亦可見當時所尙者，止於如此也。其後傳之既久，聰明才智之士，或頗出於其間，而自覺其陋。於是更出己意，益求前人之所不及者，以陰佐之；而盡諱其怪幻鄙俚之談。於是其說一旦超然，真若出乎道德性命之上，而惑之者，遂以爲果非堯舜周孔之所能及矣。然其虛夸詭誕之情，淫巧僞浮之態，展轉相高，日益益盛，則又反不若其初時清閒靜默之說，猶爲彼善於此也。」（語類）「宋景文唐書贊，說佛多是華人之謠誕者，攘莊周，列禦寇之說佐其高，此說甚好。如歐陽公只說個禮法，程子又只說自家義理，皆不見他正賊。佛家先偷列子。列子說耳目口鼻心體處有六件，佛家便有六根。又三之爲十八戒。初間只有四十二章經，無恁地多。到東晉，便有談議，如今之講師，做一篇議總說之。到後來，談談厭了，達磨便入來，只靜坐。於中稍有受用處。人又都向此。今則文字極多，大概皆是後來中國人以列莊說自文，夾插其間，都沒理會了。」（案佛說有大小乘，其來有早晚，其經有真僞，譯有善否。又有意譯直譯之殊。直譯者或能傳其說之真，意譯者則不免摻以此方之語。若以爲學術而研究之，其中應考校處甚多。朱子所論，雖未盡當。（如不知列子係僞書，竊佛說，反以爲佛竊列子之類。）然能見及此中罅隙，要不可謂非善讀書者。自漢學之興，羣詆宋儒爲空疏武斷。其實宋儒如朱子，即讀書極博之人。此外博洽者尙多。其勇於懷疑，善於得聞，尤非漢唐及清儒所及。清代考證之學，實亦自宋儒開其源。（如朱子疑古文

尙書、吳棫發明古韻等皆是。特未竟其業耳。此說甚長，當別專論，乃能盡之。此篇不能詳也。

理學自創始迄今幾千年。信從者固多，攻擊者亦不少。綜所攻擊，不外兩端：一病其空虛無用，一以爲不近人情而已。前說可以清之，顏習齋爲代表，後說可以戴東原爲代表。然二家所攻，實皆理學末流之弊。至於理學之真，則自有其卓然不可沒者。予舊有訂戴一篇，今附錄於後，以見戴氏之說之所由來，及其當否。今更略評顏氏之說如下。

顏氏之攻理學，一言蔽之曰：不切實用而已。故其釋「致知在格物」，必以周官之鄉三物爲物；而曰：「知無體，以物爲體。」其說窮理，則謂理在事中，必就事分析極精，乃爲窮理。（此說與戴氏同。）習齋之言曰：「以讀經史，訂羣書爲窮理處事以求道之功，則相隔千里；以讀經史，訂羣書爲即窮理處事，而曰：道在是焉，則相隔萬里矣。」譬之學琴：書猶琴譜也。爛熟琴譜，講解分明，可謂學琴乎？故曰：以講讀爲求道，相隔千里也。更有妄人，指琴譜曰：是即琴也。辨音律，協風韻，理性情，通神明，比物此志也。譜果琴乎？故曰：以書爲道，相隔萬里也。歌得其調，撫綢其指，弦求中音，徽求中節，是之謂學琴矣。未爲習琴也。手隨心，音隨手，清濁疾徐有常功，鼓有常規，奏有常樂，是之謂習琴矣。未爲能琴也。弦器可手製也，音律可耳審也，詩歌惟其所欲也，心與手忘，手與弦忘，於是乎命之曰能琴。」（存學編性理書評）顏氏之言如此，此其所以以習自號也。顏氏之嘗宋儒曰：「宋

儒如得一路程本，觀一處，又觀一處，自以爲通天下路程，人亦以曉路程稱之，其實一步未行，一處未到。」（見年譜）顏氏謂宋儒之病在習靜，在多讀書，故提倡習動，謂一誦說中度一日，則習行上少一日；紙墨上多一分，則身世上少一分。」又謂「讀書愈多愈惑，審事機愈無識，辦事愈無力。」又謂「書生必自知其愚益深。」案理學末流之弊，誠有如習齋所云者。然流弊何學蔑有？要不得以此并沒其學之真。偏於靜，偏於讀書，誠理學必至之弊。然始創理學者，及理學大家，初未謂當如此。讀前此諸篇可見也。大抵思想當大變動之時，其人必好驚心於玄遠。以其視前此之是非然否，悉不足憑，而當別求標準也。宋代正是其時。今日時勢危急，羣趨實際，救焚拯溺之不暇，而講哲學之風反大盛，亦以此故。偏於讀書之弊，不獨宋學爲然。率天下之人，而至於疏於處事，亦誠在所不免。然此亦分工之道，不得不然。今之科學家，固有終身在試驗室中，而未嘗一用其所學，以作實事者矣。亦得祇爲但讀琴譜，但觀路程本邪？

附訂戴

戴東原作原善，孟子字義疏證，以攻宋儒。近人亟稱之，謂其足救宋儒之失，而創一新哲學也。予謂戴氏之說，足正宋學末流之弊耳。至其攻宋學之言則多誤。宋學末流之弊，亦有創始之人，有以召之者。戴氏又不足以知之也。宋學之弊，在於拘守古人之制度。制度不虛存，必有其所依之時與地。而各時各地，人心

不同。行諸此時此地，而鞏然有當於人心者。未必其行諸彼時彼地，而仍有當於人心也。欲求其有當於人心，則其制不可不改。是以五帝不襲禮，三王不沿樂。此猶夏葛而冬裘，其所行異，其所以求其當同也。宋之世，去古亦遠矣。民情風俗，既大異於古矣。古代之制，安能行之而當於人心乎？宋儒不察，執古之制，以爲天經地義。以爲無論何時何地，此制皆當於理。略加改變，實與未改者等，而欲以施之當時。夫古之社會，其不平等固甚。宋時社會之等級，既不若古之嚴矣。在下者之尊其上，而自視以爲不足與之並，亦不若古之甚矣。宋儒執古之制而行之，遂使等級之釁復熾，與人心格不相入。戴氏之言曰：「今之治人者，視古聖賢體民之情，遂民之欲，多出於鄙細隱曲，不屑措諸意。而及其責以理也，不難舉曠世之高節，著於義而罪之。尊者以理責卑，長者以理責幼，貴者以理責賤，雖失謂之順。卑者，幼者，賤者，以理爭之，雖得謂之道。於是下之人，不能以天下之同情，天下所同欲，達之於上。上以理責其下，而在下之罪，人人不勝指數。人死於法，猶有憐之者。死於理，其誰憐之？」夫使尊者、長者、貴者，威權益增；而卑者、幼者、賤者，無以自處。是誠宋學之弊，勢有所必至。由其尊古制，重等級，有以使之然也。（東原又謂：「今處斷一事，責詰一人，莫不曰理者。於是負其氣，挾其勢位，加以口給者理伸，力弱，氣慙，口不能辭者理屈。」此則由人類本有強弱之殊，理特其所藉口耳。不能以此爲提唱理者之罪也。）至於以理責天下之人，則非創宋學者之所爲，而爲宋學末流之失。

戴氏又謂「理欲之說行，則讒說誣辭，得刺譏君子而罪之，使君子無完行。」夫以宋儒克己之嚴，豪釐不容有歉，因推此以繩君子而失之嚴，事誠有之。至於小人，則宋儒曷嘗謂其欲可不遂，而不爲之謀養生送死之道哉？橫渠見饑寒，輒咨嗟，對案不食者經日。嘗以爲欲致太平，必正經界。欲與學者實用一方試之，未果而卒。程子提唱社會，朱子推行社會。凡宋儒講求農田、水利、賦役之法，勒有成書，欲行之當世者，蓋數十百家。其志未嘗行，其書亦不盡傳，然其事不可誣也。鄉曲陋儒，抱性理大全，侈然自謂已足，不復知世間有相生相養之道；徒欲以曠世之高節，責之人民，此乃宋學末流之失，安可以咎宋學乎？宋儒所謂理者，即天然至善之名，戴氏所謂必然之則也。戴氏稱人之所能爲者爲「自然」，出於血氣。其所當止者爲「必然」，出於心知。與宋儒稱人之所能爲而不必當者爲氣質，爲欲，所當善者爲義理，爲性，有以異乎？無以異乎？夫特異其名而已。戴氏則曰：「吾所謂欲者，出於血氣。所謂理義者，出於心知。血氣心知，皆天之所以與我，是一本也。宋儒謂理出於天，附著濫泊於形體。形體者氣質，適足爲性之累。是二之也。」夫宋儒曷嘗謂氣質非出於天哉？謂「義理氣質，同出於天，則氣質不應爲義理之累。宋儒謂氣質爲義理之累，是一之也。」然則戴氏所謂血氣者，任其自然，遂不足爲心知之累歟？謂任血氣之自然，不足爲心知之累，則戴氏所謂「耳目鼻口之欲，必以限制之命節之」之說，爲不可通矣。謂性必限之以命，而聲色臭味當然之則，必以

心爲之君，則宋儒之說，戴氏實未有以易之也。若曰：「民之秉彝，好是懿德。心知之自然能好懿德，猶耳目鼻口之自然能好聲色臭味。以是見義理之具於吾心，與宋儒謂義理之性原於理，而理出於天者不同。」則宋儒固亦未嘗不謂理具於吾心也。特本之於天耳。卽戴氏謂義理之性天然具於吾之心知，而推厥由來，亦不能謂其不本之於天也。戴氏謂「飲食能爲身之養者，以其所資以養之氣，與所受之氣同。問學之於德性亦然」是也。安得謂宋儒「更增一本」乎？

戴氏曰：「宋儒所謂理，卽老子所謂真宰，釋氏所謂真空也。老釋自私其身，欲使其身離形體而長存。乃就一身分爲二，而以神識爲本。推而上之，遂以神爲有天地之本。以無形無迹者爲有，而視有形有迹者爲幻。宋儒以理當其無形無迹者，而以氣當其形體。故曰心性之邪廓。」老子、釋氏是否自私其身，是否歧神與形而二之？今不暇及。宋儒之闡釋氏也，曰：「釋氏本心，吾儒本天。」其所謂理，與老釋之所謂神識非同物，則彰彰明矣。宋儒蓋病老釋以萬物爲虛，獨吾心所知見者爲實，則一切皆無定理，猖狂妄行，無所不可。故欲以理正之。宋儒所謂理者，乃事物天然之則，卽戴氏所謂「有物必有則」，而其所謂義理之性，則吾心之明，能得此天然之則者，卽戴氏所謂「能知不易之則之神明」也。安得視爲虛而無薄之物乎？

戴氏謂「老釋內其神而外形體。舉凡血氣之欲，悉起於有形體以後，而神至虛靜，無欲無爲。宋儒沿

其說。故於民之饑寒，愁怨飲食男女，常情隱曲之威，咸視爲人欲之甚輕。古之言理也，就人之情欲求之，使之無疵。今之言理也，離人之情欲求之，使之忍而不顧。故用之治人，則禍其人。夫人之生也，莫病於無以遂其生。欲遂其生，亦遂人之生，仁也。欲遂其生，至於戕人之生而不顧，不仁也。不仁實始於欲遂其生之心。無此欲，必無不仁矣。然使無此欲，則於天下之人，生道窮促，亦將漠然視之。已不必遂其生，而遂人之生，無是情也。故欲不可無，節之而已。謂欲有邪正則可以理爲正，以欲爲邪，則不可也。」此爲戴氏主意所在，自比於孟子不得已而言者。吾聞朱子之言曰：「飲食，天理也。要求美味，人欲也。」則朱子所謂天理，亦即欲之出於正者。與戴氏謂「欲其物，理其則」同。未嘗謂凡欲皆不當於理也。人之好生，乃其天然不自已之情。自有人類以來，未有能外之者也。世固有殺身以成仁，亦有殺以止殺者。彼以爲不殺其身，不殺殺之可以止殺之人，則於生道爲有害。其事雖出於殺，其心仍以求夫生也。自有人類以來，未有以死爲可敬，生爲可厭者。戴氏以爲宋學者不欲遂其生爲慮，可謂杞人憂天之隊矣。若謂欲遂人之生者，先不能無自遂其生之心，則又有說。世無不肯舍其身而可以救人者。蓋小我之與大我，其利害時有不同。於斯時也，而無捨己救人之心，亦如恆人，徒存一欲遂其生之念，則終必至於戕人之生而不顧。此成仁之所以必出於殺身，而行菩薩行者，所以必委身以飼餓虎也。彼行菩薩行者，寧不知論各當其分之義，固不當食肉以自養，亦不

安身以飼虎哉？不有純於仁之心，固無以行止於義之事。彼行止於義者，其心固純於仁。所以止於義者，以能行之仁，止於如此；不如此，則轉將成爲不仁，故不得已而止於此，而非其心之遂盡於此也。心之量適如其分而已，及其行之，未有能盡乎其分者。而戴氏所謂戕人之生以遂其生之禍作矣。故以純乎理，俟人，宋儒未嘗有此，其有之，則宋學之末失也。至於以純乎理自繩其身，則凡學問，未有不當如此者。抑天下之人，使皆進於高節，則不能誘掖天下之人，使同進於高節，則因講學問者，所當同具之志願。而非天下之人，真能同進於高節，天下亦決無異太平之望也。

戴氏謂「老釋以其所謂真宰真空者爲已足，故主去情欲勿害之，而不必問學以擴充之。宋儒之說，夫老釋之說，故亦主靜，以水之清喻性，以其受汙濁喻氣質。宋儒所謂氣質，即老釋所謂情欲也。水澄之清，故主靜，而易其說爲主敬存理」云云。主靜之說，發自周子。其說曰：「立天之道，曰陰與陽。立地之道，柔與剛。立人之道，曰仁與義。」又曰：「聖人定之以中正仁義而主靜，立人極焉。」蓋以人之所行，不越義，而二者名異而實同。義所以行仁，而仁則所以爲義立之體。無義固無以行仁，無仁亦無所謂義。當仁，正其所以爲義；當義而義，亦所以全夫仁，所謂中也。止於中而不過，則所謂靜也。何以能靜，必有持守方焉，則程子所謂主敬也。主敬而事物至當不易之則（宋儒所謂理）存焉矣。宋儒所謂靜，非寂然不

勳之謂也。戴氏之說，實屬誤會。

戴氏謂「宋儒詳於論敬，而略於論學。」此亦宋學末流之失。若程朱，則「涵養須用敬，進學在致知。」兩端固並重也。抑進學亦必心明而後能之，故反身自勘之學，終不能不稍重於內。戴氏曰：「聖人之言，無非使人求其至當，以見之行。求其至當，即先務於知也。凡去私不求去蔽，重行不先重知，非聖學也。」此說與程朱初無以異。又曰：「聞見不可不廣，而務在能明於心。一事豁然，使無餘蘊。更一事而亦如是。久之，心知之明，進於聖知，則雖未學之事，豈足以窮其知哉？」此說亦與朱子一旦豁然貫通之說同。蓋天下事物，窮之不可勝窮，論明與蔽者，終不得不反之於心也。然與戴氏力主事物在吾心之外，謂心知之資於事物，以益其明，猶血氣之資於飲食，以益其養者，則未免自相矛盾矣。

戴氏謂「心之能悅懿德，猶耳目鼻口之能悅聲色臭味。接於我之血氣，辨之而悅之者，必其尤美者也。接於我之心知，辨之而悅之者，必其至是者也。」夫口之同嗜易牙，目之皆嬖子都，耳之皆期節曠，亦以大致言之耳。鴟梟嗜鼠，即且甘帶，人心之異，有不翅其若是者矣。謂義理之尤美者，必能爲人所悅，其然乎？其然乎？戴氏又曰：「理也者，情之不爽失者也。凡有所施於人，反躬而靜思之人，以此施於我，能受之乎？凡有所責於人，反躬而靜思之人，以此責於我，能盡之乎？以我絮之人則理明。」故曰：「去私莫如強恕。」

夫人心之不同，如其面焉。固有此視爲不能受，彼視爲無難受；此視爲不能盡，彼視爲無難盡者矣。若曰：「公則一，私則萬殊；人心不同如其面，只是私心。」則非待諸私欲盡去之後不可，因非凡人所能持以爲是非之準也。凡人而度其所能受以施諸人，度其所能盡以責諸人，適見其一人一義，十人十義，樊然淆亂而已矣。戴氏曰：「心之所同然，始謂之理，謂之義。未至於同然者，存乎其人之意見，非理也，非義也。凡一人以爲然，天下萬世皆曰：是不可易也。此之謂同然。」此說安能見之於實？如戴氏之所云，亦適見其自謂義理，而終成其爲意見而已矣。